

# Auriacus, sive libertas saucia

Daniël Heinsius

## bron

Daniël Heinsius, *Auriacus, sive libertas saucia*. Andream Cloucqium, Leiden 1602

Zie voor verantwoording: [https://www.dbnl.org/tekst/hein001auri01\\_01/colofon.php](https://www.dbnl.org/tekst/hein001auri01_01/colofon.php)

Let op: werken die korter dan 140 jaar geleden verschenen zijn, kunnen auteursrechtelijk beschermd zijn.

**Illvstrissimis, nobilissimis, amplissimis, Potentissimisqve  
Hollandiae & Westfrisiae Ordinibvs, *Dominis suis Magnificis.*  
Illvstres ordines**

INter reliqua monimenta quibus vel humanum se essere ingenium, vel acuere industria consuevit; una TRAGOEDIA Regium sibi nomen vendicat: vel quod reges heroasque, ac principes in scenam ea deducat: vel quod non nisi regales, sublimesque, atque ab omni vulgari dicendi genere remotos spiritus admittat. Gravissimam eam dignissimamque omnium scriptorum esse, multis argumentis probarunt Romani, & antè eos disciplinarum autores Graeci. Ac ne apud vos rationes è Grammaticorum scholis adferamus, duplici modo eius dignitatem tuetur eius princeps Sophocles, tum quod senex eam scripsit, tum (quod propriè ad vos spectat) quod Reipublicae praefectus. Unum tamen est quod mirari saepenumèro soleam, sublimia nimirum illa ingenia, quae non sine singulari eruditione, ac praesertim sapientiae illius, quam

Moralem, Civilemque dicimus, rerum praetereà cognitione, & industriâ se ad hoc scribendi genus contulerunt, cum solam TRAGOEDIAM omnes vitae humanae casus, fortunas, pericula, eventa rerum, consiliorum exitus amplecti statuerent; prudentiae praetereà magistram esse; eâ tamen ad fabularum vanitatem, ac rerum deliria abuisint: nec sibi vel res gestas aevi sui, vel imperatores, subiectum esse maluerint, quam Oedipodas, Aiaces, Medeas, caeteraque quibus effaeta anus antiquitas credulitati hominum turpissime illusit. Ego verò ILLUSTRISSIMI ORDINES, TRAGOEDIAM vobis offero meam; imò vestram: quod in eâ meum est, trado vobis: quod vestrum est, vt gratum sit id quod offero, efficiet. Ita simul quod in reliquis Tragicis deplorari solet effugi, viamque mihi ad benevolentiam vestram praeperavi. Ego autem simul & de opere, & de operis argumento cogitare coepi, seu potius argumento dignum opus quaesivi, simulque invêni. Nec enim tam factorum gestorumque sterilis vestra Batavia est, vt in eâ materies scribendi quaeratur, quam inueniatur, citius. Hoc vobis affirmare liquidò possum, nihil ab antiquis Philosophis pluris olim, hoc vno scribendi genere, factum esse. Hinc imperatores, hinc duces, prudentiam apud Graecos suam hauriebant: haec illa disciplina est, quam illi per excellentiam doctrinam dicebant: hinc Tragicis quotiescunque in theatrum prodirent publicè, docere ab Atheniensibus dicebantur: hinc Aristotelis; hinc

Carystij maximorum virorum περί διδασκαλιῶν id est de disciplinis libri. In ijs Rex philosophorum ille tempus actionis vniuscuiusque Tragoediae diligentissimè notarat. Ille sapientiae ac voti humani terminus Plato & scripsit eam, & quicquid in Philosophiâ postea reliquit nobis, ad normam Tragicam & antiquorum τετραλογίαν direxit, vt omittam quod Dionysijs quoque certasse feratur. Omitto reliquos minorum gentium Philosophos, omitto magnum Euclidem, qui omnem propemodùm quam in sapientiae cognitione operam collocarant, ad vnum hoc studium contulerunt. Quod si eam propterea quisquam (vt sunt sinistra hominum hoc tempore iudicia) minoris putet, quod ad poëticen referatur; eum nos ILLVSTRISSIMI ORDINES per ea conuincemus, quae ipse miratur maximè: modo ne ità rerum ignarus sit, vt ab ipsâ Philosophiâ vitae humanae Reginâ abhorreat. Homeri tempore, quivnus è tam profundâ temporis antiquitate nobis relictus est, Philosophiae nomen ne fando quidem auditum fuit vnquam. Fuerunt tamen illo tempore, qui & rerum causas, principia, motus, ortus, materiem, & pulcherrimae denique machinae huius rationes inquirerent: & quae vera demùm sapientia est, fuere & qui de moribus, de recte instituendâ hominum vitâ agerent, non publici modò, sed & priuati morum magistri: quos aetas illa simplicissima ἀοιδούς siue cantores dicebat. Illi matronarum thalamis absentibus maritis praeficiebantur, Regum

liberos instituebant, mores formabant hominum, virtutis causam agebant, omnia denique philosophi habebant, praeter nomen. Idipsum apparet ex illo cantore qui belli Troiani temporibus Clytemnaestram seruauit, dum in expeditione cum reliquis Graeciae proceribus esset Agamemnon, quo interfecto tandem illâ potitus est Aegystus. Non adferam vobis somnia aegrorum ILLVSTRISSIMI ORDINES, neque id quod volo poëtarum testimonijs probabo, vt plerique hodie solent, qui tum demum rem factam habere arbitrantur, cum Peripatheticam, aut Stoicam philosophiam, aut quamlibet eius partem testimoniis ex eâdem factâ petitis comprobarunt. Quod res est dicam: vox ᾄδειν siue cantandi ita à veteribus sumpta fuit teste Geographo, vt φράζειν siue dicere significaret. Ea quae à nobis & ab illo dicuntur, ita se habere probant doctissimae Graecorum magistrorum Glossae, & certius multo quod dicturi sumus. Septem enim illi Graeciae sapientes nondum tamen philosophi dicti, metra quaedam de moribus ediderunt quae ἄσματα seu ἄδόμενα (si modo idem vtrunque) dixerunt. in quibus & vestigia vocis ἀοιδός animaduertimus, & quid illis propositum fuerit manifestè videmus. Talia primus eorum Thales, talia Chilo, talia Pittacus, talia & Bias, & Cleobulus & caeteri. Nam magnum illum legislatorem Atheniensium, cuius statuta quoque Pop. Romanus missis in Graeciam Sp. Posthumio Albo. T Man-

lio, P Sulpicio Camerino legatis diligentissime descripsit, ad Elegias & omne fere poëmatum genus se demisisse praetereo, reliquos etiam sapientes ad σιλλοῦς & alia praetermitto. Nec enim id ego nunc ago, quod à vulgo poetatum toties tractatum fuit, vt Poëticen extollam, quam illi non intelligunt, cuiusque vsum antiquissimum ignorant. Aequissimum peto ILLVSTRISSIMI ORDINES. vt quòtendit mea perueniat oratio, Philosophiam vt laudari patiantur ab illis postulo. Atqui eam illi in ore habent, nec difficulter id impetrabimus. Deinde, vt nobis respondeant, quantùm à philosophiâ facultas poetica abfuerit, cum axioma à philosophis pronunciatum fuit, quod beneficio Geographi adhuc habemus, quo negatur poëtam bonum esse posse, qui non prius vir bonus sit. Nam inter illam Zenonis definitionem aliquid interesse fortasse dicerent, cum humanarum diuinarum rerum imitatio Poëtice esse dicitur. At me Hercule quantum mihi laborandum hoc tempore esset, si Oratoriâ facultate antiquiorem eam esse contenderem, nisi me eâ molestiâ, & inuidiâ cui vix ferendae essem à Strabone subleuatum scirem, qui tam certis testimonijs Oratoriam facultatem à Poëticâ oriundam probat, quam à Tragicâ grauitate familiarem characterem Comicum, Nec hoc agimus, vt in Arisitidis reprehensionem incurramus qui, salsè ridet eos, qui solutam orationem vincitâ

posteriorem putant. Verùm enim uerò fati coacta est illa oratoris calumnia, & quae nobis etiam ampliùs hac de re cogitandi ansam praebuit. Nam quae de Cadmo, Pherecyde, Hecataeo dicuntur, eruditos saltem fugere non debebant. Habet ergò ad oratoriam illa se, ut ad filiam mater: ad philosophiam autem olim, sicut illa se ad quamlibet sui partem. Quòd autem hodiè pro pellice sedeat, quòd ab hominibus trivialibus, indoctis, barbaris, prostituatur, non magis genuinae huic quicquam detrahit, quam castissimae illi Abradatae apud Xenophontem uxori, Phryne, aut Lais aliqua, aut si quid his impudentius. Nomen ei à Platone illud quod ad nostram usque permansit aetatem inditum grauissimi scriptores testantur. Idem tamen, quod in ore est omnibus quicumque diuinam hanc facultatem oppugnare solent, è Republicâ suâ exegit eos. Nos verò ad illa ILLUSTRISSIMI ORDINES, videte, quam breuiter respondeamus. Primò enim, si illam Remp. Platonis recipiamus, exigendus erit ante omnes ipse fundator, cuius ipsa soluta oratio, ut & Herodoti, nusquam à poësi abhorret: nisi quis eam modo poësin esse existimet, quae numeris pedibusque vineta est: quod si concedamus, ne ἄμετρα quidem poësis erunt, imo ne quaedam fortasse ἔμμετρα, ac ne ipsi Dithyrambi: non quod à vulgari verborum in metris, sed metrorum inter se iuncturâ abhorreant, ac ne ὄσματα forsitan philosophorum. Deinde, ut Platonis ciues simus, recipienda erit mu-

lierum communitas, & reliqua; vt certum sit nihil ad eversionem Reip. plus conferre,  
 quam eius constitutionem. Sed ego me hercule tam facile eius Politiam in bene  
 constitutâ vrbe esse posse concedam; quam Idaeas in naturâ. Quod si proptereâ  
 poëtas ille in vrbe sua non fert, quod adulteria Deorum & praelia introducat Homerus;  
 metuo ne in eam artem impingat, cuius scientiam profitebatur, ratiocinandi nimirum.  
 Nam illud aut peccatum non est: aut si est, vnius tantum. Scimus enim non  
 Grammaticos modò, sed & Platonis discipulos, quae in vniuersum de Dijs ab Homero  
 dicuntur, ad naturales rationes referre solere. Quod si, vt diximus, Homerus peccauit;  
 poëtae vitium est, non poetices, & quidem illius tantum. Nam omnes ob eam causam  
 poëtas exigere tale est, ac si quis omnes Philosophos exigat quod Plato ibi male  
 argumentetur. Omitto interim, Platonem eum quem è Rep. sua exigit vbique diuinum  
 dicere. Clemens certè ille est, qui Homerum ex vrbe sua in caelum exulatum mittit,  
 & in Deorum numero citius esse patitur, quam suorum. Iam autem ad vos venio  
 ILLVSTRISSIMI MAGNIFICIQUE VIRI, ORDINES POTENTISSIMI, quibus in vindictam  
 Nobilissimo AVRIACI sanguini debitam, vix vniuersum sufficit Hispanorum nomen.  
 Ducem vobis vestrum offero. Quid admiramini? vt benevolentiam vestram favoremque  
 conciliem, titulum inspiciate. AVRIACVM fero. Percussit sat scio, foditque pectus



vestrum nominis illius recordatio, mentemque subijt illa, quae vobis communis cum illo fuit, in tutandis aris, focus, liberisque vestris pietatis imago. Videte quantum spej conceperim: quod vix totis operibus quidam consequuntur, solâ operis inscriptione me consecutum video. AVRIACVM vobis fero; atque vtinam ne talem. vtinam & viueret ille; & ego non haec scriberem! Cum vero ille si vixisset diutius nihil praeter nominis immortalitatem propositum habuisset, quae Musarum nostrarum ope nonnihil eget; agedum, id mortuo, si fieri possit, tribuamus, quod vnum ille, si vixisset, expeteret. Ambulet ergò in cothurno deinceps, quoniam in huius terrae ambitu, quam vel vniversam animo suo angustam semper iudicauit, ambulare diutius non potest. Ambulet in animis, in pectore, in manibus iuuentutis vestrae & tenellis animis patriae amorem imprimat; adultis propugnationem eius defensionemque. Videat posteritas vestra ILLVSTRISSIMI Viri, discant liberi, quanto vobis diuinum illud LIBERTATIS nomen steterit, quod non nisi virtute & fortitudine paratur: frugalitate & industria retinetur. Excelsi illi animi, mortisque contemptrix pro patriâ virtus, latiùs se fundat, quam vbi nata est. Nec tam angustis limitibus diuini hi motus, ausaque regia, cohibeantur, vt in eâdem terrâ & extitisse, & sepulta esse videantur. Agedum maris imperator BATAVE, iam te appello, cui pro patriâ mori posse dulcius fuit semper,

quàm in eâ. Tu populi Rom. triumphorum, victoriarum, ouationum; omnium denique particeps fuisti, praeterquam ruinae. Tu à terrae dominis, Romuli nepotibus bellum gerere posse didicisti, velle omnes docuisti. Tu vitam, tu hunc spiritum, tu hanc lucem pro libertate semper venalem habuisti. Tu artem ab alijs, ausus à te mutuatus es: Ita vt mortem medius inferre illi; tu promptius subire potueris. Illis imperium terrae tempus ademit: tibi maris reddidit. Tu foris Oceano, domi focijs, vbique tibi imperas. Tu, quod olim frustrâ Xerxes tentarat, Neptuno compedes iniecisti: cumque alij sive reges, sive principes vltra populos imperium suum extendere non soleant: tu etiam in ventos obtines, inuentumque tibi aliquid praeter hominem, quod parêre sciat. Accipe principem tuum BATAVE, sed morientem, qui *cum* omnia saluti tuae impendisset, se quoque impendit. Accipite viri, & recordamini, in terrâ vestrâ nihil vnquam vindicasse Iberum sibi, praeter fraudem, cuius vnus artis pudenda est scientia. Agedum BATAVE, quod solum pro tuis in me beneficijs possum, Musas meas consecraui tibi, quoniam chartae solae, cum ferrum, aes, & chalybs non possint, diurnitatem annorum, & saeculi violentiam perrumpunt. Ego cum bonis exutus omnibus, laribus, & praedijs meis, nihil Hispanorum tyrannidi, communis religionis ergò, praeter infelicem hanc animam subduxissem, & si quam spem in pa-

rentibus, miserimis & ipsis repositam haberem, tu me excepisti, fouisti, amplexus es: ac, quod mirum maximè, vestrum beneficium maius mihi fecit Hispanorum crudelitas. Inter reliqua & illud accedit, quod in Academiâ vestrâ tot iam annos versatus sim, in quâ & illud vobis, vt primariae causae, ascribendum puto, quod in hâc terrâ vestrâ tot summorum virorum familiaritate vsus sim, ac praesertim trium Heroum, in quorum tempora me incidisse gloriari soleo: Iosephi Scaligeri (at quantum hoc nomen Dij immortales?) omnis scientiae, omnium literarum, omnium linguarum, totius non Europae modò, Viri, vt generis splendore principis. quem vos, cum vnum modò eodem tempore in hoc vniuerso Phoenicem posse esse sciatis; in Bataviâ vestrâ vivere voluistis: vt imperium simul Maris apud vos sit, & Literarum. Pauli praeterea Choarti, Christianissimi Gallorum regis, apud, vos Oratoris, cuius nomen praeterquam quod vobis propemodum sacrum sit, liceat & illud mirari mihi, virum tam Illustrem non de omni eruditione modò iudicare posse, sed & primas in eâ tenere: & Iani Dousae, Senatoris vestri, Curatoris nostri, viri incomparabilis: qui cum de totâ literaturâ iam olim; nuperrimè etiam de patriâ suâ optimè mereri cepit: & tanquam parum sit quod infelici hoc aeuo literas restituit, nupperimè etiam Bataviam suam restaurauit, qui me filij loco semper habuit. Itaque diutius

vel animi grati, vel debiti officij testimonium desyderare vos passus non sum: nec idoneum magis hoc tempore argumentum Patriae vestrae, Vobisque, reperire potui, quam fatalem illum Patriae parentis casum, quem penitus amisissetis, nisi in Filio viueret: Qui vobiscum, tot Illustria Hispanorum capita Dijs Manibus, Paternae necis vltor mactare cepit: quem vt Deus immortalis nunquam in Tragoediâ partes habere permittat, optabo; in reliquis verò parenti simillimum, vel virtute, ver animi magnitudine, sibi, vobis, nobisque conferuet. Ego verò intereà hoc qualecunque committo vobis.

*Nobil. vestrae addictiff. Cliens*

DANIEL HEYNSIVS

## Ἰωσηπ ⏊ Σκαλαν ⏊ ⏊ ουλίου το ⏊ πάνυ Δανι ⏊ λ ⏊ ⏊ ίνσιος ε ⏊ πράττειν

Τὸν Ανάχαρσιν λέγεται, ὦ Διογενές, τὸ πρῶτον ἐκ Σκυθίας Αθήναζε παιδείας ἐπιθυμία τῆς Ἑλληνικῆς ἀφικνούμενον, τῷ Τοξάρει, Σκύθη καὶ αὐτῷ ὄντο καὶ ὁμοεθνεῖ Αθήνησιν ἐς λόγους ἐλθεῖν. Τόνδε, παιδείας τε ἅμα, καὶ θύσεως εὐ ἔχοντα, τᾶλλα δὲ καὶ τῶν Αθηναίων λόγων οὐ παρέργως ἀππομενον, οὐδὲ δυσπρόσοδον ὄντα, ὡς εἰκὸς ἀνδρα τῶν πολλῶν καὶ δημοτικῶν, τῶντε· ἐκεῖ ὀκταπόδων, (τοῦτο γὰρ τοῖς ἀπόροις ἐν Σκύθαις τῶνομα κείσθαι λόγος ἔχει) τὸν ἔρωτα τοῦτον καὶ ζῆλον φίλου ἀνδρὸς, ὃν οὐ πρό πολλοῦ ἦρα καὶ αὐτὸς τὸν Ἑλλάδα ἰδεῖν, οὐδαμῶς ἐν παρέργῳ θέμενον, πολλὰ κατὰ κ' ἀγαθὰ ὑποθέασθαι· οὐ μὴν ἀναδειζόμενον τᾶλλα, οἷς ἐκείνον μάλιστα φιλοφρονούμενος [...]υνίει, εἰπόντα· δὲ μόνον· εἰ ἓνα μὲν, ὦ Φιλότης, τῶν τῆδε ἀνδρῶν φίλον κτήσαιο, εὐ ἴσθι πᾶσαν τὴν Ἑλλάδα οὐ μόνον ἔχων ἐν αὐτῷ, ἀλλὰ καὶ πάντα, τὰ παρ' Ἑλλῆσι θεὰς ἄξια ἰδῶν καὶ ἐμπορευόμενος, καὶ ταῦτα μὴν περὶ τοῦ Σόλωνος ὁ Σκύθης, ὀρθῶς γε λέγων ἐκείος. Εγὼ δὲ, ὅτε τὸ πρῶτον ἐπεδήμησα τῇ πόλει ταύτῃ, σοι κατὰ δαίμονα ἐντυχῶν, μονονουχὶ θεὸς ἐν ἀκαρεῖ χρόνου γεγενημένος ἔδοξα, πλὴν ἀλλὰ καὶ πάντων ὀλιγορήσας, καὶ τῶν πάνυ τοῖς πολλοῖς περιβλέπτων καταγελάσας ἀτεχνῶς, τὸ κεφάλαιον εἰδέναί τῶν τῆδε ἀγαθῶν. Τὸ δὲ νῦν εἶναι, ἐπιείγε τὸν κόθορνον, μείζω ἢ ὥστε νεανία καὶ οἷω ἐμοὶ πρέπειν, περικεῖσθαι κινδυνεύω, ἐν μυριάνδρῳ ἐμαυτὸν θεάτρῳ καθίξας δόξω, εἰ σύγε τὴν δίκαιαν ταύτην ἐπιτετραμμένος, καὶ τὴν τῶν ἄλθων νόμον ἐγχειρισθεῖς, κατὰ τὰ σοι δοκοῦντα τὴν ψῆφον φέροις, οἷς ἂν μόνος συ διαγινώσκεις ἀγαπήσων. οὐ μὴν οὐδ' ἔωλόν τινα ἔφεσιν ἀγωνιοῦμαι, οὐδὲ δικαιολογήσομαι, κἂν κάμαρτων ἀλῶ, οὐδὲ, τὸ τῶν ὑπευθύνων ἐκείνο, λόγον τῶν τετολημμένων ὑφέξομαι· ὥσπερ οὐ πάνυ μοι μέλον, εἰ καὶ εὐτελῆ τινα, καὶ σεμνότητος τραγικῆς ἄξιον, ἢ μεγαλόθρονον ἐνὶ οὐδεν, ἢ μόνον ἦτε ἡλικία ἡμῶν, καὶ τὸ ἡδέως περὶ τὰ τοιαῦτα ἡμᾶς διακεῖσθαι, σοι διὰ σπουδῆς ἦ· οὐ γὰρ τὸν Ευριπίδην ὄλον, ἢ καὶ τὸν τραγωδόν, νῆ τὸν Διόνυσον, τὸν σὸν καταπεπώκαμεν, οὐδὲ τὰ τοῦ Ὀμήρου, κατὰ τὸν Αἰσχύλον, τεμάχη, ἀπὸ στόματος εἴποιμεν, ὥστε ὑποδραματουργεῖν σοι. μάλιστα δὲ τοῦ θάρσους ἡμῖν, τότε τῆς ἀφορμῆς τὸ μέγα, καὶ τὸ τῆς ὑποθέσεως τὸ λαμπρὸν συλλαμβάνεται, καίπερ πολλάκις τῶν ἔργων τοὺς λόγους οἴουστῆποτε ὑπερφθεγγομένων, οὐ γὰρ κατὰ Μηδείας, ἢ Ἐκάβας, ἢ καὶ Ἰαντας νῆ Δία μαστιγοφόρους τὸ πρᾶγμα, ἢ τὰς ἄλλας τερατείας,

καὶ μαγγανείας ποιητικὰς, πάνυ ἀλλόκατα μυθίδια ὄντα, παιδῶν ψυχὰς, ἔτι περὶ τὸ βρῦν καὶ τὸ μαμμῶν σπουδα ζόντων, καὶ τὴν Μορμῶ καὶ τὴν Λαμίαν δεδιότων, ἐκπλήττειν δυνάμενα· περὶ δὲ τῶν ἡμεδαπῶν, τῶντε Αὐρανσίου τοῦ μεγάλου πάλαι πεπραγμένων, καὶ μάλιστα περὶ τῆς τοῦ βιοῦ αὐτοῦ καταστροφῆς πᾶς ὁ λόγος, ὃν καὶ ἐπιγράφεται. Σὺ μὲν οὖν ὀβέλισον τὰ πολλὰ, καὶ καταδίκασον, ὥς οὐκ ἔστιν ὃ, τὸ ἄλλο ποιήσας μᾶλλον χαρίσαιοί μοι: οὐ γοῦν δεόμιην σοῦγε τὸ κωμικὸν τοῦτο, Τῶν ποιωτῶν εἶναι με λέγειν ἑκατὸν σταδίοισιν ἄριστον.

Οὐκ, εἶγε καὶ χύτραις λημῶν τυγχάνοιμι. ὀλεθρίων γὰρ ταῦτα, μόνοιτε ἐλλόγιμοι εἶναι φασκόντων, καὶ σοφόν τι χοῆμα, καὶ ἄκρον ἐν παιδείᾳ γενέσθαι πεπεισμένων. τὰ δ' ἐμὰ μετρίως ἔχει πάντα, καὶ νέος ἔκ κομιδῆ [...] Μούσας ἅμα, καὶ τῆ τούτων ἀδελφῆ τῆ βελτίστη πενία πρὸς φιλοσοφῶ. Σὺ μὲν οὖν οὐκ ἂν φθανοῖς ταῦτα ποιῶν· ἐγὼ δὲ τὴν τραγωδίαν τὴν ἐμὴν ἐκδιδόναι μοι δοκῶ, οὐδεν

δέον ταύτην, ὥσπερ τὴν Ακρισίου, παρθεν εὐεσθαι, καθάπερ ἱερειάν τινα τῆ θεσμοφόρῳ ἀνατρεφομένην, ἀλλὰ κοινόν, φασί, κτήμα γενέασθαι. τί γὰρ ἂν καὶ πάθοι τις, ὅπποταν φίλοι ἄνδρες καὶ εὐδόκιμοι βιάζονται; ἦν γοῦν ἐν δρᾶμα τοῦτο γραψαίμην μόνον, πρὶν τὴν ὑπήνην ἀνέρπειν, περὶ τὸ στόμα τοὺς κροτάφους τε (οὕτω γὰρ [...] ποιητῶν τινος μέμνημαι λέγοντος) τοῦτο προσδοῦ ἐς τὴν παιδείαν ἔσομαι πεπτονηκῶς· ὑπέρευγε ποιῶν τὰ τε ἄλλα, καὶ ὅτι ἐμβαδίων δεόμενος περιπατῶ, μικρὸς ὢν καὶ πηχυαῖος, καὶ ταῦτα μὲν δὴ ταῦτα· ὁ δὲ κάκιστα μισμάτων ἀπολούμενος φθόνος ἐμοῦ ἔνεκα, οἰμωζέτω, μὴδ' ὤραιοισιν ἴκοιτο, τὸ προσωπεῖον, ὁ μεταξὺ τραγωδῶν περιβέβλημαι, μορμολυττόμενος, καὶ γενναίως μὰ[...] Δί' ὑπ' ἐμοῦ ἐκτραγωδοῦμενος. Ἔρρωσο Διογενὲς μοι Ιουλιάδῃ μέγα φέγγος Αχαιῶν· καὶ Βακχεῖον τοῦτον ἄνακτα, σήμερον Διονυσίοις τραγωδοῖς ἀποκηρυττόμενον, ἀποδέχου.

## In Hispanum & Batavum.

Δημοβόρος κόσμου ποτ' ἐέλδετο παντὸς Ἰβηρος  
 Ἰσχανόνων Κελτων, ἰσχανόνων Λιγυρων.  
 Οἶον ἐπάντα φόβησεν· ἐδείδιε πᾶσα δὲ μιν χθῶν  
 Ουρανής ὄσση κεῖται ἐν ἀγκαλίσιν.  
 Φλανδριακοὺς δὲ ἐμόν ἔθνος ἀεικέα μήσατο ἔργα,  
 Οὐδὲ πόνου λήξις πὰρ μίη, οὐδὲ ἀλέη·  
 Παισὶ κακὸν φρονέεσκε καὶ ἀνδράσι ῥέξε δὲ λίκην  
 Νήπια καὶ ἀπαλὰς αἴσυλα παρθενικάς.

Αἶματι δὲ ἡμετέρῳ ἰδίῃ ἐρύθρηγεν ἄρουρα,  
 Πάντα δὲ μὸρμυρεν βένθεα, καὶ ποταμοί.  
 Τοὺς δὲ μετὰ κρατεροῖο καθιππεύεσκε Βαταύους,  
 Νηυσὶν ἀλὸς ταμίην ἦσιν ἐποιοχόμενος.  
 Ωκεανὸς δ' ἐὰ τέκνα σαώσατο, μήδετο δ' ἐυθύς  
 Κύματα δειλαίῳ ἀμφιχέαι Βατάβῳ.  
 Αὐτὰρ ὀβὴ πατέειν διερῶ ποδίνωτα θαλάσσης,  
 Ἐκ δ' ἔριν, ἐκ δ' αἰνοὺς φευγέμεν ἐχθοδοπούς.  
 Ζεύγνυτο δ' ἄρμα θοὸν, ἀνεμοτρεφές, οἷο χαλινοὶ  
 Πείσματα, τοὶ δ' ἵπποι λαίφεα, καὶ ὀθόνοι.  
 Τῷ πίσυνος διὰ πόντον ἐλαυνέμεν ὦρτο καὶ ὕδωρ,  
 ὦρτο δὲ καὶ ταχέων πρόσθε θέειν ἀνέμων.  
 Μὰψ δ' ἀνέμων ταμίησιν Ἰβηρ ἀνεμῶλιος ἔτλη  
 Μαρνάμενος δεινῶ ἀντᾶσαν πολέμῳ.  
 Πολλὰ δὲ τοὺς ἀπέλεθρος Ἀρης ξυνέηκε μάχεσθαι  
 Ὕδατος ἀρχαίης γῆς τ' ἐπὶ κοιρανίης.  
 Κόσμου δ' ἀντιπάλαιο μόνος περιγέντο Βαταυός.  
 Ἀνδρομέης ἦτοι ἐξεφάνη γενεῆς  
 (Φῆς ὕπερ ἐν Πόντῳ, Πόντου δ' ὕπερ ὄρμενος ἐν γῆ)  
 Ἀντίβιος κείνος ἀμφίβιος Βαταβός.

## In Avriacvm Danielis Heinsii.

*Melpomenae sacrum facit Heinsius ore fauete  
Dum quatit Aschyleo pulpita picta pede.  
Cede Sophoclaei carmen regale cothurni,  
Cedite Cecropijs plausa theatra choris.  
Principis ille vicem subitam, strictumque dolosè  
Non expectato fulmen ab hoste canit,  
Et fixum in patriâ, dum figitur in duce, vulnus.  
Hanc tibi nulla dies tollet Ibere notam.  
Grandiloquisque Heynsi numeris, quae dedecus una est  
Mors tibi, Nassovio vita perennis erit.*

Iosephus Scaliger Iulij C.F.



**In eandem.**

GRAECORUM grauitas ab acumine victa Latino est,  
 SCALIGERO in Tragicis Iudice Hypothesibus.  
 Arbitrio cuius vni data palma Poëtae  
 Praetribus Argolicis Vatibus Ausonio.  
 Laus SENECAE haec, cui maiestas, cui spiritus ac vis  
 Cura nitor, cultus, omnia plena DEO.  
 At vetera haec: nostrâ sed tempestate Poëtae  
 Personam Tragici qui ferat, ecquis erit?  
 MVRETVSNE? sed hic quid ad Orgia BVCHANANI?  
 CAESARIS is, IEPHTAE conditor iste suae?  
 AESCHYLEO argumenta vides indicta Cothurno  
 Nec CLITÛS NATO cognita, nec SOPHOCLI.  
 Et dubitas, vtrum antistent mendacia veris?  
 Illane, an haec pluris sint faciunda tibi?  
 Quae tantum ijs, quantùm SALLVSTI pagina ficto  
 LVCI ASINA, aut MARSII praestat AMAZONIDI/  
 At quantum Historijs cedunt Acroâmata, tantum  
 HEINSIADI, cui tota HELLAS, cui poplite flexo.  
 Submittit fasces PINDARVS ipse suos.  
 Materiem quaeris? GVILLELMI hîc funera (Lector)  
 PRINCIPIS Hesperîâ fraude peracta leges.  
 Dúmque leges, aequare rei mirabere Ephebum  
 Pondera Romuleis sic potuisse modis.  
 Forsitan & dicas: Proavito qui Lare pulsus  
 Talia Leidensi scripsit in Exsilio,  
 Quid faciet, Patriae compos si quando futurus?  
 Lux (precor) ô fati sit prior illa meis.  
 Et licet haec addas: Cui tantum indulsit Olympus,

Materiem hanc meritò legerat ipse sibi:  
Nec verbis nec rebus vbi sua pondera desint.  
Ne longum faciam, singula conueniunt.  
VATE suo vt PRINCEPS, dignus sic PRINCIPE VATES  
AVRIACO HEINSIADES, HEINSIADAE AVRIACVS.

IANVS DOVSA NORDOVIX Hagae comitis scripsi.

**Εἰς τὸν Δαν. τοῦ Εἰνσίου Αὐραϊκάρχη.**

Ἔρρετ' Ἰβηρομανεῖς, σφέτερον κακὸν ἀμφαγαπῶντες,  
Δίζυγα δουλοσύνην, σώματος ἡδὲ νόου.  
Ἀμμιν ἀλεξίκακον θεὸς ὤπασεν Ἡρακλῆα,  
Ἠνίοχον γλυκερῆς δέξιον εὐπραγίας,  
Αὐραϊκῆς ἀρχὸν, μέγαν ἰθυνητῆρα Βαταύων,  
Ἰσπανῶν θάμβος, καὶ δέος Αὐσονίων.  
Κεῖνον, ἐλευθερίας ταμίην, καὶ Βελγίδος ἄλκαρ,  
Δισσὸν δουλοσύνης ἄχθος ἀπώσάμενον:  
Μούσαις καὶ χάρισιν πεφιλημένον Ἕνισιος ἔρνος  
Ταῖς δ' ἱεραῖς γέρασεν μνημοσύνης σελίσιν,  
Ἄφθιτον ἀμφιέσας μεγαλήτορος Αὐραϊκάρχου,  
Ἄφθιτον ἀμφιέσας μεγαλήτορος Αὐραϊκάρχου,  
Ζῶσι γὰρ ἐσσομένοισι τ' ἀγάκλυτος ἔσσεται αἰὲν  
Κείνου εὐεργεσίη, Ἕνισίου εὐεπίη.

BONAVENTURA VULCANIUS.

**Idem Bon. Vvlc.**

Τῶν παλαιῶν Σοφόκλης μέγ' ἐπιειροχός ἐστι τραγωδιῶν,  
 Τῶν νυνὶ δ' ἔχαρχος Ἐινσιᾶδης πέλεται.  
 Κείνου πατρίς ἔην τῆς Ἑλλάδος ἑλλὰς Αἰθῆναι,  
 Τοῦτου Φλανδριακῶν Γάνδα πόλις πόλεων.  
 Ἐν τραγικῆς ἀμφοῖν σοφίης κλέος· ἀλλὰ Σοφόκλης  
 Δρέψατο τοῦτο γέρων, Ἐινσιᾶδης δὲ νέος.

**Πρὸς μέγαν τῶν ποιητῶν τραγῶδιων, Δανιηλ ἰνσιον, ἐπίγραμμα.**

Ἐινσι' Ἀραισιόνων ὄτ' αἰίδεος Ἄρχὸν ἀγαυῶν,  
 Σφόδρα προσήκουσάν σοι τιν' ἔχεις πρόφασιν·  
 Ἢ διεξελθῶν τὰ ἐκείνου φαίδιμα ἔργα,  
 Ἢ σφαγὴν κείνου πρὸς μέτρ' ὀδυρόμενος  
 Πάντα λέγεις μετρίως γε (μέτρον δ' ἐνὶ πᾶσιν ἄριστον)  
 Θαμβεῖ, ἀχεί, θρηνεῖ πᾶς ὄγε ταῦτ' ἀναγνούς.  
 Πράγματα δεινά γε μὲν τοῖς σοῖς ὑποκείται ὕμνοις,  
 Ἄλλὰ τεαὶ λέξεις εἰς' ἔτι δεινότεραι·  
 Εἴ ποτε Πυθαγόρα εὖ πάντα τὰ δόγματ' ἔχουσιν,  
 Ἢ ψυχὴ Σενέκης εἰς βίον αὐθις ἔππῃ.

G. CODDAEUS.

## Iambi libertati saevitiae Heynsianae,

*In quibus, praeter alia, quae in hoc, quaeque in Senecae Dramatis  
persone illustres omnes conferuntur.*

QUIS ille tanto PVLPIVM motu quatit,  
Et insolenti tundit ORCHESTRAM pede?  
Quanquam furentem motibus fallax tegit  
PERSONA vultum, Faexque detonantia  
Furatur ora, non lates HEYNSI tamen:  
Te certvs index prodis: augustum jubar  
Dispellit atrae nubilum calignis,  
Centumque noctes luce perrumpit suâ.

At nos parentis vana Terrae pondera  
Frustrâ tenebris in dies victricibus  
Luctamur: omnes ludit incassum labos:  
Vt ille paruus ales abreptum fugâ,  
Et navigantem vasta Inanis aequora  
Sequi parentem sperat, & pennas quatit,  
Aurasque plausu captat affectans iter,  
Strepsitque; tandem pronus in nidum cadit.  
Tu Daedaleis ocior volatibus  
POETA Caeli scindis alatus vias,  
Plebemque, & ipsos plebis obtutus procul  
Post te relinquis. Iam SOPHOCLEN praeteris,  
Iamque EVRIPIDEN fultus alâ remige:  
Sêque author olim triplicis PROMETHEI  
Victum fatetur, quique CASSANDRAM dedit  
Caeco furentem versuum volumine.  
Nec hos, nec omnes caeteros IONICI  
Fastus THEATRI, multa quos nobis dies  
Invidit, aevique impotens iniuria,  
Longè tueri terga fectantes tua

Contentus vltra tendis, & Caelo natus  
 Sublimiori, deque summo vertice  
 Priscum LATINAE despicias SCENAE decus,  
 CHORAGIVMQVE praeter ANNAEI volas.

O CYCNE FLANDER, me simul tecum rape  
 Per candicantis caerulas aethrae vias.  
 Ignava quanquam torpidum moles premit,  
 Et furgere vltra pondere obsessum vetat,  
 Tuâ levatus quolibet dextrâ sequar,  
 Supràque nubes ibo, quas crassus vapor  
 In nos adurget. Diligam SPECTACVLO  
 Propinquiores siderum metae FOROS,  
 Vbi serena semper, & purus dies.

Hic prisca cernam provocantem saecula  
 Prodire nostri temporis TRAGOEDIAM:  
 Non hanc, IEPHTAE quae Triumphales manus  
 Caede immerentis inquinavit filiae,  
 REGISVE mensis ora BAPTISTAE dedit  
 Tacere verum nescia, vt falsum loqui:  
 Sed HEYNSIANAM, nata quae ferò licet  
 Retrò tot annos laude praevortit novâ.  
 Iudex sedebit DOVSA, iudex SCALIGER  
 Haeres paterno destinatus muneri.  
 HEROA nostris hunc, & hunc felix Deus  
 Seruavit annis, justa ne saeclo rudi  
 Nostris deessent VATIBVS praeconia.  
 Vox vna binis: VICTA GANDAE CORDVBA:  
 Applaudit omnis MAXIMI CIRCI CHORVS.

Formae micantem celsioris lumine  
 Miratur ire magnus ALCIDES DEVM,  
 AVRANSIOQUE cedit, (at nulli prius)  
 Dolétque rursus REGIS HISPANI scelus.  
 Incedit alto parte ab Eoâ Poli  
 PRINCEPS COTHVRNO: nam tremit VESPER gradum,  
 Et sentit hostem. Nunquid ATRIDE pudet?  
 Bis quinque TROIA messibus constat tibi:  
 Huic vnus annus plus decem TROIIS dedit:  
 Hoc par, scelestâ fraude quòd victor cadis.  
 Vidit MYCENA per scelus caesum DVCEM,

Vidêre DELPHI. PATRIA ô quanto makes  
 Cruore! non hoc eluat RHENVN nefas,  
 Non MOSA vasto pronus incumbens mari,  
 Non qui propinquus menstruo motu tumens  
 NEPTVNVS agris parcit HOLLANDIS Pater,  
 Seséque arenis arcet, atque hostem salo.  
 Cerno LOISAE SYRMA. Talis HECTORIS  
 Coniunx, parensque, talis ALCMENE fuit  
 AMPHITRYONIS uxor, & prior NVRVS.  
 OENEIS autem casta sanctae Feminae  
 Veretur ora tollere, & vultum simul  
 Formidat omnis, quae sui sexus cohors  
 Transgressa Leges: Noxium AEETAE genus,  
 LEDAEQVE proles, & noverca VIRBII,  
 Materque ORESTIS, & viri Mater sui,  
 Et ipsa IVNO. Stirpis antiquae decus  
 Materna parvum ducit HENRICVM manus.  
 Alludit illi magnus Argivûm metus  
 Futurus HECTOR, Fata si vitam darent:  
 Alludit HYLLVS, & Coronati patris  
 PHOCAEA proles, iam puer PHILISTHENES,  
 iam meta TROIAE PVRRHVS exspectat parem,  
 POEANTIVSQVE. Dira COCYTI vada,  
 Et aestuantes igne permisto lacus  
 HISPANA ERINNYS linquit: humanus sitim  
 Cui sedat vnus sanguis: hoc illi merum est,  
 Haec pôcla MONSTRO. Cerno pro taedis rogos,  
 Cerno secures. Ipsa aspectum foror  
 Horret MEGAERA; defluit flagrum manu,  
 Fugitque tortis anguis implexus comis.  
 At ille magni PARRICIDA PRINCIPIS  
 Pone hîc scelestum perfidus volvit gradum.  
 Fuit THYESTES impiâ factus dape  
 Natis sepulcrum. Segregem THESEVS novâ  
 Castum per agros filium sparsit nece:  
 Patrem cecidit, mistus est Matri OEDIPVS;  
 Sed inscientes: primus hic fibi placet,  
 Gaudétque, quanto nullus erravit, malo.  
 Quicumque, Famae punctus antiquae notâ

Crudelis audis, patruus, Frater, parens,  
 ATREV, nepotes Patris heu dirum genus,  
 AEGISTHE, quique semper arentes aquas,  
 Sempérque captas arboris foetae fugas,  
 Gaudete: vestra maius absolvit scelus.  
 Inuentus hic est, cujus vnus PATRIAM  
 Trajecit ictus. Quis, Dij, tantum nefas  
 Ausus jubere! Non LYCVS: Neuter CREON:  
 Non hoc VLYSSES saeuus in parvos quoque,  
 Et in puellas: ipse nec fluxâ fide  
 Amans IASON: AVREI sed VELLERIS  
 Possessor alter. nec tua hoc, CALCHA, licet  
 Cruenta semper praecinunt Oracula,  
 Senéxque aruspex, caecus aut MANTO monet:  
 Sed qui superbus RVPE TARPEIA sedet,  
 Et è QVIRITVM COLLIBUS SEPTEM tonat.  
 Vidésne? pulcram rasa LIBERTAS comam,  
 Et PILEATA, turpe proculcat jugum.  
 Sed pectus, eheu, SAVCIVM vulnus gerit  
 Quod antè PRINCPS. PATRIAE raptum PATREM  
 Seséque luget. Ora commendat dolor,  
 Decétque luctus. EVRYTVM sic Filia  
 Cum lacrimaret, & Parentales Rogos,  
 Sibique lapsum patrij Regni decus;  
 Sic cum doleret vera se quondam nimis  
 Cantâsse PHAEBAS, staret & jam Troïcas  
 Supra ruinas, & cadaver Regium;  
 Tamen placebant. Talis ELECTRE fuit  
 Caeso parente. Nata talis OEDIPI  
 Caeco parente. Siquis est sensus super,  
 Curis nec VMBRAS exuit Mortalibus  
 Donata DIVIS MANIBUS Felicitas,  
 Restátque, quòd non atra LETHE sorbeat,  
 SALVE BATAVIS Ductor AVRANSI tuis  
 VLTORÉ NATO, VATE FELIX HEINSIO.

H. Grotius. I. C.

**In eandem.**

*Effeatâ vegetum sibi cor superasse senectâ  
Saltato Sophocles arguit Oedipode.  
At vegetae sibi cor canum anticipare juuentae  
Saltato docuit Heinsius Auraico.  
Heroïs tragico dùm magni fata cothurno  
Aptat, & Orchestrae refricat attonitae.  
Fortia facta virûm aut aut crudelia dicere fata  
Ausus maturi, sed tamen est juuenis.  
Ast actum rebus dare, res aequare cothurno  
Ausus maturi, at solius ille senis.  
Perge annos Heinsi ingenio, spem vincere coeptis,  
Nisu te, nisus strenuitate moras.  
Perge inquam ignave post scenia spernere vitae,  
Faustae spectatus cùm fremitu caveae.*

Iacobus Gruterus.



## A monsieur De Heins *Sur sa Tragedie.*

### Stances.

PArmy tant de soleils d'ont l'Immortelle flamme  
Pour avoir trop de lustre offence mes deux yeux,  
Ozeray-ie eslever les glaces de mon ame  
En forçant la nature enter la terre aux Cieux!

*De Heins* il suffiroit que ta gloire suivie  
De ces perfections vint arrester mes pas  
Sans qu'vn si grand ozer pour finir mon envie,  
Me sit voler si haut, pour retomber si bas.

Ce miracle du Ciel qui trop grand tirannise  
L'orgueil des beaux esprits, forcez de l'adorer\*  
Non, ie ne le puis voir, que mon ame surprise  
Au cours de mille effrois ne se laisse emporter.

Pourray-ie voir aussy l'honneur de la *Hollande*\*  
Sans avoir de cent peurs mes esprits agitez  
Et ce ieune flambeau d'ont la gloire est si grande,\*  
Et dontia l'Orient l'ance tant de clartez!

Mais le fort est iexté vne perte honorable  
Au moins courronera vn superbe vouloir,  
C'est vivre que mourir d'vne mort agreable,  
Et puis vn bel envy vaut mieux qu'vn bas pouvoir.

Ie veux comme ie peux, *o Soleil, o bel Astre*  
Qu'vne langue *Françoise* esclate ton honneur

\* *Scaliger.*  
\* *Dousa.*  
\* *Grotius.*

Et bien si ton merite enfante mon desastre,  
Pour vm si beau subiect i'aimeray mon malheur.

Qu'on ne me parle plus de ceste bande *Grecque*  
D'vn *Sophocle*, *Euripide*, & tant de grands esprits,  
Qu'on ne m'allegue plus le tragique *Senecque*  
Et ceux-la dont le temps a mangé les escrits.

*De Heins* les va biffant, en son ame incognüe  
Pour son stile empoulé, ne se suit que des yeux  
Ces antiques cerveaux rampent dedans la Nüe  
Au lieu que de son front il va toucher les Cieux.

Ses mouvemens choisis tiennent sous leur empire  
Le plus determiné de nos plus beaux desirs.  
En nostre ame emportee au flot de son bien dire  
Fait lascher quand & luy, des larmes & des soupirs.

Lors que triste il despeint la *Liberté bleßée*  
Par le perfide bras, qui meritoit cent Croix:  
O Dieu combien nostre ame est doucement percée  
Par le charme plaintif, de sa divine voix!

Il semble que ie voy vne *Femme* mi-morte  
Qui iette de martire vne sueur de sang,  
Vne vivante *Mort* que la douleur emporte  
Et qui tient vn *Enfer* attaché à son flanc:

Quand rouge de courroux de la gent *Espagnolle*,  
Il va les cruautez exprimant brusquement,  
Vne rude *Furie* à nostre ame s'envole  
Qui la transforme en ce, qu'elle soit iustement.

Il semble que ie voy vn supplice vnerage,  
Vne fiere *Enyon* qui se paist de sanglots:  
Vn perfide *Affronteur*, qui au lieu de courage,  
Loge la trahison au milieu de ses os.

Heureuse mille fois ô *Belgique Province*,  
De voir par vn *Achille* vn si grand tort vengé,  
Et pour eterniser la valeur de ce *Prince*  
Le voir d'vn autre *Homere* encore loüangé.

Comme l'vn en exploicts est vn *Foudre* de guerre,  
Qui peut mesme avec *Mars* debatre le *Laurier*,  
L'autre qui ne cognoit de pareil en la *Terre*  
Va desia dans le *Ciel* paroistre le premier.

Belle ame que le Ciel d'vne douce influence,  
Anima de grandeur, on void par cest escrit  
Qu'vn si galand *Esprit* n'est rien que *'Eloquence*  
Et *'Eloquence* rien, qu'vn si galand *Esprit*.

Mais d'autant que ie sçay qu'vne chose divine,  
Se conçoit beaucoup mieux qu'elle ne se despeint,  
*De Heins* pour l'admirer il faut que ie termine,  
Le fil de mon discours, d'vn extaze non feint.

*D. de Licques.*

## Amico lectori.

CONSTITVERAMVS, amice lector, Tragoediae nostrae ea, quae tam de Graeco, quam Latina caractere Tragico satis prolixè notaveramus praefigere: quae nunc secundae editioni reseruamus: in quâ, ex amicorum consilio, quaedam explicabimus, quorundam etiam, in quibus Hellenismi vestigia premimus, rationem reddemus. Nunc properamus. Tu vero his fave, ac reliqua, quae in Graecos autores, notanimus expecta. Hac certè aetate, quae lubrica est, ab his exordiri placuit. & vt alibi lusimus;

Ἡ μὰν ἄριστός ἐστ βουλευτῆς χρόνος,  
 Ἰέρων δικαστῆς, πολλά νοουθετῶν ἀεὶ  
 Ὅστις τελείω δὴν ὑπεζύγη πόνω.

Praeterea est quod te velim: si quis malit distinctiones scenarum, quas hic praeter morem adhibitas videt, praetermittere, nobis haud inuitis id faciet. Hic autem id factum est, quod sciamus: non omnia illa τμήματα inter Actus, scenae vicem obtinere posse. ἀλλά τι ηὶ ἐν τῇ τραγωδίᾳ τῶν τῆς ἀρχαίας κομωδίας παραβάσεων τάξιν ἔχειν aliquâ ex part. Graeci autem ne maiores quidem distinctiones notare amant. Liberum hoc ergo est Pag. 20. qui volet pro *tabum tabem* legat: nos non ita temerè Seruio credimus, nec putamus vetitum esse τῇ εὐθείᾳ vti, ἀπιατικῇ, nihil enim certi afferunt γραμματικῶν παιδες: nam vt ille δίπτωτον, sic autor Glossarij veteris μονόπτωτον esse vult, & modo *tabo* λύθρω exponit, & ἄιματι νεκροῦ, modo *tabo* (vbi *tabum*, legendum fortasse) λύθρος, ἄιμα νεκροῦ. At haec sunt ἐπιπολάζουσαι λόγων ἔρειδες. Pag. 21 primam in *Iberi* contra morem meum producere malui, quam à sensu recedere: quod cum tam Graecis quam Latinis poëtis in appellatiuis liceat, in proprijs mihi licere putavi: quod si quis aliud malit, substituat vel *illius*, vel *Hispani*, modo nobis nostrum permittat. Haec moneo, ne quis nobis inscijs id factum existimet. Sed Haec leuia sunt, καὶ οὐδενόσωρα. Sequitur grauius. Absoluto hoc opere admonitus sum ab amicis, quosdam mirari, cur in Tragoediâ meâ partes potius comiti Henrico, quam Serenissimo Principi nostro Mauricio dederim: ego primo non respondi, sed risi imperitiam hominum, donec audivi quosdam etiam grauios esse, quos haec cura coquat. quibus verbo vno & altero rationem reddam: In laudes Magni illius Principis effusum hoc ipso opere me fuisse videbit, quicumque praefationem meam Heroicam, quam huic operi praefixi inspicere dignabitur, vt deinceps facturum sum, *dum spiritus hos reget artus*. Atqui, dicent illi, cur ibi potius quam in cothurno. Audite, & credite. Existimavi ego in re tam recenti mentiendum non esse: atqui Serenissimum Principem tum temporis absentem fuisse scimus: secundò Tragoedia ea tantum (quod multos ignorare scio, atque hinc illae lachrymae) quae aliquot horis gesta sunt complectitur, nunquam vltra diem extenditur, quod multi doctissimi viri hoc tempore neglexerunt, etiam apud antiquos nonnulli, quos tutius reprehendere licet quam imitari. Cum tam brevis igitur hic sit periodus, & (vt hac voce ita vtar) pericoma, quis locus est absentis? Quod si aliquis aliter arbitretur, ad doctiores provoco, quibuscum hac de re multum egi, vt testabuntur cum alij multi, tum Magnus Heros noster, Clarissimus Bertius qui actioni huius Tragoediae primae praefuit, καὶ ὁ θαυμάσιος

Grotius. Quod si illi tationibus vicerint, ostendam me non Tragoedias modo scribere posso, sed & διασκευάς, vel verius ex Heinsio Simonides fiam. Non negabunt etiam πάθος in Tragoedia maius infantem mouere quam iuuenem aut adolescentem. Ne autem quis pertinaciae me accuset, introducemus, cum publicè haec Tragoedia nostra Lugduni Batavorum repraesentabitur, personam magni illius Vindicis nostri & loco vt putamus satis idoneo, magis tamen ex iussu eorum quam primo instituto nostro. Quod si placeat non verebimur etiam ea cum reliquis edere, vt appareat tanquam θεός ἀπὸ μηχανῆς. Atque ita in hac tempestate magnos illos διοσκούρους coniungemus.

### **Menda typographica ab operis commissa sic emenda Lector:**

In epist. Graeca punctum ante, καὶ ταῦτα μὲν, Pag. 18 Vers 7. *compos*, *ibidem*. penult. *ipsa* p. 25. v. 22. pro PR. Lois. p. 38. v. 19. *seculum*. p. 46. v. 9. *luctu* p. 49. 4. 17. *turbidâque aspergine* p. 54. p. 52. v. 13. *hic*. v. l. *ignare*. *ibid.* v. 5. *vinculo*. p. 56 v. 14. *suffundus*. p. 62. v. 6 pro Av. scribe. AL.

p. 65. v. 16. pro Av. pone Nv. *ibid.* 20. v. *illud*. p. 70. v. 26. pro Lois. sic. p. 78. v. 27. *gemimus* p. 80. v. 10. *reddidit*. p. 81. v. 5 *purum* p. 84. v. 10. *aditum*. p. 85 οὐμὰ Δί' p. 86. dele punctum post *ege*. Sic. pag. 58. *ξυλοκόποι*. & *ξύλαθ'*.

### **Monendus item de mendis commissis in iambis**

Pag. 90 Vers. 2. *consessus*. v. 18. *inter*. p. 103. v. 19 *Coloniamque*. p. 104. θεός ἐμι v. 31. *hyeme*. *ibid.* v. vlt. *inideres*. p. 107. v. 12. *Graecum*. *ibid.* v. 16. οἷς. p. 108. v. 20. *Venus*. *ibid.* v. 26. *sine*. p. III. v. 24. *gemmata*. p. 112. v. 13. *iuuentae*. p. 119. *Aeschyleas*. p. I. v. 6. d a. in eleg. Dousae. p. 234. v. 12. *Principe*.

*Amice lector, haec notavimus, quaedam minuta scientes praetermissimus: quaedam etiam fortasse inscij, quae humanitati tuae committimus: quod vereor ne factum sit eò magis, quod Typographus noster ad haec homine mercenario vsus sit, & ὅλης τῆς τυπογραφικῆς πραγματείας ἀπείρως ἔχοντι, maxime vero Graecorum, ac praesertim accentuum: vnde fortasse videbis alibi τις & τί, pro τις & τί. item ὡς & similes ineptias, quas tute facile emendabis. nec enim haec tanti sunt vt moneantur.* Sic pag. 45. v. 12. punctum tolle post *satis* & *alibi*.

**P. Scriverii*****In Avriacvm Danielis Heinsii splendidißimi sibique jucundißimi******Poëtae******Elegia.***

ITe procul Curae, durum genus, ite Labores,  
 Non mea nunc vestrâ compede crira sonent.  
 Ille ego jam tandem meus à Praetore recessi,  
 Et data sunt Musis otia laeta meis:  
 Mitior adfulsit nobis Deus. ïlicèt omnis  
 Turba puellari non satis aequa choro.  
 Illicèt. ad vetereis en me juvat ire Sororeis,  
 En juvat in lusus & mea sacra vehi.  
 Non tamen ut Volusî referam delitia nostri,  
 Sive adeò fastus, Brassica vane, tuos.  
 Non tanti pascale pecus, non Hispo Tragûrus,  
 Ad stomachum Crambe nec facit ista meum.  
 Me meus ad parteis vocat Heinsius, illa piorum  
 Delicies hominum; deliciesque Deûm.  
 Illius (ô Musae) liber ad sua cornua venit,  
 Purpureoque omni lumine parte nitet.  
 O quis nunc turpi possit torpere veterno,  
 O quis nunc tacitas possit habere fideis?  
 Non ego, qui nulli faveam magis. ite Vacerrae.  
 Heinsius est solus, qui mihi carmen erit.  
 Quem modò quem parvo versare Crepundia nisu  
 Vidimus, & planum sollicitare pedem:  
 Insurgit Tragicis evinctus crura Cothurnis,  
 Aeschyleumque aequo pondere Syrma trahit.  
 Non tamen hic Epulas Tereî, non saeua Thyestis  
 Fercula, non Bacchas, non Athamanta sonat,  
 Non Scyllas: non quae docuit ludibria vanus  
 Ennius, aut Ennî, vanus & ipse, Nepos.

Longè alia, ô, nostris iuvat exhibuisse Thëatris,  
 Digna vel Orchestrîs, magne Quirini, tuis.  
 Ingenteis canit ille Animos, dominosque Batavos  
 Aligero secum tollit in astra gradu.  
 Semideumque Heröa canit, feliciter; unum  
 Triste, quòd Hispanos detegat ille dolos.  
 Triste, quòd in Scurram pugnet pius. ô Dolor! ô Dî!  
 Quàm scelus hoc ipsi non licuisse velim!  
 Viveret Auriacus, Patriae Pater: optimus Heros  
 Viveret, & felix Belgia tota foret.  
 Belgia iam longis belli concussa ruinis,  
 Belgia, quae belli nîl, velut antè, gerit.  
 Vota sed haec tantùm. fuit, ah, fuit! îlicèt. ah! ah!  
 Quo servata fuit Belgia, pulsus Iber;  
 Vixit. At, ô Cives, quid eum vixisse dolemus?  
 En quo iam primùm vivere possit habet.  
 Heinsiadem dico. quo nullus acutior umquam,  
 Quo gravior nullus splendorque fuit.  
 Credite. non soli numeros miramur Ephebi,  
 Et juvenem tanto posse tumore loqui.  
 Iuliades stupet ipse, stupet gravis ille Senator  
 Noster Hiantéae Dousa sititor aquae.  
 Iure bono: mala multa mali perpessus Iberi,  
 Exemplum Tragici iam puer exsul erat.  
 Caspari procul ite leves, procul ite Gameri;  
 Non facit ad Vatem pagina vestra meum.  
 Cedite ieiuni scriptores, cedite blenni:  
 Scîlicèt, huïc palmas Grotius ipse tulit.  
 Provocet antiquas haec una Tragoedia chartas,  
 Quas modò cumque Hellas, Romaque dives habet.  
 Sed nunc erubui de tanto divere Vate,  
 Cùm mihi tàm parvus perstet in ore sonus.

## [Auriacus]

### Daniel Heinsivs pro Avriaco sva.

AVRIACI cineres, de bellatrixque tyrannûm  
 NASSOVIVM stirps magna deûm. Tuque aequa parenti  
 Progenies immensa tuo; seu fulgida caeli  
 Metiris spatia, aut aequalem in pulvere circum  
 Aemulus Euclidae veteris deducis, & astra  
 Igneaque aurati percurris lumina mundi,  
 Tranquillae leve pacis opus; seu fervidus inter  
 Tympanaque fremitusque virûm provectus, Eoâ  
 Purpureus galeâ, & niveis conspectus in armis  
 Spumantem pertundis equum, dum vertice summe  
 Nutat apex, tremulique adverso flamine coni  
 Cristaque turbato circum tremit horrida vento,  
 MAVORTI dux nate tuo; seu sulphure & atro  
 Terribilem Iovis igne manum, flammataque coeli  
 Nubila, & ardentus sonitus imitaris Olympi,  
 Immensumque novo perterres fulmine mundum  
 Oceanis terraeque potens, vindexque parenti  
 Tandem nate tuo, tumulique exactor & umbrae  
 Ingentisque animae. Tuque indignatus Iberum  
 Aequoreae regnator aquae, magnoque QVIRITI  
 Acta per aequae vos confundens nomina fastos  
 Aeterni comes imperij, consorsque laborum  
 Tum quoque, cum rerum dominum, ingentesque secures  
 Victaque Romanas tremuit GERMANIA virgas,  
 O BATAVE immensi maris accola, divitis vndae  
 Vasticies, regum metus. O qui turgida Ponti  
 Inter, & horrentes hybernis motibus Haedos  
 Montesque, fluctusque, & caeruleam AMPHITRITEN  
 Prodigus humentes vitae moderaris habenas,  
 Veliferumque levi volitantem flamine currum  
 Aeolios inter fremitus, atque horrida monstra  
 TRITONASQUE vagos, tempestatumque furores,



*Et concurrentes diverso è carcere fratres*  
 HIPPODAMAE genus indomitum, Boreamque Notumque  
 Oceano mirante vehis, postremaque THULES  
 MEMNONIAMQUE domum, & magni Titanis egentem  
 Praetergreßus hunium, multumque errantis IACCHI  
 AMPHITRYONIADAEQUE extremo in littore metas;  
 Huc agetum spectator ades: dum ingentibus ausis  
 Ignauam calcamus humum, audacesque iuventa  
 Tollimur, & priscos vaga mens se tollit in Actus,  
 Horridaque ingenti percurrit pulpita socco,  
 Et thyrsos percussa venit: qua nobilis ante  
 Mens GROTI divina mei, quae corpore parvo  
 Cincta, per immensas rerum diffunditur oras  
 Causarumque vias, diu interclusa tenebris  
 Dirigit ardenti BATAVUM vestigia passu:  
 Orchestræque invectus eo. quo tigride raptum  
 Pampinea trahis artonitum per nubila pectus  
 Magne MIMALLONIDVM genitor? date vela BATAVI  
 Surgenti date vela. feror feror. Ebrius Evan  
 Semivira cinctus choreâ, & bacchantibus Euae,  
 Et madido Satyrûm gemitu, & nutante Sileno  
 Signa movet, motusque animi ferit, imaque cordis  
 Excutit, & totum distillat ab aethere NONNVN.  
 Cernitis? immenso trepidant proscenia motu  
 Sub pedibusque exultas humus: (spectate BATAVI)  
 NASSOVIVS dux magnus adest, ac lumina caelo  
 Tollit, & ingentem defigit in aëre vultum:  
 Non fraudes mens alta pavet, non fata necemque,  
 Degeneremue herosa dolum. Non invidet hosti  
 Fallere posse suo: soli hoc concedit IBERO.  
 O fatum! ô crudele nefas! fors improba! CUNCTAS  
 ADMITTIT FORTVNA MANVS. NON ABNVIT VLLI  
 ANGVSTVM EST VIRTVTIS ITER. Mauortius ille  
 Ardor, & augusti vis pectoris; ille tot ante  
 Exuvijs, titulisque ducum sublimis; ab hoste  
 Vulnere qui pulchro meruit confossus, & icta

*Cadi posse fuo, (superi & crudelia fata)*  
*Latroni seruandus erat! patriaue ruinam*  
*Duxit, & ingenti tremefacta BATAVIA motu*  
*Externas inuicta manus, SICVLVMQVE tyrannum*  
*Horruit, & sero venturum è littore regem.*  
*Cernitis ardentem piceâ fuligine taedam*  
*Foeminosque habitus, & tetrae virginis ora*  
*Sanguine fumantis calido, & serpentibus hydris*  
*Colla per horrentesque comas? prorumpit Erinnyis,*  
*Alteraque ALECTO Siculis emergit ab oris.*  
*Est ne aliquid supra, stridentia colla Megaerae*  
*Tisiphonenque Dei! quod nec Iouis ille ferarum*  
*Immitis domitor, genitorûe PALAEMONIS olim*  
*Horruit, aut Diris vltricibus actus ORESTES*  
*Per scenas DANAVMQVE choros? Nec GRAECIA nempe*  
*In FVRIAS satis vna fuit. Maiora BATAVI*  
*Vidimus, & toto pelagi seclusimus aestu:*  
*Cernitis indigno perfossum vulnere pectus,*  
*Oraque torpentesque genas? En nobilis atro*  
*Sanguine suffusa est Divae morientis imago:*  
*LIBERTAS iacet, ite viri: complexaque funus*  
*Magnanimumque heroa tenet, gemituque BATAVAM*  
*Cum domino conclamat humum trepidumque LEONEM*  
*Deserit, & nostris properat vestigia terris.*  
*Quo gressum quo Diva moves? adeone Deabus*  
*Venturi mens caeca sua est? Necdum altera rerum*  
*Argumenta tamen, necdum exultantia campis*  
*Agmina, victricesque AQVILAS, natumque tonantem*  
*Circum castra vides? Quantum tibi restat IBERE*  
*Sanguinis! immensam FRISIORVM è littore nubem*  
*Et coniuratum video descendere GELDRVM,*  
*MATTIACVMQVE vndae domitorem, altique BATAVVM*  
*Contemptorem animi. Pater ipse è littore NEREVS*  
*Ingentes populis animos & corda ministrat,*  
*Illum indignantem multùm, multoque furore*  
*Indomitum, totumque in littus cogere PONTVM*

*Et vastam spumantis aquae sustollere molens  
Aspiceres; undae auderet quod credere VESPER  
Et Siculas frustra BATAVIS immittere puppes.*

*O animi, ô proles NEPTVNIA, nataque rebus  
Pectora; Tempus erit (me si vis inelyta fandi  
Surripiat cinerique meo, & mortalibus umbris,  
Fatalesque colos extra, atque ignobile lethum  
Constituat tumuli ignarum & caliginis atrae)  
Quo clades THVRNOVDA tuas, lethumque PHILIPPI  
Nobile, & EOI perruptas littoris oras  
Expeditam ingentis voti reus, armaque & enses  
NASSOVIOS: iuxtaque aeterni nominis HVGO  
Ibit & ereptum patriae donabit ERASMVM.  
Illi junctus ego (si quid tamen, haec quoque si quid  
Carmina venturis valeant promittere saeculis)  
Illi iunctus ego, motusque animosque virorum  
Armaque, fortunasque, & rerum ingentia cepta  
Per populos, urbesque feram, magnique THVANI  
Limina, & extremam CELTAE properabimus oram,  
Et fines Ligurum, & praedivitis ostia RHENI.*

*Interea Heroës patrij, Tuque arbiter horum  
CAESARIS invicti stirps, AENEADVMQVE ruinis  
Et sortis rabie, & crudelibus altior annis  
Regnorumque minis; Pater ô pater annue, ceptis  
IVLIADAE dux magne meis, caveaeque Senator  
Incipe cessanti fremitus indicere turbae,  
Ambiguosque ciere foros, vulgique tuentis  
Per cuneos latè geminandas ducere voces.  
Ipse ego pacatae folijs evinctus Olivae  
Sacra feram, Heroasque tuos, & magna ciebo  
Nomina, VERONAEQVE deos, Manesque parentes,  
CAESAREOQVE aeterna feram solennia busto.  
Tu quoque tu, cui fata virûm, multumque labantem  
Victuris patriam fas est committere chartis,  
BOISOTI pars magna tui, quo praestite nobis  
Inclyta LVGDVNVM domitum defendit Iberum.*

*Fas sit, fas sit DOVSA mihi; tam grandibus atras  
 Praesidijs nebulas, sit caligantia fati  
 Pondera, & umbrosae tenebras perrumpere terra,  
 Sordentesque hominum curas, vique alite mentis  
 Aethera vicinum legere, & sublimia rerum,  
 Inque SOPHOCLAEAS animum demittere Musas.*

*At tu ingens anima, & nostris innixa cothurnis  
 Tendis ovans per inane, soloque emissus, Ibero  
 Terribilis spolio, & Mauris indutus opimis  
 Immensum moliris iter, quaque aëra latè  
 Tundis & heroo praevertis nubila passu  
 Auratique fores premis aetheris; omnis ab alto  
 Cedit IBER, umbramque tuam tremit, ipsaque late  
 Flammea turbato subsidunt sydera vultu.  
 Sis felix, natumque diu securus ab alto  
 Barbaricas cernas poscentem in praelia turmas,  
 Et patrios multo pacantem sanguine Manes.*

## Personae tragoediae

AURIACVS.

INQVISITIO.

TISIPHONE.

ALECTO.

MEGAERA.

LOYSA.

SENEA

SICARIVS.

PRAEFECTVS.

NVTRIX.

ARMIGER.

CHORVS SATELLITVM.

LIBERTAS SAUCIA.

Κωφὰ πρόσωπα sunt Satellites qui personam Principis stipant, Famuli qui infantem Comitem adducunt, & Gerula quae eundem gestat. nam reliqua Dramatis repraesentatio, καὶ τὸ πρέπον ostendet. talia sunt & τὰ νοητὰ quae Actu secundo inducuntur, quorum habitus facillime ex pictorum modernorum tabulis, aut antiquorum numismatis partim; partim inscriptionibus, & symbolis cognoscetur. CHORI priores duo Flandrorum profugorum sunt; posteriores Batavorum ἐνδημούντων; viriles omnes.

**Actvs primvs.**

*PRINCEPS AVRIACVS.*

**R**Erum beate rector, & magni parens  
 NATVRA mundi: Vitaque, & Lex omnium  
 In se fluentes quae trahis rerum vices,  
 locoque mani ludis humanum genus,  
 Lateque fusi sancta maiestas poli.  
 Et tu numorum sacra mater ignium  
 Nox, quae diei lucidam premis facem,  
 Silentiumque rebus indis, & polo  
 Faces perennes, languidosque syderum  
 Donas recursus, Hesperasque lampadas,  
 Crbesque magnos igne deducis vago:  
 Usamque nunquam vultibus PHOEBEN suis  
 Pro fratre reddis aurei ducem chori.  
 Ergon' caduca nata gens mortalium  
 Brevis fugacem currere aetatis viam,  
 Inter minaceis intonantis impetus  
 Fortunae, & atras sortis infestae manus  
 Lususque rerum? labitur velox dies  
 Ipsisque ab annis mensibusque ducimur,  
 Fatigue summam pervenimus orbitam:  
 Denascimurque semper, & finem suum  
 Breves citato provocant anni gradu.  
 At igneae lux alta mentis, & vigor,  
 Scintillaque acres pectoris tundens fores,

*Et ille tardi spiritus dux corporis  
Aeternitatis inclytam affectat viam:  
Coelemque lambit, motibus aue ingens novis  
Sese lacessens impetu emergit suo,  
Terramque supra fertur, & quicquid videt  
Mortale ducit, terminosque transilit  
Metasque rerum, corporisque odit moras:  
Lethumque calcat, propriumque ad aethera  
Ignarus atrâ corporis premi lue  
Exultat, emicatque, nec sese capit.  
Pars illa nostri est; caetera, ipsa quae dedit  
Tellus reposcit, iureque exigit suo  
Sese prementem corporis foedi struem,  
Onusque mentis. Magnus hinc rerum parens  
Coeli micantem fornice aurato domum  
Et hinc & inde fudit, altaque atria  
Discriminata gemmeo astrorum choro  
Spectanda late vultibus nostris dedit:  
Vt illa magni purior lux pectoris  
Infixa terrae sit licet, terram premat  
Coelumque cernat semper, & sese erigat.  
Hinc illa dia laudis emergit sitis,  
Ardorque honorum semper in maius ruens,  
Comes ducumque, principumque; quos procul  
Supraque rerum culmen evexit favor,  
Et annuentis blanda Fortunae manus  
In alta duxit. Belgia his cervicibus  
Inclinat, incubatque, & invitum trahit*

*Sege laborum vasta, patriaeque onus  
 Fluctusque nostrae: Sancta libertas vocat,  
 Et servitutis faeda detrectat iuga  
 Mens nata magnis; nec sibi; sed omnibus  
 Quosunque regis insolens premit tumor,  
 'Comesque rebus prosperis ferocia.'  
 Sic divus ille fascium dux & parens  
 Autorque quondam Brutus, & magni patres  
 Togata turba, Martis aeternum genus,  
 Diu labantem fulciere regiam  
 Sanctae nepotes Iliae: sic & ferox  
 Aristogiton, faustaque Harmodii manus  
 Caelo superbum prospere eduxit pedem.  
 Eundum, eundum est. Haud capit motus leveis  
 NASSOVIORUM sanguis, & vanas moras,  
 Periculorum provocator, & sui.  
 O cor, tibine vincula, & ludos ferox  
 Impune nectat hostis, & collum premat  
 Tagi tyrannus, aureo exultans vado,  
 Opumque nixus robore ingenti? licet  
 Soloque Pontum iungat, & caelo mare:  
 Terramque circa spumea eructans vada  
 Ille aestuantis caerulus regni pater  
 In nos resurgat: orbe concusso licet  
 Vtroque ab axe turbidus caeli fragor,  
 Atlasque latè pondere excusso tremens  
 Viam recuse; ibimus tamen; neque  
 'Servire nostrum est. Regiâ tendens viâ*



*In dura virtus sponte prorumpit; Neque  
 Cedens prementi subtrahit collum deo:  
 Seseque fato semper opponit suo  
 Vis alta mentis.' Nec tamen primordia  
 Nunc prima restant: lacta sunt fundamina  
 Bellique magna prosperi praeludia,  
 Motusque vasti. Dexteram hanc ter inclytus  
 Novit Philippus, Albaque; & si quod ferox  
 Saevumque pectus arbiter lucis vagae  
 Phaebus, comantem respicit condens facem:  
 Haec Hydra nostra est. surgit in laudes meas  
 Faecunda rerum messis, & manum vocat,  
 Virumque poscit. tremuit Alceiden fera;  
 At nos ferarum victor. est & aspera  
 Nobis noverca, premere quae excelsas solet  
 Fortuna mentes, impetusque: sed tamen  
 'Virtute sortem qui sapit pessundabit.  
 Heramque inanem pectori subdet suo,  
 Ausisquem magnis, strennuaque adorea  
 Premet superbam casuum potentiam.  
 Speique vana blandioris praemia,  
 Dolosque & artes, vimque pellacis deae  
 Quae incerta semper sponte promittit sua,  
 Pectusque frustra credula strictum tenet  
 Lubens recidet, & bonis praesentibus  
 Ventura ducet; ipse Fortunae parens.'  
 Nec ansa multi defuit periculi,  
 Eurysthæusque nomini incumbit meo,*

*Et solus auget, perfidâque Iber manu  
 Prodest nocendo. Caetera haud quiquam moror,  
 De me triumphum primus ingentem tuli:  
 Idemque victor solus, & victus fui:  
 Motusque vanos pectoris molem mei,  
 AEstusque, & iras, impetusque subdidi  
 Deo, mihi que. Latius virtus nequit  
 Efferre gressus. Omnium victor fui  
 Meique. Testor nobile heroum genus  
 Nostrorum, & ausus, sanguinemque & inclytas  
 Vmbras meorum, santiora nomina:  
 Et vos Batavûm semper invictas manus:  
 Et te Batavae magne virtutis parens  
 Ductorque Nereu; caeruleo qui gurgite  
 Spumantibusque semper exundans vadis  
 Lubens Ibero caeruleam opponis viam;  
 Victostrarum primus hic gradus fuit,  
 'Vicisse memet. Regna namque, sceptraque,  
 Mirarierque cuncta quae vulgus solet  
 Regesque; sortis blandientis alea est,  
 Caßumque nomen; larva magnarum modò,  
 Et umbra rerum, principum crepundia,  
 Ducumque. Prima haec cura virtutis; neque  
 Vincendus hosti est qui sibi prius fuit.'  
 Vincique posse sponte praeripuit sibi;  
 Ne restet ulli: consilique pondere  
 Lascivientem saepius pressi manum  
 Ardore Martis: impetusque mobiles*

*Sese solutis efferentes vinculis  
 In se reduxi: turgidosque spiritus  
 Et has superbas regii ardoris notas  
 Virtute strinxi. 'Principum hinc mentes calor  
 In prona ducit, visque feruentes ciet  
 Et ira motus: fraena sed magis sua  
 Et acriorem poscit hic legem furor.'  
 Sic aestuantus peruagator Africae  
 Venator olim, feruidum venabulo  
 Premens leonem victor intentat minas  
 Libys, feramque versat, & tergum ferox  
 Quatit, feritque, deprimitque: olli fremens  
 Spumas ab imo pectore eructat dolor,  
 Seseque tollit, bilis haud capax suae,  
 Scintillaque ardens lumine absistit vago,  
 lubaeque moto corpore erectae tremunt:  
 Venabulumque mandit, & superbus it  
 Et huc & illhuc vinculi ignarus sui.  
 At ille contrà pastor, insultans procul  
 Feram lacessit; illa sese; & ingruit.  
 Iraque certat alter; alter ictibus  
 Potentiorque cedit invitus licet,  
 Captumque tandem sentit, & sese leo  
 Summittit hosti. Mentis illa regiae  
 Imago viva est. Surgit & sese erigit  
 Sublimis ille pectoris magni vigor,  
 Iniuriarum censor, & vindex sui:  
 Altasque in iras fertur, & morae inscius*

*Erumpere ardet. Sic minax Diuûm pavor,  
 Fuliginoso sub specu versat latus  
 Ingens Typhoeus, Aetnaque exultans tremit,  
 Magisque semper fata tentantem premunt.  
 Nec sponte nostra Martis in discrimina,  
 Licentiaeve spe subacti venimus;  
 Communis ista patriae sed vox fuit,  
 Iussumque: cui nos hoc litare sanguine  
 Et iustum, & aequûm est: Poscit hoc tranquillitas  
 'Et pace dempta panditur paci via:  
 Neceßitasque est ipsa Mavortis parens.  
 Bellumque tandem ne sit, esse convenit:  
 Pacemque gignit. incipitque ut desinat  
 Haec una rerum.' Caeterûm hic dux maximus  
 Et vir profecto est, patriaeque commodis  
 Servire natus. 'Fervor ille impos sui  
 Virtutis altum nobilo obfuscat diem:  
 Solemque menti demit, & lucem suae.  
 Ardetque semper, imperatque plurimis:  
 At servit uni, seque nolentem trahit:  
 Et servitutem qui fugit, sibi dedit.'*

## Chorvs senvm Flandrorvm profvgorvm.

*Sapphici. duo Glyconici. Reliqui Anapaestici.*

*Blanda torpentis requies senectae  
 Vitrei fontes, & amaena Tempe:  
 Tuque spes nostrae domus illa; quae me  
 Lucis in molles orientis oras  
 Prina fudisti, pueremque longe  
     Curarum vacuum & metu  
     Vidisti pede mobili,  
 Et ridenti molliter ore  
 Nimium dulces texere ludos:  
 Tenuisque inter serpere curas.  
 Tuque suavis puero ab nota  
 Villa senique, posthac numquam  
 Habitanda vale. Sors dura vocat,  
 Dubiumque regit fortuna pedem,  
 Subit aequae vices. Tuque meorum  
 Ab natorum blanda propago,  
 Hilari ridens saepius ore  
 Medio in luctu; nescia rerum  
 Curaeque tuae; patri iunctos  
 Dirige greßus: casusque tuos  
 Disce, & saevi fulmina fati.  
 Tu quoque si quem coniux nobis*

Vtero gestat nescia faetum;  
 Natus nondum, tamen exuleris:  
 Patriamque fugis nascendus adhuc:  
 Et tibi paena vitâ prior est.  
 Lachrymas tellus, lachrymas tellus  
 Patria tellus, ultima nostri  
 Dona doloris impreßa tene.  
 Poscimur ah ah, nos relliquiae  
 Genus effaetum, saturumque aevi:  
 Quibus infelix spiritus aegrè  
 Placidam ducit luminis auram.  
 Pars aequoreas VValachrûm sedes,  
 Aut horrentem Marte Batavum,  
 Et spumantem littoris oram  
 Patris Oceani, visam nunquam  
 Ibimus eheu; aßueta prius  
 Placidis ah gens vivere campis:  
 Pars caerulei gurgite Ponti  
 Toto avulsos orbe Britannos;  
 Aut incoctum solibus Indum:  
 Pars sudantem proprio semper  
 Sanguine Gallum. Miseri, miseri,  
 Quos incertum dubiumque vocat!  
 Pax Flandriacas placido tenuit  
 Foedere gentes, patrioque foco  
 Veterum fluxit vita parentum:  
 Et tranquillo tutus in aruo  
 Vidit teneros ire nepotes

*Auus, & lepidam currere turbam:  
 Qui vicinum cerneret agrum  
 Peregrinus erat. Patria tellus,  
 Patria tellus, saxaque & antra,  
 Et cognatae vallibus umbrae:  
 Patria tellus Flandria nostros  
 Imbibe questus.*

## **Actvs II. Scena I.**

**Inquisitio cum tribus Furijs facem & calicem humani sanguinis gestans,  
 inebriatur.**

*INQUISITIO.*

*L Vcem perosa, lucis immunis Dea,  
 Tetrumque noctis improbae ludibrium  
 Tot imminentes Tartaro rupi fores,  
 Caliginemque, magna Paenarum parens  
 Crudelitatis nata, quam ferox Iber  
 Primum sub auras duxit, & ferro & face  
 Quartam profanis addidit sororibus,  
 Noctisque alumnis: Graia queis primum manus  
 Vibrare saevas dexterâ indulsit faces:  
 Serpentibusque vinxit, & collum dedit  
 Atris draconum pullulare nexibus.  
 Gaude Megaera; nata iam soror tibi est:  
 Iovisque nigri primus infernum genus*

*Perseidosque squallidas faetu domos  
 Iber scelestus auxit: ille Erinnyas  
 Treis mutuavit perfidus; quartam dedit.  
 Hispana tellus, scilicet vesper tuus  
 Foecundus ipse noctis exemplo fuit.  
 Emerge, rumpe, caede: claeatraque, & feros  
 Caliginosae pande Naturae lares:  
 Lethique sedem discute, & lucem tuam  
 Mens atra disce. Testor anguineum caput,  
 Et te Megaera, teque noctis arbiter:  
 Et qui redundans igne Cocytos vago  
 Luctu tremendam flebili tundit domum:  
 Meque ipsa tandem (Numine hoc maius nihil)  
 Patremque Iberum; Pallidas ditis domos  
 Imperuiasque mortis horrendae vias,  
 Phlegeton cruento quicquid ambit alueo  
 Invita aliqui: Nunc tamen ferox pater  
 Tarpeia saxa cui patent, & inclyta  
 Vastae ruina gentis; è reconditis  
 Exciuit antris fulmine invitam trahens:  
 Quod non Pyracmon crudus, aut Brontes pater,  
 Aut claudicantis dextera effinxit Dei:  
 Non Siculus ignis, aut caminorum globi  
 Vndantis Aetnae, flammeique vortices.  
 At Martiorum dissipata rudera  
 Urbisque funus, & solum Quiritium.  
 'O quanta curas fata mortaleis agunt!  
 O quantus urbes regnaque incumbens Deus*



*Ludens fatigat diſſipatque: turbines  
 Rerum fateri cogor invita': (O pater  
 Tarpeie natae liceat hoc unum tuae.)  
 Magni cohortes Romuli, nati Deûm;  
 Arx alta rerum, gens Camillorum ferax,  
 Orbis voratrix illa, regnorum lues  
 Et universi compes, & tandem sui,  
 Ah tot triumphis aucta pene, quot viris,  
 Et tot ruinis urbium vitans suam.  
 Illa illa regum nata Septimontium  
 Calcare fastus, insolensque nominis  
 Regalis una, spiritusque; Pro pudor  
 Regum cinaedis paret, & monstrp Deo.  
 Cui fulmen illud obsoletus Iuppiter  
 Sepultus arce Iuppiter Minoia  
 Haereditatis lege relicto tulit.  
 At contumacis vis rebellatrix tamen  
 Acres, Batavi corde versat impetus:  
 Radicitusque fixa libertas sedet  
 Gentis profanae: patriaeque ardens amor  
 Animos feroces tundit, & subigit sibi.  
 Vidi perustos sole candenti patres,  
 Piceosque voltus, funibusque atram manum:  
 Ruptasque nubes, & procellosas Iovis  
 Magni ruinas provocare audax genus,  
 Vndaeque legem dicere, & ventiminis.  
 Vidi ipse vidi, cum feri vis Africi  
 Tempestuosa torsit hybernum mare*

*Insistere undae, dorsaque aerato pede  
 Fluvij rapacis tundere, & crudum gelu  
 Acresque lapsus: ac per undantes sinus  
 Calcata tutam lympha praebebat viam.  
 Ollis sepulchrum pontus, aulaque est ratis:  
 Agnatus ingens, Aeolus, Nereus pater:  
 Forisque cives, hospitesque sunt domi.  
 Ilhuc remittor, & vetus colonia  
 Mutanda restat: deerat haec sedes mihi.  
 Parere certum est: maximum explevi scelus  
 Maiusque restat. semper antiquum parum est.  
 Angusta sacris quaelibet tellus meis  
 Viam relaxat. Aridas sitis premit  
 Squallorque fauces: sanguine hic opus novo est.  
 Pace hoc Lyaeae, pace fas hoc sit tua  
 Dux Thyadum nocturne; non curae mihi  
 Nyseio qui colle distillat latex;  
 Tuusque si quid languido fallax gradu  
 Maron procaces inter exhaurit choros,  
 Interque Panas, virginesque Menadas,  
 Et aestuantes Liberi suceo Deos.  
 Non si Falernis quicquid vuarum est tui:  
 Quod Setia usquam, vel Velitrarum colunt  
 Dumeta: non si tota vinorum parens  
 Albana tellus, Caecubique honos cadi  
 Descendat in me: carior sitis premit,  
 Paruumque nescit; pluris hic liquor mihi est,  
 Merumque Ibero nuper inventum meo*

*Cruor, Cruor, Cruor. quid o fallax Iber  
 Cessas? nex atrae sanguine undanti viae  
 Sanieque tristes squallidâ rigent domus?  
 Nondum recentes mens cadaverum strues,  
 Tabumque cernit: pure sudantes novo  
 Nondum revulsis oîibus pallent agri.  
 Cessas Ibere, fluctinus, ferro & face  
 Rerum coactas vortere in sese vices?  
 Adsum. quid hoc est? scaeve sacrorum pater  
 Frustran' cruentum Tartaro emisi pedem  
 Et hospitem nocte mutavi diem?  
 Nunquam supernos sobria acceßi deos,  
 Et luce fuluam solis aurati comam  
 Terrasque vidi: sanguinis gustu novi  
 Efferre sese suevit optatum scelus.  
 Mensque ipsa factis saeva praeludit suis.  
 Nunc hic redundans sanguine humano calix  
 Feram cruore musteo sedet sitim:  
 Cordisque totas imitûs mergat vias,  
 Mentemque tollat: quicquid & clemens, pium  
 Nobis relictum, molle, pacatum fuit.  
 Bacchare certum est: En iuvat, iuvat, iuvat  
 Laxare mentis fraena. quid segnis stupes  
 Gens atra terrae? tuque germânum caput  
 Megaera nocte nil geris dignum tua?  
 Patrisque verum dextera probas genus?  
 At o quid atrum nubila involuunt diem?  
 Meque ipsa perdo? flexaque in sedes novas*

*Caliginosus lumina obducit situs?  
 Errantque tristes luce subducta pedes?  
 Et ominosus poplitum labat gradus?  
 Vestigijsque turbida incertis tremens  
 In luce lucem quaero, & in die diem?  
 Nosco furentes sanguinis poti notas:  
 Nosco. cruoris hocce munus & meum est:  
 Mentemque secum mysticus tollit furor.  
 Incerta certum mens tamen voluit nefas.  
 Terra coelum, noctis atrae regia, & vastum mare  
 Explicate trina vires regna, & occultos dolos.  
 Adsumus sacris Philippe vindices dignae tuis.  
 Victima ingens, victima ingens: victima hacce dextera  
 Concidet: qualem nec ille perfidas Teucrûm rates  
 Mortuus victor poposcit Ilia emergens humo;  
 Cum feras minax Pelasgum turba soluebat rates.  
 Nos Batava terra, Ibero nomen horrendum, vocat,  
 Poscimus? quid o moramur? quò nequit fallax Iber  
 Tendere, huc fraudes dolique tendere Iberi queunt.  
 Magnae sorores, Atthidos sacrum genus,  
 Priscisque Erechtei Cecropisque finibus  
 Cognata turba: si quid antiquum manet  
 Viresque vobis tempus asscripsit novas;  
 Quaerendus ille, qui ferox, vecors, furens  
 Aut genere Iberus (alterum sat est tamen)  
 Aut mente fuerit: quique pectore vnico  
 Solus profanas quattuor gestet Deas.  
 O flammei ignes, tuque pallentis Deae*

*Famulatus ingens, ignei cives poli  
 Relligio noctis: tuque dominatrix hera  
 Invisa Phoebos luna, pars Phoebos tamen  
 Familia nostri tota quam Ditis colit,  
 Quemquamne magno dum satellitio procul  
 Stipata iussum per uagaris tramitem  
 Vsquam tueris? cuius unius manu  
 Quod non Philippi mille potuerunt rates,  
 Non ferrum & ignes, armave & tristes minae  
 Timere Batavus discat? Interea tamen  
 Certum est furentes explicare copias,  
 Exercitusque tota deducam meos.  
 Auducia isthaec subeat: haec praeceps Furor,  
 Ignobilisque Livor: haec Vecordia:  
 Crudelitasque mortis horrendae parens  
 Illinc cruentum claudat exultans latus,  
 Rerumque abortus bellicarum Fraus inops.  
 Sic sic eundum est: sceleribus decet tuis  
 Praeferre sacram Rex Iberorum facem.*

## Scena II.

LOISA. SENEX.

Lo.

*O Molientis alta NATVRAE comes  
 Sacrae tribune lucis, & vitae pater  
 Natalis aurae magne largitor, DIES,*

*Rerumque Origo prima; qui reconditas  
 Primus tueri syderum donas faces:  
 O qui sepultum matre mortalem sua  
 Natumque nondum; mortuum prius tamen,  
 Informe pondus impotesque, & haud suum  
 In alta ducis, luminisque compotem  
 Sub imminentes aetheris sistis fores.  
 Tunc expeditus carcere infelix suo  
 Scintilla coeli purior, bipes Deus,  
 Rerumque magnus ille spectato, poli  
 Et universi cura; prorumpit foras,  
 Coelumque discit: parvulusque primulùm  
 Proserpit, insons, misis, ignarus sui:  
 Et fluctuantis tyro fortunae, levis  
 Prosultat exilitque, nec curae est capax,  
 Plagaeque nondum sortis advorsae patet,  
 'Ridetque simplex nesciusque. Scilicet  
 Optata primum fata praemittit Deus  
 Favens iuventae: turbidaeque tempora  
 Potiora vitae vindicat lusus sibi:  
 Interque talos, turbinesque inter suos  
 Süaviores vita consumit dies  
 Beatitatis prodiga infelix suae,  
 Simulque ludit luditurque: curaque  
 Postrema lapsae poscit aetatis sibi,  
 Et faecis instar ima subsidens petit.'  
 O nate, nate, dulce pignus; in sinu  
 Gremioque nostro qui vagaris huc & hunc,*

*Vacuumque leni transigis risu diem:  
 'O dulcis aetas! scilicet primum est Deus  
 Novisse cuncta; proximum tamen, nihil.'  
 O nate, nate, mox in adversum mare  
 Aestusque vastos, principumque munia,  
 Et imminentem purpurae ferociam,  
 Motusque regni deferende; nunc modò  
 Securitatis aureae regnum tenes:  
 Satellitemque praeter innocentiam  
 Nullum tueris; tutus hoc uno satis  
 'Quod esse nescis, laetiorque: Nec potest  
 Vllum timere nate, quem nullus timet.'  
 Nondumque sensus illa pertentat tuos  
 'Regum ducumque febris, ardor imperi  
 Et possidendi cuncta porrigo levis.'  
 Cuniculosque pectore occultos agit  
 Ambitio fraudum mater, aut opum furor:  
 Tuumque ducis quicquid aspicias, Deo  
 Vicinus uni proximusque. Nate mi  
 Si forte somno molle reclinas caput;  
 Artus sopore lacteo victus iaces  
 Extraque motus, cuiicumq; extra metum, &  
 Tempestuosa casuum tonitrua:  
 Somnumque spiras melleum, mitem, levem  
 Tranquillitatis unicum testem tuae:  
 Quiesque lenes tutae perrepat genas:  
 Thorusque qui te parue diffusum tenet  
 Genu, sinusque est: thalamus hic unus tibi est,*

*Et pes cubili sufficit noster tuo:  
 O invidenda regibus mens! ah ferè est  
 Vt ipsa sortem mater invideat tibi;  
 Annosque similes speret, atque aevum tibi,  
 Cunasque dulces, nesciumque aulae diem  
 Fraudem timentis semper, aut fraudis minas.  
 Quin & querelis ne qua pars desit meis,  
 Et falsa, terrent: trepidaque horrentem pavet  
 Mens noctis umbram: & ille curarum Sopor  
 Exactor acer, dissipatorque omnium;  
 Pater mearum est: curaque haec, illam premit:  
 Et somniorum dubia succedit fides:  
 Diemque nox laceßit, & noctem dies.*

**SEN.**

*Dignata magno principis princeps thoro  
 Taedaeque columen: nata magnanimi patris  
 Maioris uxor: Fare, quid reconditus  
 Vultum pererrans obsidet pallor? quid os  
 Guttis sinusque tepidus effusis madet?  
 Et lachrymosus lumine exundat liquor?  
 Ruborque blandis solitus exceßit genis?  
 Meroris ah quae causa? mentis abdita  
 Exonera, & aegrum pectus.*

**PR.**

*Omnia, & nihil.*

**SEN.**

*An ipse sese nescit infelix dolor?*

**LO.**

*Ambiguus urit millies; certus semel.*

**SEN.**

*Sortis flagello quisquis adversae stupet  
 Ictuque subito pallet, hic merito pavet;  
 Causam doloris, & cicatricis suae,  
 Vulnusque, dum scit.*

**LO.**

*Plura dum nescit tamen:*



*Nescitque quantum lugeat caecus dolor;  
Lugetque quantum nescit: id luget tamen.  
Simulque sese nescit, & modum sui.*

**SEN.**

*'Seseque luctu servat, at praeoccupat  
Quod vitat ultrò, provocatque quod fugit,  
Gaudetque maerens, & lubens miser fuit.'*

**LO.**

*Succubuit animus: poplites trepidi labant,  
Simulachraque oculis noctis illudunt meis,  
Seseque late spargit ignarus dolor,  
Et ominosus corda peruolitat sopor.*

**SEN.**

*At falsus ille est.*

**LO.**

*Falsus, at veri pater,  
Praenunciusque.*

**SEN.**

*Fluxa noctis est fides.*

**LO.**

*At non diei.*

**SEN.**

*Terret & noctis diem  
Formido, seque vanus insinuat metus,  
Vmbratilique somnus imponit dolo,  
Noctuque fallit; at die terret tamen,  
Partemque lucis poscit, & regnum suum  
Transcendit audax, imperique limites.  
Humanus acres spiritus motus habet,  
Interdiuque feruet, & sese rapit,  
Metuque pallet gaudioque diffluit  
Quietis expers, corporisque terminum, &  
Adiudicatas lege NATURAE vias  
Perrumpit alis nixus huc ilihuc suis,  
Exorbitatque semper, & quicquid potest,  
Simulque quicquid haud potest; versat tamen,  
Agilisque passim fertur, & meta est sibi.*

*Adestque & absens rebus, & praesens abest,  
 Erratque latè, seque pandit ilia vis,  
 Hauritque formas elicitque, visaque  
 Pererrat, imbibitque, & in sese trahit.  
 Tunc illa luci furua succedit parens,  
 Polumque pullis incubans amictibus  
 Hinc inde obumbrat, induitque caeca nox,  
 Corpusque stringit, liberat mentem tamen,  
 Lucisque viua suscitât vestigia  
 Seminaque rerum, imaginesque; fomites  
 Motus diurni, ruminataque excitat,  
 Mentemque multùm gaudia inter & metus  
 Adhuc vagantem voluit, & circumuenit:  
 Caliginesque ludit in post scenio  
 Mimus diei, ludibundus histrio,  
 Proteusque vitae futilis Somnus pater,  
 Verisque falsa miscet, atque vtrique se.  
 Ceraeque adinstar mollis, impressas tenet  
 Mens & figuras, & vagas rerum notas,  
 Redditque nocte, quicquid excepit die:  
 Laruataque altos somnia incutiunt metus.  
 At cum diei roscidum redit iubar,  
 Et imperator aetheris magni subit  
 Sol, aureamque dividit terris comam;  
 Fugit timoris causa, non timor tamen:  
 Et somniorum profuga vanescit cohors:  
 Nihilque restat, at nihil gemimus tamen,  
 Id quod quoque ante cum fuit, nusquam fuit,*

*Quodque esse falsò reris, at verè doles.*

**LO.**

*'Experta metuo*

**SEN..**

*Saepius favet sibi*

*Error dolusque, nubiloque deprimit*

*Rationis ignem*

**LO.**

*Decipit in malis iuvat*

*Fallique dulce est.*

**SEN.**

*Falsa dum latent tamen*

*Vt vera laedunt.*

**LO.**

*Aetheris beate rex'*

*Quid ah perennis imber, & lachrymae leves*

*Cogente nullo sponte prorumpunt sua?*

*Si quâ minaris imminesque saeva sors;*

*Sperare liceat: bis ferus mordet dolor,*

*Venturus, & cum vênit: & praesens nocet,*

*Idem & futurus.*

**SEN.**

*Pallidum excutias metum*

*Ducemque vitae lenioris spem fove.*

*Firmo maritus urbium munimine,*

*Totoque clusus NEREI regno sedet:*

*Pelagoque cuncto tutius quod arbitror;*

*Amore populi.*

**LO.**

*Haud tangit externos amor,*

*Peregrina nemo imperia diu subdit sibi.*

**SEN.**

*'Angustiore principis mentem viri*

*Meta coercet, patriam quisquis suam*

*Aßignat illi: Vana natalis soli*

*Plebs spacia finxit, & solo leges dedit.*

*At culmen ille dignitatis & caput,*

*Deoque magno pene par, & pro-Deus*

*Princeps vagatur: municepsque totius*

*Diffusalatos aemulatur mens polos:*

*Coelique adinstar semper in motu suo est.*

*Natale magni principis quaeris solum?*

*In orbe natus ille, patria est ei  
 Quaecunque soli, terminusque quicquid est.  
 Seseque terris aequat unus omnibus  
 Generosus ardor ille, & herous vigor.  
 Polusque quicquid caerulo amplexu tenet  
 Illius urbs est: civitas isthaec patet  
 Qua magnus aether, quaque flammantes globi  
 Et aureorum vasta signorum via.'*  
*Titana magnum cernis, vt pleno gradu  
 Superbus altum metiatur aethera,  
 Coelique partem teneat, & totum petat,  
 Viaeque magnae per novas semper licet  
 Adveniat oras; advena haud usquam est tamen,  
 Quocunque namque tendit, in domo sua est:  
 Seu purpurato cum renatus atrio  
 Cubile coeili pandit, & lucis fores,  
 Auroque crispam roscidus tollit comam:  
 Seu cum diurnâ membra defessus viâ  
 Dulceis in ulnas Thetyos fertur suae,  
 Axemque utrumque novit & neutrum colit.  
 Sic feruor ingens, mensque magnorum ducum.  
 'Vbique civis ille, & inquilinus est  
 Quicumque princeps.'*

**Lo.**

*Omnia & scio, & dolet  
 Timere posse, dum dolet, timeo tamen,  
 Metusque causae nescius, causa est metûs.*

**Chorvs.****Anapaestici.**

*O Qui levibus vectus habenis  
 Virides subter roris genitor  
 Laberis herbas, violasque inter,  
 Et trepidantes tepido circùm  
 Sole myricas thalamum figis  
 Blande Favoni, pastusque levi  
 Nectare ludis; sive per altas  
 Lenibus alis laberis undas:  
 Seu per gelidas specuum latebras  
 Montesque procul tenui serpis  
 Humore pater, qua lascivas  
 Tityrus insons subducit oves:  
 Iuxtaque suas blanda Amaryllis  
 Supputat agnas, & tibi dulcem  
 Felix Thyrsi condit avenam,  
 Gens immitis nescia fati  
 Sortisque vagae. Quam palantes  
 O verne pater prendimus oram?  
 Placitas certe liquimus ante  
 Dilecta tuas Flandria sedes;  
 Sed tamen unà liquimus atri  
 Nomen Iberi. patria est nobis  
 Quicquid saevus nescit Iberus.  
 Salvete tamen vos ignotae  
 Littora terrae. tuque o lucis*

*Aurea mater, tandem maestis  
 Reddita terris, O quae caecâ  
 Tenebras tristes Aurora parens  
 Proscribis humo; cum sperato  
 Phosphorus audax exilit ore,  
 Cogitque suos undique fratres  
 Roseae invitos cedere luci,  
 Et sydereas ducens turmas  
 Mox redituras in castra sua  
 Iam didicit Hesperus esse,  
 Et mutato nomine fallax  
 Altera solus munia poscit.  
 Fugiuntque suos sydera lusus  
 Veniente die; nos tranquilli  
 Munera somni, partesque suas  
 Regnaque rursus dolor invadit,  
 Tristisque labos: subitoque atrae  
 Circum volitant agmine curae.  
 At Simplicitas sedes hominum  
 Sera reliquit, Taurosque colit,  
 Et Massagetas, gentesque feras,  
 Nostrisque procul exulat oris.  
 Ibi quisque suae est auriga domus:  
 Peregrinantes quisque vagasque  
 Incolit aedes: sic mutarum  
 Tranquilla colit saecla ferarum.  
 Cernis cernis per inane leves  
 Nare columbas, expersque metus*

*Placida ut campos perrepat ovis,  
 Tuque ô tepidi conscia veris  
 Quae nocturno carmina fundis  
 Ebria rore:  
 Quae sub tremulis Zephyri tenui  
 Flamine ramis, tua tecta colis,  
 Paruosque lares, nutantesque  
 Strepitu tenui suspirantis  
 Leniter aerae, florumque leves  
 Incolis umbras Blanda cicada.  
 Non te trepido quatit infelix  
 Turbine Mavors. Non te querulae  
 Denso cingunt murmure lites.  
 Non vanorum longè sequitur  
 Turba clientum, regnumque tenes  
 Secura rosas, inter & herbas:  
 Et tibi si qua est Curia; tantum est  
 Flos, aut tenuis culmen aristae.  
 Haec aula tibi, regiaque: illhic  
 lus agricolis, & venturae  
 Tempora lucis, lepido pandis  
 Leniter ore, Blande senator:  
 Nec te clusis tristia cingunt  
 Maenia portis. Non crudelis  
 Urbem placidam, sedesque tuas  
 Invadit Iber: quaeque per auras  
 Tenui sudant flumine guttae;  
 Tibi sunt blandi dona Lyaei,*

*Mulgensque leves caelitibus undae  
 Garrula succos, roseos Phaebum  
 Cum iungit equos matutinâ  
 Prima solutas obvia voce,  
 Felixque optas iterum coeli  
 Succedat iter. Tu segura  
 Pacis alumna, Tu Dedaleae  
 Filia terrae. Tua sunt viridis  
 Gramina campi: tuus omnis ager.  
 Felix, Felix! quotiesque tuas  
 Vaga cernis opes, plenâ plenâ  
 Dulcia solvis Gaudia voce.  
 Nec divitias caelare suas  
 Sustinet illa teneri cordis  
 Pura voluptas.  
 Comes agricolis, Tu messorum  
 Rapido durum solis in aestu  
 Solaris opus. Non tibi saevi in-  
 Notuit Albae nomen, Iberque.  
 Non perfidiae Gens tetra tuae  
 Nos ludibrium casibus ah ah  
 Lususque sumus. Nos vrgentis  
 Premit insultans turbo procellae.  
 'Leviora levis Fortuna videt,  
 Parvaque parvos fata lacesunt.  
 Homines curis Gens nata sumus.  
 Superi, Superi, quisquis multos  
 Ordine cives, gentesque regit;*



*Plures metuit. superi superi  
 Quisquis multas vndique terras,  
 Gentesque suis subdidit armis;  
 Plures poscit. Vos crudeles'  
 Genus infidum posthac nobis  
 Ite tyranni,  
 Aulaque fraudum perfida nutrix.  
 'Nimium multis immensa patent  
 Limina curis; Mea tecta omnes'  
 Angusta metus, tenui excludent  
 Culmine, sic sic, locus haud nimius  
 Domino; at curis, non vllus erit.  
 Regnumque meum est, domus exilis,  
 Larque suavis: populique mei,  
 Lepido circum concurrentes  
 'Ordine nati. Nimium diui  
 Labitur ille, qui cum mundi  
 Totius alto corruit ictu.'*

### **Actus. III. Scena. I.**

*SICARIVS. PRAEFECTVS.*

*QVo? quo? quis vrges? huccine anne illhuc feror?  
 Vtroque certe: saeua tempestas dei  
 Intus redundans cordis excercet salum:  
 Exaestuatque mens: & incertus ferit  
 Ardens tremensque pectoris votum tumor:  
 Sedemque mentis hinc & hinc pessum trahit*

*Metus, tenaxque consili ingentis furor:  
 Cordisque caecis impetita fluctibus  
 Casura nutat vis, retroque corruit;  
 Incerta quonam, quodque factura annuit  
 Feciße nondum luget, insultans sibi,  
 Praeponderatque vtroque, & vtroque imminet:  
 Inobsequensque pectoris magni ciet  
 Motum reluctans feruor, & premi negat,  
 Redireque ardet rursus, & rursus nequit.  
 Sic cum profundis auctus in praecordijs  
 Telluris imae, daedaloque viscere  
 Magnae parentis ignis occultè furit:  
 Notique saeuis Africique follibus  
 Nutritur ardor, latiusque promouens  
 Vulcanus intus flammeas agit vias,  
 Crateraue altum matris occulto in sinu  
 Molitur, aestuatque: & immensum sibi  
 Iter resurgens flamma molitur foras,  
 Caelumque poscit, impetu minor suo:  
 Donec pauentem totus inuadit diem,  
 Ruptoque hiatu mugit, & tetroèspecu  
 Inauspicatus victor exundat vapor.  
 Quo voluor, effluoque? quo praeceps traho  
 Voti ruinam consilique? quid tremens  
 Felicitati terga mens vertis tuae?  
 Exurge pectus, masculique spiritus  
 Recollige aestus: si quid elapsum tibi est  
 Duplo reprene. lam feror, certe feror,*

Quis? quo? quid? vnde? visa, portenta horrida  
 Obtestor, & vos atra mentis omina,  
 Quaeque vmbra vultus nocte delusit meos,  
 Seu numen, aut quid numini advorsum fuit;  
 Perstat, sedetque fixa mens: nihilque quam  
 Mortem videre restat huius, aut meam.  
 Ergo ergo tandem, quo ruinosus furor,  
 Ardentibusque palpitans cor motibus  
 Ingentis vndae, quoque lanx vergens diu  
 Sententiarum, lubricique turbinis  
 Propendet, inclinatque, quòque mens vaga,  
 Hospesque magni pectoris rapit deus,  
 Et nox dolorum seminatix omnium  
 Gradum capesso: turbidisque fluctibus  
 Ventisque totam fervidis dedi ratem.  
 Vidi, ipse vidi, prima vix nascens dies  
 Dubium recenti luce spargebat polum,  
 Diesque nocte mixta; nox erat die,  
 Secumque magnos exigebat impetus  
 Rerumque vastas mens futurarum vias,  
 Blandae quietis nescia, haud sui tamen;  
 Immane, celsi corporis, vastique, onus  
 Notoque maius foeminae ingentis tuor.  
 Ast illa gressu pallida elato furens,  
 Vultuque nostro turbida incumbens thoro,  
 Ter fulgurantem dexterâ excuβit facem  
 Vocemque rupit. Sequimur ô sequimur Dei  
 Spondetque mens itura quâ nescit viâ!

**PRAEF.**

*Quo fluctuantes insolens gressus refert  
 Titubante passu temerè, & incerto pede  
 Ambiguus hospes? creperus haud quaquam color,  
 Exanguis, amens, & profundi luminum  
 Placent recessus, & supercilij tremor,  
 Nimioquo ceu furore labentes genae,  
 Vecordiaequae proditor, vanus timor.  
 En metuit, en, trepidatque, maestaque huc & huc  
 Flectit, reflectitque ora, nec satis sibi  
 Lucique credit: maximum hoc pectus scelus  
 Metuit paratve.*

**Sic.**

*quo feror? rursus dolos  
 Mens necte & astus: & procellas pectoris  
 Fluctusque cohibe.*

**PRAEF.**

*Siste. quo gressus agis?  
 Cuias? quis? vnde?*

**Sic.**

*tristis, infelix, miser:*

**PRAEF.**

*Quo versus ergo?*

**Sic.**

*Nominis ter inclyti  
 Nassoviorum pridem, & augustae domus  
 Cuius trophaea primus emergens dies  
 Stupet, ultimusque praelia, & bellum ferox,  
 Motusque Iberi regis, & tristes minas,  
 Minister adsum, maximae interpretes rei  
 Admissus olim, profugus, extorris; patre  
 Patriaque viduus.*

**PRAEF.**

*Nunc tamen quonam moves?  
 Aut quas in oras tendere est animus tibi?*

**Sic.**

*Quo sors agit, Deusque; quo miseri solent.  
 Patriam reliqui, patriam rursus peto,  
 Semperque terras has, vel has mutavimus,  
 Sortemque numquam. vbique cum fui, fui  
 Vbique miser. hoc vnicum restat mihi*

*Miseriam eundo transveho paßim meam,  
Nusquam relinque.*

**PRAEF.**

*Quo parente? qua domo?  
Quis generis autor?*

**Sic.**

*Per secunda te precor  
Gentis Batauae fata, perque nescia  
Spei metusque corda, & inuictam manum,  
Excussaue ante regis infesti iuga,  
Domitamque ponti fluctuantis regiam  
Aestusque canos, inuiamque semitam  
Magno Philippo, & Hesperuginis duci:  
Per has perennes turbidasque lachrymas,  
Quas fluere cernis, perque tabentes genas,  
Singultibusque rupta tot suspiria,  
Animique vñlus: quemque nulla forsitan  
Solis corusci nata delebit dies  
Solitum dolorem. Sic genus Nereium  
Marisque dominos discat infelix Iber:  
Longaque terras ambiat propagine  
Faecunda rerum turba gens Neptunia  
Annosque laude, saeculamque viribus  
Post se relinquat parua stirps Nassouia;  
Tacere liceat, tabidique vulneris  
Lenem cicatrix squallida obducat notam.  
'Memoria doloris ipsamet saepe est dolor.'*

**PRAEF.**

*Tacito dolori nulla succurrit dies.*

**Sic.**

*Obluione corrui solâ dolor,  
Virtute maior, auxiliique nescius.*

**PRAEF.**

*Phoebeiam quicumque detrectat manum  
Dolore pressus sit licet; causa est tamen,*

*'Vulnusque semper auget, & semper gemit.  
Malisque gaudet ille, qui solus dolet.*

**Sic.**

*Dies mederi cui potest, solus potest.*

**PRAEF.**

*Breui mederi longa non solet dies.*

**Sic.**

*Lugere didicit ille, qui luget diu,  
Aetate sensim summa decrescunt mala,  
Dúque magnum quod fuit, fit & leue,  
Viresque sumit tempore, & perdit suas.*

**PRAEF.**

*Frustra latebit vsque.*

**Sic.**

*quicquid alteri  
Frustra refertur, tutius frustra latet.'*

**PRAEF.**

*Sperare opem qui nescit, auxilium potest,*

**Sic.**

*Age, post dolores rursus infelix, age  
Et fortis esto mens in aerumnas tuas,  
Et ante quicquid, asperum, durum tibi  
Abominandum, noxium, aduersum fuit,  
Dicendo reuoca. citius ardentem poli  
Titan relinquet orbem, & occasu suo  
Praeuertet ortum: citius aetheris vagam  
Regina noctis luna dediscet viam:  
Laudes Batauus Martias; fraudes Iber,  
Quam fata sicco lumine euoluam mea.  
Eheu me! eundem principem lucis diem  
Curaeque vidi, vix & in cunis suis  
Fefellit atras vita fortunae manus,  
Et blandientis primus aetatis lepor,  
Vernumque vitae tempus, & tranquillior  
Ridentis aeui, leniorque semita:  
Crescentibusque tempus accreuit malis,*

*Pariterque curas auxit, & sese dies:  
Et effluentes aemulus cursu dolor  
Aequavit annos. hei mihi natus fui  
Simul miserque.*

**PRAEF.**

*Quae tot in te nubila  
Imbresque rupit ira fortunae suos?*

**Sic.**

*Vnus dolores plurimos vexit dolor.  
Vidi vapore fumeo ambustum caput  
Miseri parentis, membraque infelicibus  
Populata flammis: ipse spectator mei  
Doloris aderam: parvus, inscius, rudis  
Quotaunque turbae pars euntis, huc & huc  
Visurus ibam, sortis ignarus meae.  
Vidi reciso stipite, & multa comâ,  
Ramalibusque roborum, ingentem pyram  
Strui sub auras, nemoris immensi luem.  
Dum iactor, & me confluentis impetus  
Fremitusque turbae voluit, & secum procul  
Populi procellas inter, & magnum fori  
Vndantis agmen, civiumque murmura  
Motusque, perdit error; inveni patrem  
Iam perditurus: teque vidi, haud denuo  
Visurus vnquam, vita, spes, opes meae  
Animique fulcrum languidi O dulcis parens:  
Olli trementes horridus tortor manus  
Hinc inde ferro, duplicique compedum  
Frustra labantes strinxerat vinclo pedes,  
Instansque crebris verberum vibicibus  
Senile multo vulnere vrgebat latus:*

*Canaeque largo sanguine vndabant genae,  
 Et illa sacra temporum nix, vltima  
 Labentis aevi meßis, & fessae seges  
 Extrema vitae rore sudabat novo,  
 Cruenta multùm, puluerisque squalido  
 Infecta coeno, morsque iam toto viri  
 Errabat ore saeva, vicina imminens,  
 Et ante funus, funus infelix erat,  
 Iterum futurus morte; nunc mortis metu.  
 Penè & dolori spiritus cedens suo  
 Effugit hostem, seque furatus sibi est,  
 Mortemque propera morte vitavit suam.  
 Bis, impeditas sustulit caelo manus,  
 Et bis remisit rursus, & frustra fuit,  
 Gemitumque ab imo pectore ingentem trahens  
 Lachrymasque inanes, flebili erupit sono:  
 Tu purioris magne regnator poli  
 Caelumque factis omnibus praesens meis,  
 Et cuncta lustrans, cuncta quod circum tegis,  
 Antestor inquit. cernis haec? cernis? trahor  
 Et vos meorum gens pusilla liberùm  
 Pudicaque vxor, O mea aeternùm vale.  
 Extremus ore frigido haerebat sonus:  
 Tortor cruentas inijcit collo manus,  
 Vitaeque cursum rumpit, & voci sonum.  
 Flammisque trepidum trahit, eminus tamen,  
 Maiorque letho paena fit lethi mora,  
 Morique nescit: quodque postremum fuit,*



*Negata mors est ipsa, morienti tamen.  
Tandem misertus ipse prorumpit vapor  
Ambitque vultum, dum fuit vultus tamen,  
Vnaque luce carceri, & letho fuit  
Addictus ille, binaque infelix tulit  
Mortisque damna, compedumque: & O nefas  
Nullius vnquam fraudis aut doli reum  
Idem beatum vidit, & cinerem dies.*

**PRAEF.**

*Et quae furoris causa tam subiti fuit?*

**Sic.**

*Quaecunque vobis, quaeque tot quondam expulit  
Laribus paternis, sancta libertas, fides,  
Pietasque pura: cuncta praeterquam scelus,  
Odium tyranni, rituumque adulteri  
Regis sacrorum, frausque Romani patris.  
Exin dolores inter & suspiria  
Miserae parentis, degere aetatem in malis  
Peniuriaque, flebilem ingressa est viam  
Puerilis aetas, liberisque reddita  
Pro patre rapto sola paupertas fuit.*

**PRAEF.**

*Opes quis autem sustulit misero suas?*

**Sic.**

*Qui vitam.*

**PRAEF.**

*Eone perucax mentis tumor  
Legisque certae ignarus erupit furor?*

**Sic.**

*Saeuitum in omne est ordine infelix genus,  
Paterque saeva morte multatus iacet,  
Vitaque mater: paenaque illi mors fuit;  
Huic munus esset: quotque liberos parens  
Totidem doloris liquit haeredes sui,  
Opumque nullos.*

**PRAEF.**

*Surge & aduerse feras*

*Sortis malignae corde prouoca minas,  
 Fatumque contra pectore excelso preme.  
 Campoque aperto Martijsque legibus  
 Inuade Iberum: cuncta fraus absit procul  
 Ignota Batavis: exulat nostris adhuc  
 Hoc nomen oris: artis haud Mavors eget.  
 Virtutis altae robore & forti manu  
 Ferroque tantus expiandus est cruor  
 Animique motu. poscit vltricem manum  
 Nati cinis paternus, & virum vocat,  
 Puerum nequibat; quicquid effluxit tuis  
 Ignouit annis, Nunc age vltorem para.  
 Natum parenti: magna te moles premit.  
 Tune vt sepulchri debitor tanti, queas  
 Haurire lumen, siderumque ardens iubar?  
 Ah creditores patrios manes habes,  
 Teque vmbra poscit illa, te cinis ciet,  
 Et ipsa lentum terra te mater vocat,  
 Geritque frustra. Feruet aetatis calor  
 Sanguisque totas integer venas alit.  
 Vtrumne laudè pectus occallet tuum,  
 Speique totas vita praeclusit vias?  
 Exurge tandem, pectorisque seruidas  
 Effunde habenas, teque huic dedas duci  
 Nomenque Marti.*

**Sic.**

*Scilicet fixum est, placet.  
 Ergo vt iuventae largioris plenior  
 Pulsavit aetas limen, & lanuginis  
 Autumnus atras primus infecit genas,*

*Rebusque dignum tempus, & primordium  
 Maioris aevi, cum dolor, primusque honos  
 Potentiores pectori subdunt faces,  
 Vehuntque in altum, deprimuntue spiritus  
 Motusque primos; fata iuravi tua  
 Miserande genitor, cladis & tantae necis  
 Futurus vltor. Nunc quoque, immensa licet  
 Vastaque mole dura paupertas premat,  
 Et eminentem saeva virtutis diem  
 Nisusque condat, opprimatque, & arduos  
 Supplantet ausus, & resurgentem domet,  
 Plerumque magnis imminens conatibus  
 Imbelle pondus, & dolor penuriae  
 Aedilis altis additus virtutibus,  
 Quoties parentis cunque praerepti tamen  
 Sensus cruentis cor fodit calcaribus,  
 Ceu ille longa membra defessus die  
 Bellator alto cornipes torpet situ,  
 Mauortis acres suetus inter impetus  
 Glomerare gressus: ille dum tempus sinit  
 Annique, & aetas, it iuuenta feruidus  
 Enses micantes inter, & ferri minas,  
 Ardensque gestit, toruus, & plenus sui,  
 Strepituque maior, auribus totis bibens  
 Galeasque, vocesque, aeraque & neces virum  
 Superba crurum ponderat volumina,  
 Tremittque palpitatque, & in numerum salit.  
 At nunc senectae pondus infelix licet*

*Suique vix pars, si tamen litui procul  
 Tubaeque notum rursus hauriat sonum;  
 Inhorret armos, & tremor totos vetus  
 Redux in artus, corpus immensum quatit,  
 Auremque sursum tollit, & terram ferit,  
 Annosque nescit, seque restituit sibi.  
 Sic colla quamuis semper incumbens, graue  
 Onus fatigat, impetusque intercipit  
 Laudemque rerum degener penuria  
 'Virtutis vmbra, & pertinax neceßitas'  
 Sublime dura cor retundens compede,  
 Animique nascens lumen, & promptam satis.  
 In bella dextram; sic quoque ardentem agit  
 Sublata motus mens, suasque ventilat  
 Libratque vires, copiamque: & peruigil  
 Invisitata parturit molimina,  
 Nec ille cassam laude sol praesens facem  
 Ducet sub vmbra. singulos perdo dies  
 Si nil Iberus.*

**PRAEF.**

*Perge, sitientes patris  
 Restingue manes, sanguinem sanguis suum  
 Exposcit ille.*

**Sic.**

*patriam versus trahor  
 Nec illa nobis vana diffluet via:  
 Nunc ecce nostris praestitem conatibus  
 Heroa petimus, splendidae culmen domus.  
 En ipse celerem praeuius refert pedem.*

**Scena. II.**

AVRIACVS. LOISA.

QVid immerentes rore commendas genas  
 O dulcis vxor, maestaque amplexus fugis  
 Visusque nostros, nec süave purpurae  
 Hilarumque laetae mentis emergit iubar,  
 Vultumque pingit? non vt ante, candida  
 Tibi serenus ora perstringit rubor.  
 Sed maesta, sed deiecta, sed luctuis grauis.  
 Sic illa Phoebi blanda spoliatrix sui  
 Nocturna Phoebe pallet, & caecum caput  
 Obnubit atris implicata nubibus,  
 Poloque lumen tollit, & terrae polum  
 Trepidique torpent aetheris magni chori:  
 Suasque linquunt aurei fratres domos  
 Vigiles serenae noctis, & caeli cohors  
 Statione ruptâ. Non ita pridem tamen  
 Certe fatebor dulcis O confors thori,  
 Non tanta lachrymis causa defuit tuis,  
 Cum perduelles inter & nostram manum  
 Paruo redundans alueo Rhenus stetit,  
 Vitaeque nostrae terminus flumen fuit,  
 Mortemque vidi semper & fugi meam.  
 Certe fatebor quicquid huius est, mea,  
 Nec dulce vanis dictionum fraudibus  
 Ambagibusuc pectus inuoluam tuum;

*Non vlla Iberum, meque sat tutò queat  
 Diuidere tellus; Non Pyrenes si iuga,  
 Idemque Celtas meque disiungat tuos,  
 Discriminataque Alpium cacumina,  
 Quacunq̄ late cornibus caelum suis  
 Vicinus ambit, aemulumque verticem  
 Humerosque circum velat aestivo gelu  
 Apex superbus, nubibusque aptum caput:  
 Terraeque quicquid continentis vspiam  
 Succumbit arcu flammeo ingentis poli,  
 Inhorruique semper, emínus licet,  
 Fraudēs tyranni, comminus nunquam manum,  
 'Timuique solo quod timore vincitur  
 Dolos & astus: caetera haud quicquam sibi'  
 In hoc profanus corde deposcet timor.  
 Non vlla tantum (testor hoc vnum deos)  
 Capax Iberi terra, sit simul mei.  
 At nunc profundo spumeus regno pater  
 Tot aestuantes victor obiecit sinus  
 Molitus alta fluctibus diuortia  
 Sequester ingens arbiterque; solus hic  
 Horrere Ibero suadet, & nostro vetat.  
 Primus Philippum patriam vrgentem viam,  
 Orbisque habenas mente volentem suâ  
 Vidi tulique; Primus hoc voui latus,  
 Et prurientes totius fregi manus,  
 Ardore mundi. per meae Batauiæ  
 Certe ruinas, & laceßitum caput*

*Maiora poscit. sternit hanc votis suis,  
 Conatibusque rex superbus semitam,  
 Et vniuersi candidatus est Iber.  
 Gaudete reges, proximum polo genus,  
 Aboriginesque caelitem magni duces  
 Diuûm propago: tutor omnibus fui  
 Simulque noster. cuncta defendi loca  
 Cum nostra cepi. vindicem Belgis dedi  
 Munimen orbi: cumque rex mundo minax  
 Soli patentem liber inuasit viam  
 Venturus vltra; primus obieci mare  
 Moramque feci. terra non satis fuit;  
 Succesit vnda: coeruleisque fluctibus,  
 Pontique saeuam gurgite repreßi manum.  
 'Namque inquietus feruor ille principum  
 Gliscendo surgit, seque tollit: & licet  
 Sit aemulator nullius, fiet suus  
 Regalis ardor: pluraque hoc vno petit  
 Quo plura restant: perque populorum rapax  
 Crescit ruinas: quodque supremum reor'  
 Bellum sine hoste geßit Albanus furor,  
 Egitque ciues in se & armauit suos.  
 At tu reposta lenior cura veni  
 Oblanda coniux, mentis O vigor meae  
 Eademque thalami; frontis & supercili  
 Nubem serena: laetaque in cultus redi  
 Habitusque veteres. Nunc in amplexus patris  
 Commune pignus veniat: & collum premat*

*Breuibus lacertis paruulum germen domus  
 Natusque noster: sic iuvat, certe iuvat  
 Curis fathiscens, Belgiaeque pondere  
 Laxare pectus, otioque turbidam  
 Rigare mentem, lenibusque gaudijs.*

**LOIS.**

*Metuo marite: plura non queo tamen,  
 Metuo marite.*

**AVR.**

*tristia & luctus graues  
 Remitte Iberis. omen hoc nostros precor  
 Inuadat hostes.*

**LOIS.**

*Neutiquam frustra tamen  
 Timore vano fluctuatur cor meum;  
 Nec ante tanto; Qualis hybernas ferox  
 Cum Corus auras, arbiterque fluctuum  
 Caecas profundo coeruleo intentat minas  
 Insanus Auster, vimque praemittit suam  
 Venturus ipse; sensit aduentum dei  
 Thetys residens, summaque absentem licet  
 Exhorret vnda, turbidoque aspergine  
 Cautes trementes inter alludit mare,  
 Refluitque rursus, seque sorbet, & fremit,  
 Sensimque maius turget: vndaque hinc & hinc  
 Terram flagellat dubia, vix credens sibi,  
 Adhuc futuri plena. donec impotens  
 Caeli furentes peruagatur cardines  
 Pontumque verrit ventus, & nubem trahit,  
 Et incubantem fluctibus miscet polum,  
 Vadumque voluit, pallidique nauitae  
 Pectus pauore soluit, & fluctu ratem.  
 Sic ante luctus luget, & fatum sibi*



*Indicit aeger mentis igarae stupor.  
 Non me Lyaei dona, non mitis Ceres,  
 Ipsaeque dulces ante delectant dapes,  
 Crescitque in ore lentus inuito cibus.  
 Victos nec artus vinculo mitis sopor  
 Leni pererrat, flebilesue luminum  
 Demulcet orbis. cura non lapsu graui  
 Noctis profundae liquitur, sed in genis  
 Infesta, pernox excubat. Tremo, tremo,  
 Metuo marite.*

**AVR.**

*scilicet pacem tremis  
 Non arma quondam.*

**LOIS.**

*Pace tranquilla viros  
 Perire didici. pace tranquilla iacet  
 Quem non tot ictus, ciuiumque murmura,  
 Quassumque regni corpus, & Celtae furor:  
 Non factionum saeua concuβit manus,  
 Non Martis alta vis, & inclinans onus  
 Patriae ruentis. pace tranquilla iacet,  
 Bellique finem vidit, & vitae suae.*

**AVR.**

*Secura metuis?*

**LOIS.**

*Ne diū sint.*

**AVR.**

*si quid hic  
 Vsquam tremendum, siquid aduersum fuit  
 Trans mare relictum est. longa nos secat via  
 Simulque fi audes, & dolos. toto mari  
 Distamus illhinc vnde metuendum fuit  
 Quicquid timetur. omne trans pontum est scelus  
 'Vnaque Iberus.*

**LO.**

*PAX subinde decipit  
 Securitate, Marsque tutatur metu,  
 Cavetque semper arma, qui semper timet.'  
 Testis maritus, testis & genitor fuit,*

Alterque natae monstrat, alter coniugi,  
 Timere quavis fraude plus, quicquid latet.  
 Ille, ille, regni fulgor ingentis parens,  
 Potensque rerum, sacra vis Colignij,  
 Emancipatus horridae pendet neci,  
 Interque terras & polum, neutrum tenet;  
 Vtroque dignus: impotens spectaculum.  
 Sortis proteruae, sydera & caeli vagos  
 Testatur ignes, duplici functus malo,  
 Diuisque versum corpus, & terrae vicem  
 Demonstrat ille, nec sepulchro clauditur  
 Caelo sepulchro tutus, & patriâ suâ.  
 Quis fata nescit magne Theligni tua?  
 Fossumque ferro pectus, & tristem necem?  
 His his in vlnis ille, in hoc, in hoc sinu  
 Vndans cruore triste demisit caput,  
 Oculosque morte iam natantes, collaque  
 In ora nostra flexa, & exangues genas,  
 Animaeque dulces ore languenti bibi  
 Abeuntis auras: pressus, elisus diū  
 Inter lacertos, inter haerentes manus,  
 Interque vultus, spiritus fugit meos:  
 Quemque ipsa tenui, perdidit ereptum tamen  
 Misera maritum: concidit pondus graue  
 Vel sic tremendum perduellibus suis,  
 Impune magna Guisiorum victima.  
 Hymen quot ille finis heroum fuit?  
 Haud cariores vlla gens vidit thoros

*Emitue taedas ante quis pluris suas,  
Regique regni dos cruor fuit sui.  
Quis metuit istos quisue trepidauit dolos,  
Caecasque fraudes, & reconditum scelus  
Aulaeque latebras? horruit nemo necem  
Nemoque fugit.*

**AVR.**

*desine infelix metûs  
Luctusque inanis, neue vanis irrita  
Te trade curis. firmus à nobis locus  
Defendit hostem.*

**LOI.**

*Nullus hic hostis fuit*

**AVR.**

*Fuere & omnes.*

**LOIS.**

*Vocibus certè tuis  
Lubens remitto quicquid est, tamen tamen  
Metuo marite. perge famularis manus  
Paruamque patri sistite hic prolem suo.  
Hic en hic ille est, dulcis effigies tui  
Pariterque nostri, pars mei, pars & tui  
Vtrumque iungit. hunc ego quoties tuor  
Quotiesque vultus cerno, & has paruas manus,  
Similesque patri luminis blandi notas,  
Lachrymis invndo. siquid aduersi ferox  
Fortuna regno moliatur, aut tibi  
In hoc suaue pars redundabit caput.*

**AVR.**

*Accedat agetum. Nate spes O nunc patris  
Futurus vitor, Nate Nate, surge age  
Laudum sititor, aemulusque patriae  
Virtutis, aevo maior; aetatem tuam  
Transcende victor, temporisque vrge moram,  
Annosque iam nunc supputent moestae tuos  
Matres Iberae. Nate, vt illud contuor*

*Sublime pectus, oraque & vultus meos,  
 Decusque latae frontis, & toruas genas,  
 Ingens Philippi crescit hic terris pauor.  
 O nate, nate, dissipata nobilis  
 Comae propago, & ille vagitus grauis  
 Elementa rerum spondet, & certam manum  
 Aususque magnos: Nate, si quae forte sors  
 Caeptam parenti durior rumpat viam,  
 Iterque rerum claudat atque exordia  
 Ingentis orsus, Belgiaeque motuum;  
 Viduae parentis dulce solamen, patri  
 Vultu superstes esto, laudibus tibi.  
 Patremque matri redde, patriae virum.  
 At cum iuventae largior, vis, liberas  
 Totasque rebus Martijs pandet fores  
 Sublimis ardor auctibus surgat nouis,  
 Seseque late fundat, & metum sibi  
 Mox regna subdat, iam triumphorum capax,  
 Auosque Diuos voluat, & magnum genus.  
 Illhic Adolphi pectus altum, & indoles,  
 Tergoque numquam notus, aut fugae memor  
 Dium Renatus nomen. O sanguis meus  
 Eritne lux haec, quâ per vndantum, salî  
 Deuectus aestum, per Bataua littora,  
 Nereique regna spumeum aerata secans  
 Sulcum carina, victor ardentem minis  
 Adhuc Iberum littore extremo trahas?  
 Patrique Opima laetus, & victos lares*

*E puppe monstres? Nate, virtutis tuae  
 Testem Batauum, Belgiaeque vindicem  
 Togae potentem, curiaeque purpuram,  
 Patresque magnos trado, & Ichnaeae decus  
 Sanctum senatum. sic nec amisso patre  
 Futurus orbis. Nate, iam motus tuos  
 Expectat hostis, quassaque Europae salus.  
 O nate, mundo conscio qui nascitur  
 Latere nescit. Principem totus suum  
 Expectatorbis, oraque & vultus ducum  
 Annos sequuntur, gestaque & fortem manum  
 Gliscentis aeui. Nate, magnanimus tibi  
 Binas Batauus monstrat armorum vias,  
 Terram, salumque: semita haud vna est tibi  
 Modusque rerum, terraque, angusta est nimis;  
 Vides & aequor: ipsa te in lucem trahit  
 Natura nate: quodque supremum tamen  
 Felicitatis arbitror culmen tuae;  
 Vincis coactus, poscerisque. hinc caeruleae  
 Regnator vnde Cattus: hinc venti sciens  
 Fidum VValachri cor, & aetatis suae  
 Profiisor ingens Geldrus, & Friso minax  
 Cient morantem. sis licet vicor cito  
 At vltor esse non nisi sero potes.  
 O nate nate, tramitem O quantum tibi  
 Ingens parentis praeuij strauit labor!  
 Quae O nate quondam nomina, O quantos leges  
 Mutantis aestus patriae, & fluxas vices,*

Ruptumque regi faedus, & tetras dapes,  
 Dolosque Iberum: Qualis excusso iugo  
 Turbatus atro Mosa spumauit vado,  
 Stagno redundans turbido: Quantas pater  
 Superbus Honta, cornibus flexis, virum  
 Strages cruento victor inuoluit sinu,  
 Cadauerumque mole praeclusus sibi  
 Quae siuit in se sese, & ingentem viam  
 Mollitus extra gurgite vndanti fuit.  
 Qua primus, Albae terror, audaci manu  
 Regina ponti, magna fraenatrix Sali  
 Fließinga versos sensit exultans deos:  
 Soloque victas nomine exterrens aquas  
 Curru marino vectus, & vastrâ trabe  
 Per fluctuantem nauita erumpit viam,  
 Praedasque late verrit. At tu patriae  
 Foecunda nostrae, dulce solamen thori  
 Coniunx, memento per paterna paruulum  
 Trophaea natum ducere, & Mauortios  
 Parentis ausus, armaque, & raucas tubas.  
 Sensimque in hastam surgat, inque puluere  
 Equi lupatis ora spumantis premat,  
 Armosque ferro calcet, & crudam niuem,  
 Caelumque aperto vertice hybernum ferat:  
 Cum se pruinis turbidus laxat polus  
 Brumam lacessat primus, & spumans vadum  
 Nusquam tremiscens, pectoré aduerso domet:  
 Exsuscitandus ardor ille est, indoles

*Ne forte tetro sacra torpescat, situ,  
 Aut sub veterno regius lateat vigor.  
 Virtutis altae fomites claros tuor  
 Oblanda coniux; vidimus nuper; meo  
 Cum forte iussu noster ille a limine  
 Mota satelles arma vibrabat manu,  
 Mauortiasque miles inflabat tubas,  
 Arrisit ille, gaudiumque feruido  
 Admisit ore, vixque nutricis sinu  
 Sese remisit, emicansque dexteram  
 Protendit, exiliqtque & in ferrum ruit.  
 O nate, dignis scilicet crepundijs  
 Nassouiorum gente praeludis; neque  
 Iners paternum nube suffendes genus!  
 At nos süetae iam vocant vxor dapes  
 Mediumque Phaebi currus inuadit polum.*

## Chorvs

*CHORIAMBICI, DIMETRI IAMBICI, DACTYLICI PENTAMETRI, HEXAMETRI SAPPHICI.*

*FRustran' sollicitis condita vultibus  
 Obscuris latuit Cynthia nubibus?  
 An lapsum miseris fataque gentibus,  
 Et belli dubios nunciat impetus,  
 Et Mauortis opus? Fallere, fallere  
 Quisquis mente leuem vectus in aëra*

*Adscribis nimiam syderibus fidem.  
 Namque illa emeritis pallida cornibus  
 Fratri blanda suo basia diuidit,  
 Seque exinde nouis instruit ignibus,  
 Et Phoebi tepidos concipit halitus.  
 Illinc dulcis humus parturit, & leuis  
 Humescit saturi penna Fauonij:  
 Illinc Daedalei progenies soli  
 Ridentes violaeque, & violae soror  
 Circum virgineis picta ruboribus  
 Florum nobilium dux Rosa nascitur.  
 Tellus vere nouo, iam genitalibus  
 Lucinam patitur faeta caloribus,  
 Lucinam patitur veris, & obstetrix  
 Aspirat leuibus Cynthia mensibus:  
 Caelum nutrit amor, nutrit amor solum.  
 Constant faederibus omnia mutuis,  
     Terramque magnus aether  
     Amplectitur, suisque  
     Gerit, fouetque in vlnis,  
     Taedasque ouans quot annis,  
     Redintegrat iugales,  
     Et coniugem fatetur,  
     Seseque miscet illi,  
     Et in sinum beatae  
     Se proripit maritae.  
 Tum volucrum toto vagus aethere  
 Dulcis hymen hymenaeae sonat chorus:*



*Pronubus exultat Zephyrus pater,  
 Syderaque aurata praeueunt face,  
 Et placidas caelum choreas agit,  
 Et domini praelucet amoribus,  
 Nuptaque in amplexum noua ducitur,  
 Sponsaque regales aperit senus,  
 Et varijs lasciuit amictibus,  
 Vtque suo placitura viro nitet.  
 Illinc flaua Ceres, & amabilis  
 Foemineus Bacchi refluit liquor.*

*Vuaque sub tremulis pendula palmitibus  
 Propter aquae dulcem luxuriat strepitum,  
 Quae pariat maestis gaudia pectoribus.  
 Tum vaga per tepidas exiliens latebras  
 Aetheris aurati filia, dulcis aqua  
 Garrula torrentem tentat iter per humum,  
 Arboribusque, suam, graminibusque, sitim  
 Sedat, & exiles soluitur in scatebras,  
 Vidimus horrendum caelo prodire cometen,`  
 Qua validas auriga leuis moderatur habenas  
 Lora regens axemque, polumque inuectus apertum  
 Lumina maioris turbatus conspicit Vrsae,  
 Quem licet armatus croceo qua fulgurat auro  
 Palluit Orion, trepidoque exterritus ensis  
 Excidit, ingentique animum reuocauit ab ausu.  
 `Regiae & fortes metuant tyrannis  
 Nulla priuatis populis minantur  
 Sydera, aut paruo pecudum magistro,*

*Parua non nouit polus; alta nutant,  
Sorsque in occasum propriâ secunda  
Mole dehiscit.'*

## **Actvs quartvs. Scena I.**

*SICARIVS. QVATVOR FVRIAE, INQVISITIO, ALECTO, MEGAERA, TISIPHONE.*

*I*Gnosce victo Roma: cor retro salit  
Fugamque versat intus. O sacerrimi  
Tutela patris, votaue, & fides mea,  
Et fibulati curiae sanctae patres,  
Superatus adsto: victus, ignauus feror,  
Mihique ceßi: pectus imbellis ferit  
Tremor, quatitque: faedus, ignauus timor  
Inuicta mentis maenia obsedit meae,  
Et iam triumphum ducit: en victus trahor;  
Sed ante pugnam. Magne tot rerum vndique  
Lustrator aether, cernis hanc tadam manum  
In vota nostra? quodque bis senis vaga  
Mens egit annis vna vt arguat dies?  
Dubitamus anime? caeca consilia aduocas?  
Hac hac eundum est. cernis, has cernis fores?  
Haec te beatum referet, aut nullum via.  
Iam perge, perge hac omen haud quaquam placet,  
Ter hoc labantem limine offendi pedem:  
'Recede rursus. haud capit periculum  
Angustior mens. cede prohibenti deo'  
Ignaue, demens, nisibusque impar tuis,  
Pactoque tanto. cede age, gressum refer,

*Haud solus ibis; dedecus comes tibi est,  
 Pudorque, sorsque aduersa, quaeque te diū  
 Foedo subegit dura paupertas iugo.  
 Quid agimus? haud si tota vis Mauortia,  
 Mucronibusque saeua districtis cohors  
 Vndam minetur hinc & hinc flammam mihi,  
 Et quicquid vsquam est; telaque in nostrum caput  
 Vibrata iam nunc impetu caeco ruant,  
 Premarque solus, spiritumque hunc hosticus  
 Cruore mersum tabido elidat furor;  
 Vsquam recedam. praeuius pes hic manet  
 Locoque fixus haeret: haud illum dei  
 Totusque retro mundus incumbens agat:  
 Non si trecenae membra diuellant rotae.  
 Gaude Philippe! dextera O ist haec mea  
 Quot te trophaeis vna victorem creat?  
 Inermis hostem magne rex fundis tuum.  
 Absensque vincis. Flamina, & vos O leues  
 Abite venti, dictaque & voces meas  
 Magno Philippo cedite, & rerum duci,  
 Suspendat arma. praelij stat finis heic,  
 Belli supremum terminum haec claudit dies.  
 Quo voluor amens? vela mens impos tua  
 Lege, & furoris dirigas clauum tui.  
 Tun' ora vt illa & frontis augustae decus  
 Vultusque tantae conscius fraudis feras?  
 Nec victus ibis? linguaque & vocis via  
 Potentiori vincta torpebit metu?*

*Et inter ipsae facinus horrebunt manus?  
Sudor trementes imbre pertentans graui  
Dissoluit artus. iunge, iunge & hunc tuis  
Bataufa titulis: victus accedo tibi.*

**AV.**

*Cessas Megaera sanguine vndantem sacro  
In ora taedam vergere? & pectus ferum  
Acherontis atro seminare toxico?*

**SI.**

*Pudet coruscos flammei Solis, pudet  
Videre vultus. desere ingentem poli  
Sol magne cursum, desere, aut terras ego  
Victus relinquo. cernitis? retro ruit,  
Trepidusque clarum polluit Titan diem,  
Comamque circum nubilo inuoluit suam,  
Et ora nostra deserit. mane, mane  
Cedemus ipsi: quo moues? tuam tibi  
Terram relinque Phoebe: nos Pontus feret  
Et hoc scelestum saxa collident caput.*

*INQVISITIO, ALECTO*

*MEGAERA TISIPHONE. TROCHAEI.*

**IN.**

*Noctis ignaue propago pallidae Stygis deae,  
Ite, turbidis lacerti squalleant serpentibus,  
Et veneni si quid vsquam Colchos extremo sinu  
Phasias regno scelestum victa cum mouit pedem  
Palluit, vel Pontus audax: quicquid vmbrosae domus  
Cerberus latrator ingens ore conceptum fero*

*Inuias ructans sub auras, magnus Alcidae labos  
 Gutture horruit trifauci, vique conspexit diem.  
 Quicquid Inous maritus mente deiectus sua  
 Herculis iussu nouercae, cum patris furtum pij'  
 Dactylos inter furentes, & Cabirorum choros  
 Tigridis fraenator Euan vagijsset: quicquid &  
 Teste furtim noctiluca feruidae stillant equae:  
 Saeua quicquidè sepulchris saga nocturnis legit;  
 Aridi bubonis ossa, & extaieiunae canis,  
 Et strigis iecur reuulsum, & pure conditum nouo  
 Faetidum bufonis inguen, & rubetarum canis,  
 Inter errores profanos mentis, & faedum scelus,  
 Et nefas, caedisque amorem, turbidasque lachrymas  
 Sanguine immistas recenti, languidisque luctibus  
 Et dolos, caecasque fraudes, aere versentur cauo.  
 Perfidum caput furentis mergite, & mentis viae  
 Horrido spument veneno, perque Echidnaeus furor  
 Intimas serpat medullas, & profunda pectoris.  
 Densioribus colubri sibilate nexibus.  
 O mei mei colubri, sibilo reconditum  
 Belgiae narrate funus. instat infelix dies,  
 Morsque prorumpens superbas tundit herois domos,  
 Vltimumque intentat ictum. Nescium sortis genus  
 Gaudia ah inter dapesque, funus operitur suum.*

## Scena II.

LOISA. NVTRIX

*QVis me solos procul hinc nutrix  
 Vehat in saltus? antraque nullo*

*Peruia passu, vel desertas*  
*Rupis latebras, inter querulos*  
*Volucrum luctus? iuuat obsessum*  
*Lachrymis nutrix pascere pectus.*  
*Iuuat ingenti soluere nutrix*  
*Fraena dolori. iuuat ignarae*  
*Soluere nutrix vincula mentis.*  
*Felix quisquis cognita luget;*  
*Late tendit dolor ignotus.*  
*Abit in lachrymas mens caeca suas,*  
*Et congressus hominum dulces*  
*Effugit. O quis*  
*Mediae ereptam murmure turbae*  
*Populos extra sistat & vrbes.*  
*O quis donet, totos animi*  
*Promere motus, aut ignotas*  
*Cernere curas!*

**N.**

*Alumna, vanis obsequi doloribus,*  
*Mentemque magni masculam cessa viri,*  
*Animumque maestis prouocare lachrymis.*  
*Qualis sonoris acta diu incudibus*  
*Ferri ridentis massa, vel crudus chalybs,*  
*Effossus alto desidi terrae sinu,*  
*Venisque matris, multa quem frustra manus*  
*Fabrûm fatigat, cum lacertorum graues*  
*Surgunt in ictus; ille vi tutus sua*  
*Laceßit altos, & retundit impetus*  
*Viresque cassas; post modo exili tamen*

*Domandus igne. talis herois viri  
 Mens alta, nullis quae labascit improbae  
 Sortis ruinis, aut loco cedit suo  
 Virtute noxa, viribusque, lachrymis  
 Vanisque cedit faeminarum questibus:  
 Inuictaque vnus pectora eneruat dolor  
 'Gemitusque sexus impotentis. lachrymae  
 Luctusque causa quilibet prior sua  
 Rationis expers, mentis irritatio est,  
 Obsoniumque lachrymarum; nam sibi  
 Nimis subinde vanus arridet dolor,  
 Seseque pascit, ipse dum fomes sibi est.'*

**Lois.**

*Somnia nostros terrent visus  
 Atraque noctis (fallax vtinam)  
 Plerunque nouae nuncia curae  
 Sensibus imis ludit imago.  
 Vidi nutrix (flebile noctis  
 Procul omen eat) vidi nutrix  
 Maiora metu.  
 Rex astrorum luce renata  
 Tremulos noctis Clauserat ignes  
 Phosphorus, & me domitor curae  
 Victos somnus strinxerat artus,  
 Oculosque leui sopor occultè  
 Vinxerat vmbra:  
 Vidi trepidum maesta maritum,  
 Subiti largos distillantem  
 Sanguinis imbres; vidi attonitos*

*Seu vicinae necis aduentu  
 Tendere vultus. terque ingenti  
 Gemitu ducto concidit, inque  
 Pectore nostro late effusis  
 Proruit vnus; Vltimaque (inquit)  
 Munera coniux, coniux coniux  
 Vltima nobis munera solue:  
 Trahor immensas retro coniux  
 Noctis ad vmbras; at tu vero  
 Crede sopori.  
 Sic effatus, procul aetherias  
 Fluxit in auras, somnusque simul.  
 Mihi cor gelido salit admonitu  
 Noctis amarae: curaque somni  
 Somno, Nutrix, longior ipso est.*

**AV.**

*Fidem sopori nescia asscribis tuo,  
 Noctisque fucum, & aemulos veri dolos  
 Alumna trepidas: somnij fallax parens  
 Spes est, metusque: sensibus deme hos tuis,  
 Excedet ille. Nauita exhorret fretum,  
 Venator imbrem: nocte vtrumque conditus  
 Vterque cernit, luce non credit tamen:  
 Dolumque noctis pura traducit dies:  
 Tibi mariti casta legitimi fides  
 Pererrat animum, coniugisque copulae  
 Amor süauem pectoris sedem tenet,  
 Semperque metuit: noxque succedens tuas  
 Et vmbra curas fraudibus versat suis,*



*Cum victa lenis membra decepit sopor,  
Sensusque somno dulce liquefacti iacent.*

**Lois.**

*Quis nouus ille, vel quibus ille  
Nutrix, Nutrix, vectus ab oris  
Hospes nostram missus in aulam est?  
Haud placet oris suspecta fides.  
Nos domus intro, pignusque vocant.*

### **Scena. III.**

Sicarivs. Avriacvs. Armiger. Chorvs. Satellitvm.

*Sic Sic eundem est; alterum chlamys latus,  
Sclopumque velat: alterum fraudi patet,  
Fidemque facto praestat, & dolos tegit  
Nihil tegendo: flammeis cor glandibus  
Et igne totas pectoris rumpam vias,  
Sedesque vitae. sensimus cassam fidem  
Ferri scelesti: nuper effluxit sinu  
Nisusque pene sica frustrata est meos.  
Vtinam reuulsis viscerum radicibus  
Liceat cadentis pectus etiamnum tremens,  
Suisque vulsa è sedibus praecordia  
Monstrare viuo, cernat vt partem suí,  
Mortemque viuus discat infelix suam,  
Pereatque saepe: vel calentes sanguine  
Tractare venas, extaue obscenae cani*

*Lanianda ferro soluere, aut volucris  
 Escam profanis; cura nunc duplex premit,  
 Necem tyranno molior, vitam mihi,  
 Perque alta praeceps vrbis erumpam vada,  
 Liquidamque forti corde transmittam viam.  
 Vtinam ter ille, morte funesta, horridâ,  
 Nouaque semper, ictibusque millibus  
 Fundendus esset. vna mors poenae parum est,  
 Nec digna nobis. O dies, O O dies,  
 O vna votis metaque & sinis meis;  
 Prompti subimus. debitum sacrum tibi  
 Votumque dudum, magne, Belgarum caput  
 Mactamus Alba. mente funestam iuuat  
 Versare caedem: bis iuuat, bis sanguine  
 Gaudere eodem: parua moriendi mora est;  
 Diu cogitando longior fiet tamen.  
 Crudelitatis tempus extendam meae,  
 Maiusque reddam. pectore ingenti exigam  
 Scelus futurum. Sic per vrgentem ferar  
 Populi coronam: sic satellitij minas,  
 Vultusque fallam: colla sic labens sua  
 Et palpitantes morte demittet manus:  
 Sic triste multa caede succumbet latus:  
 Sic imminente victus horrescet nece,  
 Toruusque totas pallor inuadet genas.  
 Adhuc moramur? trahimur, en pectus salit,  
 Notamque ceptis tesseram dedit meis.  
 Vocamur. euge: cura Diuorum sumus*

*Totumque votis annuit caelum meis.  
 En, ipse rara cinctus ingentem manu  
 Aulam relinquit, atriumque turbido  
 Inuadit ore, feruidisque greßibus,  
 Et sponte letho pronus occurrit suo.*

**AVR.**

*Dies diei cedit, atque annum nouus  
 Reducit annus, vltimusque saeculi  
 Finis, futuri primus est aevi gradus:  
 Voratque terram pontus immenso sinu,  
 Ingens Batauae continentis helluo.  
 At terra pontum rursus in sese trahit,  
 Vlcisciturque, & destinatas fluminum  
 Cano parenti praeuia exhaurit vias,  
 Praeoccupatque caeruli potum senis.  
 Sic cuncta sese lege nascendi premunt,  
 Pereuntque rursus, vt resurgant denuo:  
 Mutatque tempus cuncta, nil perdit tamen,  
 Semperque formas interim versat nouas,  
 Veteresque soluit, cunctaque vt pereant simul  
 Simul reseruat, cum tot annorum graui  
 Pressus ruina, rursus in sese labans  
 Dehiscet orbis, & superba machina  
 Magni quae in vlnis fixa requiescit poli  
 Reuulsa priscum diruetur in chaos:  
 Eritque rursus mundus ille, quod fuit  
 Cum nullus esset. Interim constans tamen  
 Natura solitas sedula retexit vias  
 Expers quietis, ocijque nescia,*

*Pensoque iussas admouet semper manus,  
 Suetumque fusum voluit. Has inter vices  
 Quotacunque rerum, totiusque pars, Homo  
 Excelsa mente vota percurrit sua,  
 Morique trepidat, cuncta cum cernat tamen,  
 Sortemque solus discit, & nescit suam.  
 Idemque vitae sanguinisque prodigus,  
 Crudusque lethi machinator est sui.  
 Cumque imminentis tanta sit fati via,  
 Aditusque mille, mille pereundi modi,  
 Audaxque Pontus, terraque in nos & ferus  
 Coniuret aether, flammaque & spumans aqua;  
 Mors arte creuit: ingenique munera  
 In nos, & ipsas vertimus fati manus.  
 Quodcunque durus mille sub fornacibus  
 Fuliginosis, aeris excercet faber,  
 Neci paratur: Mille sylvarum comae  
 Lethoque nostro vasta decrescunt iuga.  
 Illinc tot arma, telaque & magno graues  
 Emuntur enses: sternere haud gratis licet;  
 Preciosa mors est: cumque tot restent ferae,  
 Tot monstraque hominem fundit infelix homo,  
 Cedemque iactat, seque delegit neci,  
 Cum multa posset: placuit hoc vno sibi:  
 'Factumque longa temporis propagine,  
 Nobis triumphus, quod fuit quondam scelus.'  
 Hac tege virtus efferat armorum parens  
 Sese tuetur: talis ingentis soli*

*Fatalis ille subiugator & ducum  
 Altum Quirinus extulit terris caput,  
 Persesque Hydaspem, Bactraque, & saeuum Schyten  
 Rupemque falsi pendulam Promethëi  
 Prouectus olim, Caspiumque vltra mare,  
 Et fabulosis asperas Tirynthio  
 Bacchoque rupes, Hesperumque limitem,  
 Et parciozem terruit ferro diem.  
 Hac lege fortis quilibet semper fuit;  
 Vt saeuus esset. Hactenus tenui tamen  
 Grassata mors est saeua per terras via:  
 Per nos adaucta est: liberos morti sinus,  
 Et vela tota pandimus Belgae manu.  
 Prius irreperto, totque retro saeculis  
 Inusitato teximus lethum modo:  
 Dum fulmantis sulphure & flamma Dei  
 Imitamur ignes: pressus ingenti vapor  
 Caelum ruina terret, eliso globo  
 Mundus cavernas laxat, atque ingens humus  
 Circum pauoris conscia immensi tremat,  
 Populosque late verrit, & totum simul  
 Inuadit agmen parua quin etiam loquor;  
 Necantur vrbes, saxaque & moles deûm:  
 Nocetur orbi: totque nostra haec maenia  
 Euertit aetas, prisca quot fudit viros.*

**Loi.**

*Pudet fateri, pudet, at intremui tamen,  
 Nec lingua sequitur. deferor rursus Dei,  
 Et me reliqui. genua trepidanti labant,*

*Quotiesque gressum protuli, retrò feror.  
 Meliora volue: dicta modo constant tua,  
 Vultumque finge; tempus en ipsum iubet,  
 Locusque cunctas facilis excludit moras.  
 Agedum incipe, agedum. Longa nos tandem dies  
 Magnanime princeps (rursus in medio sonus  
 Defecit ore) Longa nos tandem dies  
 Magnanime princeps, patriam versus trahit:  
 At nunc fauoris obsides liceat tui  
 Mecum tabellas. Cecidit, en pronus labat.  
 Properemus, instat turba, nec reliquum sinit  
 Satellitum vis: pedibus hoc restat meis,*

**AVR.**

*O magne rerum genitor, en praeceps fluo,  
 Fluo, fluo, fluo, nec vlterius sinit  
 Mors ire uoci. O maxime memento pater  
 Populi, meique:*

**AM.**

*Pergite O comitum manus,  
 Pergite ah, ah pergite, ah ah pergite: en celer effluit,  
 Pergite ah furis scelesta persequi vestigia,  
 Ille postica cruentum saeuus emisit pedem,  
 Nos redundans sanguine atro triste fulcimus latus:*

**CHOR. SAT.**

*Properemus: hac pars vrgeat: pars hac ruat:  
 Pars tendat illhac: pars ad illa: pars ad haec:  
 At pars vtroque: parsque iuratos duces  
 Proceresque sistat: parsque ne lateat dolus  
 Circundet vrbem: parsque ne pateat via  
 Vsquam scelesto; rupta, deserta, aspera  
 Latebras. specusque, semitasque, & inuium  
 Scrutetur omne: ne quid occultum tegat,*

*Aut per prementes diffluat victor manus.*

**CHORVS.**

*Hactenus magni domitor tyranni,  
 Hactenus vasti dominus profundi  
 Nerëi rector Batauus, frementem  
 Subdidit vndam.  
 Ille vesanos Aquilonis imbres  
 Inter, & saeuas Boreae ruinas  
 Spumeum ridet mare, perque Iberum  
 Fertur & duras pariter procellas  
 Victor amborum: per vtramque, fati  
 Ille contemptor, rate tendit Arcton:  
 Patria angusta est nimis; impotenti  
 Sole torrentem populatur Indum  
 Publicus mundi pauor: ite reges,  
 Ille binarum dominus viarum est,  
 Caeruli fluctus equitator, ille  
 Turgidas inter nebulas, ferumque  
 Nascitur Austrum.  
 Vnda si rursus trepidumque castae  
 Saeculum Pyrrhae redeat, gravesque  
 Fluminum lapsus, celeresque fontes  
 Iupiter laxet ferus, & furentes  
 Soluat in imbres;  
 Tutus horrendas maris inter algas,  
 Inter & Protei pecus, horridasque  
 Eminens Phocas, & auara Cete,*

*Inter & blandas Thetidis sorores  
 Nabit optatas Batauus per vndas  
 Aemulus Glauci, patrijsque fiet  
 Incola ponti.  
 Patria huic tota est humus, est & aequor.  
 Patria huic nusquam est, & vbique, magni  
 Inquies mundi pera grator ille  
 Terminos rerum speculatur omnes,  
 Cunctaque audendo subigit; periculo  
 Altior omni  
 Vesperumque atrum premit, & superbi  
 Impetus regis, spoliūque, opesque  
 Illius praesens rapit, & beatas  
 Transuehit merces, medioque in hoste  
 Tutus ab illo est.  
 Pleiadum laetae praeueunt choreae,  
 Velaque aspectant, facilesque cursum  
 Dirigunt stellae, nimiumque mollem,  
 Nec parem magnis animo Batauis  
 Omnis astrorum chorus aureorum  
 Ridet Iberum  
 Peruigil noctu: quotiesque rursus  
 Luce demißis subeunt tenebris;  
 Praelia & pulsas referunt carinas:  
 Qualis immenso redeuns triumpho  
 Victor ingenti gelidum cruore  
 Strauerit VVorstus mare: qualis ante  
 Viderit flexos iterum Penates  
 Ire Lugdunum Patareia: quales*



*Aurea blandae volucres Diones  
 Mobiles olim tulerint tabellas  
 Consciae rerum, facilis ministrae,  
 Quas suo doctae precium camaenae  
 Mollium Dousae genitrix amorum  
 Miserat olim.  
 Totus arridet polus, & beati  
 Annuunt Diui, fremituque magnus  
 Dissilit aether.  
 Sed quid tumultu maenia ingenti tremunt,  
 Gemituque tota lachrymisque vrbs intonat?  
 Magnum minatur mutus & tacitus pauor,  
 Animumque terret cognitus nondum dolor.*

## Actvs. V.

LOISA. NVTRIX.

*FOrtes tyranni, & quisquis excelsa procul  
 Euectus arce, sortis optatae sedes;  
 Securus esto: tristia, & fraudem, & dolum, &  
 Felicitati proximum quicquid mâli est  
 Nusquam timeto: restat vltorius nihil;  
 Fortuna vires fregit in nobis suas,  
 Nil seruat alijs: perdidit patrem semel,  
 At bis maritum: vidit eadem nos dies  
 Viduas & orbas: vidua nunc rursus feror:  
 Si possem & orba. relliquum est ipsi nihil  
 Sorti, vel in me. quid meos cohibes sinus?*

*Desiste nutrix. quid meos luctus vetas?  
 Desiste nutrix. quid meas premis manus?  
 Desiste nutrix. quantus est, quantus dolor  
 Qui incipere nescit! quid, quibusue lachrymis,  
 Quô, aut vnde primam luctibus sternam viam?  
 Ibo, Ibo nutrix, desine: ibo ibo, & ferar,  
 Vt siquid animae restet infelix sciam,  
 Amplectar artus, si quid, O si quid super  
 Experiar, ibo. desine ah nutrix, eo.*

**NVT.**

*'Alumna, primum pectoris motum rege,  
 Violentus ille est: surdus est primus dolor,  
 Caecusque & amens, ipse nec cedit sibi  
 Mox longiori cedit aetati tamen.'  
 Quid ah dolores tempori seruas tuos  
 Mox eluendos? ipsa quin aetas tibi es?  
 Quin ipsa longi temporis vicem subis  
 Et munus aeui, teque iam reddis tibi?*

**LO.**

*Desiste nutrix. cuncta nunc subeunt mala,  
 Veteresque curas suscitât recens dolor,  
 Desiste nutrix; noster exemplo caret  
 Paremque nescit nescit, aequalem dolor.  
 Tot dicta nutrix, cassa tot solatia  
 Vocesque tolle. desine, aut opem feras.  
 Reddas parentem, ne meum gemam virum,  
 Reddas maritum, ne meum gemam patrem.  
 Quid prisca refero? sufficit nunc vt gemam  
 Quod nunc peractum est. languor hoc nutrix mihi  
 Hoc illa mentis visa spondebant meae.*

*Nunc nempe credor. sera quam fides mihi est?  
 Properate famuli; cernite. an quicquam spei  
 Nobis relictum est? cernite. an vitae leuis  
 Modo restat aura? lapsa reliquias legam  
 Vitae fugacis, oreque os illud meo  
 Gelidasque tepidi pectoris latebras premam.  
 Permite tantum. pallidis sed engenis  
 Germana maestos illius gressus refert.  
 Mens nosse casus ardet & refugit suos.  
 Agnosco vultus. loquitur infelix dolor,  
 Ille Ille sortis mutus est index meae.  
 Deficio nutrix corpus infelix humi  
 Lapsum, dehiscit, mensque sub tenebris latet  
 Vitam aeuiteris. caeca nox oritur mihi  
 Sequimur marite.*

**NVTR.**

*Concidit. dolor sibi  
 Incumbit ipsi. perdidit vires suas  
 Mens cum marito. Alumna, quid praeceps abis?  
 Alumna mentem recipe & extollas tuam.*

**CHOR.**

*Quid maesta luctu deficis princeps tuo?  
 Lugere nostrum est: munus haud recte meum  
 Praeoccupasti: munus inuadis meum.  
 Tibi maritus occidit; princeps mihi:  
 Plebeius iste luctus est, virum gemis  
 Commune nomen: nomen hoc vulgo patet.  
 Quaecunque noctem pura dispellit dies,  
 Flauamque Solis explicat magni comam,  
 Virum maritae demit, & natae patrem:  
 Viduus, vel orbus, quisquis est, sortem gemit;*

*At inter omnes: occidit princeps mihi.  
 Quod nomen illi luctui inueniet dolor!  
 Quis luctus ah est ille qui dici nequit?*

*Ah ah ah ah.*

*'O quam vario Turbine pessum  
 Gloria rerum sublimis abit?  
 Nempe insidiae, frausque, dolique  
 Sunt excelsae nomina sortis:  
 Lare priuati nequit exiguo  
 Fortuna parens varium tuto  
 Voluere fusum.  
 Nimium magnae domui semper  
 Proxima, nulla est.'*

*Hei mihi quantos aethere vectus  
 Circum iugales Phoebus auratos agens  
 Casus tuetur, quotque scelerum nomina,  
 Dolosque caelo spectat, & fraudes suo,  
 Seram priusquam condat occumbens facem!  
 At nos profundas credimus solem tamen  
 Ferri sub vndas: ille nostris fraudibus  
 Contaminatum diluit Ponto caput,  
 Vultusque terris surripit lubens suos.  
 Hinc ille puras fluctibus mergens comas  
 Rubore circum fulgurat tinctus nouo:  
 Pudor ille nostri est: cernite aspectum Dei,  
 Pudibundus ille semper è terris abit.*

## LIBERTAS. SAVCIA

TELLus & aequor, languidique fluminum  
 Cursus & amnes: quique per Batauos pater  
 Trepidante multus Rhene prorumpis vado,  
 Vndas ministra. tuque qui terras tegis,  
 Magnoque maestus incubas aër solo;  
 Pluujijs perennes tristibus laxa sinus:  
 Lachrymis egemus. lachrymas caelum tuas  
 Adiunge nostris. vndique in nubes eas,  
 Incumbe terris. ipsa quin etiam tua  
 Duplicanda nox est: occidunt soles duo,  
 Tuus meusque: longa nox terras premat,  
 Vicesque solitas perdat infelix dies,  
 Facinusque condat. Hactenus malum tamen  
 Lugere potuit quisquis aspexit suum,  
 Intraque luctus constitit metas dolor,  
     Ah ah ah ah.  
 Maiora geminus: nomen exceßit dolor  
 Lachrymasque nostras, fletus haud noster sat est,  
 Lugendus ipso maior est luctu dolor;  
 Minorque merito. digna quis luctu queat?  
 Moriuntur omnes: funere illius iacent  
 Quoscunque tangit: Funus est quisquis videt,  
 Et funus vrbs est: publicum funus iacet  
     Ah ah ah ah.

## L.

Spectate ciues: quisquis haud didicit mori

*Hoc teste discat. illa maiestas viri  
 Dictumque Marti pectus, atque horror soli  
 Ingens Iberi, cuius occursum ferae  
 Tremuere gentes, cuius inuictam manum  
 Grudij feroces, concidit iacet, iacet.  
 Adeste ciues: lachrymas iuro meas,  
 Et illud atra caede transmissum latus;  
 Inuictus ille est: saeua nec mors id negat,  
 Ipsumque lethum fraude superandum, docet  
 Nequijisse vinci. talis immanis Phrygum  
 Metus Ilijque, Troia quem nutans decem  
 Tremuit per annos, vltimus Priami gener  
 Sed iam sepultus: ille qui toruum Hectora  
 Potuisse vinci docuit, & mori simul;  
 Helenes mariti victima infelix iacet.  
 Talisque & alter ille Danaorum pauor,  
 Spoliator Asiae, ductor Argiuae manus  
 Adultero seruatus & taedae suae,  
 Intactus alijs, fraude superatus fuit:  
 Sed post triumphum: concidit victor domi  
 Bello superstes. Funus hoc funus iacet,  
 Fateor Philippe, dextera scurrae tamen;  
 'Non potuit aliâ, teque vincendo male  
 Victum fateris. proh dolor, proh proh dolor.'  
 Ah ah ah ah,  
 'Priuata lachrymis damna defleri queunt,  
 At cum ruina totius quisquis iacet  
 Gemendus illi est: integer vires suas'*

*Expromat orbis, concidit, iacet, iacet.*

*Ah ah ah ah.*

*Ingens cauernis mundus euulsis fremat,  
Gemitumque reddat. tuque, tuque O fulminis  
Potentioris magne librator Deus  
Percurre vastas aetheris tonitru fores;  
Condi minore moenia tantus nequit.  
Haec tuba sepulto praebeat, immanem polo  
Quae eiecit Otum, quaeque flammaram patres  
Rursus parenti reddit caesos suae  
Titanas olim. Vesper extremus tremat,  
Ruptoque videat orbe quod fecit nefas,*

*Ah ah ah ah.*

*At vos Batauûm corda, gens Neptunia  
Obnubite atris hinc & hinc amictibus  
Vrbem domosque: tota ferales gerat  
Natura cultus, luctui angusta est nimis  
Humana turba: si quis armorum comes  
Ostro superbum cornipes tollit caput  
Velamine atrum flebili radat solum:  
Lugere non sat tota gens hominum sumus,  
Accedat alter lachrymis nostris dolor.*

*Ah ah ah ah.*

*Adeste ciues: patriae fulcrum iacet  
Sopore tristi victus, O fatum, O dolor  
Haec illa sedes mentis, hoc illud caput  
Prudentiarum viua, dum vixit, domus,  
Exceßit, abijt: restat illius nihil*

*Nisi auferendum, nil nisi abendum solo.  
Effodite tumulum, qui sit ambobus satis:  
Tumulanda ciues patria, & patriae est pater.*

*Heu heu, heu heu.*

*Efferte funus. Praefica est magno duci  
Natura rerum: funus hoc parui nihil  
Admittit in se: scilicet princeps Dei  
Iacet: vniuerso nomen illud nascitur  
Aequale mundo. Sequitur & retrò venit  
Oceanus atra flebile redundans aquâ,  
Terramque pulsat tristis, & lachrymas agit,  
Vt ante spumas. Sydera, & caeli vagum  
Comitetur agmen, pompa feralis veni  
Stellae minores. tuque qui caelum secas  
Niueoque parum lacte distinguis polum  
Aurate trames, caerulea Heroum domus,  
Genijsque magnûm destinate principum  
Dimitte ciues cras recepturus tuos;  
Hodie vacabis: igneae caelum faces  
Relinquite omnes: Hesperus maneat tamen,  
Scelus execrandum querimur Hesperij soli.*

*Heu heu heu heu.*

*Tuque igneorum magne signorum Leo  
Regnatur, O qui flammeo motu minax  
Chelas rapaces propter, & rictus feros  
Horrentis Hydrae caede viuacis sua  
Emergis altas igne vestitus iubas;  
Defende nostrum: latius toruos polo*



*Protende vultus: O inauditum prius;  
Leo Batauus tremuit, & fugam parat!*

*Heu heu heu heu.*

*Tuque a Tonante passa stuprum, at faemina,  
Lycaone prognata, descendas licet,  
Nostroque longam Nereo sedes sitim,  
Et pellicatus eluas sordes tui,  
Vt pura venias: si lubet, natum trahe;  
Vel cum sagittis: nulla fraus maior potest  
Nobis timeri, concidit, iacet, iacet  
Cui cauere nostra consuevit fides.*

*Heu heu heu heu.*

*At tu Boote plaustra tantisper tua;  
Solitumque cursum cohibe, & in terras eas,  
Mox axe funus illud extollas tuo,  
Diuisque fraudes omnibus monstra nouas,  
Artemque Iberam. tuque vocalis lyra  
Fidibus remiſſis carmen infelix sona,  
Tuumque cantu demereri denuo  
Delphina discas, iungat vt latus tibi,  
Neptuniosque transuebat dorso choros  
In iusta nostra. tuque qui consors lyrae  
Illustre caeli Cygne praetentas iter,  
Nixusque in alas aureo emergis polo;  
Fatale triste voce moduleris melos:  
Sed quale ripis flebilis Caystrijs  
Tepidis in vndis morte vicina sonat,  
Lateque canta; concidit, iacet iacet,*

*Cor Illud orbis, magna Belgarum salus.*

*Heu heu heu heu.*

*Adeste ciues. quis feretro huic graues  
 Supponet humeros? ponderi quis par erit  
 Moliue tantae? sidera haud vltra moror.  
 Namque ille caelum qui labantis in modum,  
 Similisque fesso magnus Alcides tenet  
 Totus remisso lapsus occumbet genu.  
 At tu pudicae magne Pleiõnes nepos,  
 Tegeatice ales: inter errantes globos,  
 Interque Diuos, inferosque, qui subis  
 Totidem labores; huc auum sistas tuum,  
 Illum potentes caelifer qui sustinet  
 Defessus axes: mundus interea licet,  
 Totumque ruptis postibus caelum ruat.  
 Nihil moramur. concidit, iacet, iacet  
 Ille orbis ingens splendor, O fatum, O Dei,  
 Heu heu heu heu.*

*Spectate ciues: pileum hic linquo meum  
 Iuxta cadauer illud, vt sacras procul  
 Secum sub vmbras ille qui dedit ferat.  
 Quin & capillum verticis messem mei  
 Quem tum totondi, rasa cum primum coma  
 Solenne sortis munus addeuit meae,  
 Mando sepulto. crinibus totum meis  
 Vestire circum corpus infelix iuuat,  
 Ah funus illud, funus illud O Dei.  
 Nunc hoc fauoris munus extremum ferat,*

Quin me quoque ipsam; perdita a vobis eo  
 Proscripta ciues, exul à vobis eo.  
 Valete ciues, sancta libertas abit.  
 Spes nostra cecidit, concidit, iacet, iacet,  
 Heu heu heu heu.

Quo me immerentem mittitis Dj? quo ferar?  
 Gressumue referam? Sarmatarum vltra niues  
 Tanaimque & Istrum, vel remotas horridi  
 Boreae pruinas? quo nec humanum gelu  
 Indulget adytum, nec pedum vestigia  
 Hominumue passus Schyticus admittit rigor?  
 Heu heu heu heu.

Inter cauernas, vel ferarum tristia  
 Spelea vultus obruam terra meos.  
 Pertaedet hominum; perfidam fraudem & nefas,  
 Tristeisque caedes cernere haud vltra queo.  
 'Valete terrae. tot truces inter feras  
 Lupasque, & vrsas, & graues minacium  
 Iras leonum, & ora toruorum boum  
 Nil terra domino tristius gerit suo.  
 Homo omne monstrum est: ille nam celat feras  
 Quotquot timentur, ille crudeles leas  
 Lupasque & vrsas, pectore obscuro tegit.'  
 Valete ciues, sancta libertas abit,  
 Abiuit ille, quem videtis hic tamen,  
 Abiuit ille, praeuium è terris sequor.  
 Valete ciues. sancta libertas abit.  
 Heu heu heu heu.

FINIS

## Princeps Mavritivs Lvgdvno Redvx

**B**ATAVA tellus, coerulei sedes DEI,  
 In hoc vocamur? una spes dies tibi,  
 Nobis parentem sustulit. felix cui  
 Luctum fateri lachrymis licet suum.  
 Cum patre nobis tollit & luctum DEVS.  
 'Lachrymare magnus nescit Herois vigor,  
 Nec illud altum nomen in pectus cadit:  
 Lachrymare nescit, quisquis ulcisci potest.'  
 Lugete cives. quisquis hoc funus gemit  
 Mecum orbis ille est. iungit hic omnes dolor.  
 Lugete cives. magna me fixum tenet  
 Moles iuventae. Vos dolis, vos perfidar  
 Crudelitati, fraudibusque: ego meis  
 Indignor annis. Magne terrarum parens  
 Cur tarda lento pergit Heroum gradu  
 Aetas, nec ipsam protenus metam tenent  
 'Anni morantes? O DEVS, serò nimis  
 Quicumque Divi nascimur, viri sumus!'  
 At tu citatum Diva quo moves gradum?  
 Quid Diva nostrum profuga destituis solum?  
 Per hunc paternum sanguinem, numen meum,

Fraudemque, quam non tempus, aut anni graves,  
E pectore illo, non profunda saecula, aut  
Oblivionis genitor evellet dies;  
O Diva, siste Diva, nec parvas manus  
Aut hos lacertos sperne; magnus incola  
Virtutis autor igneae hîc habitat DEVS,  
Pectusque pulsat hoc, & invitus suis  
Latet sub annis, saeculumque despicit.

At vos Parentis inclyti Manes mei,  
Tuque vmbra, quae per aureas DEÛM vias  
Orbemque nostris invium pedibus volas;  
Divis Paternis dic, & Heroae manu,  
Nassovijsque, civibus poli, Deis  
Avoque magno, cuius ausa regia  
Idemque nomen indolem vocat meam;  
Spectet nepotem Genitor, & nostris adhuc  
Ignoscat annis. Tuque pacatus precor  
Tantisper esto, redditus donec mihi  
Victor Batavâ Vespersum invadam trabe,  
Manesque Iberâ caede satiabo tuos.

Finis.

**Pag. 65. post illa: *curaque somni Somno, Nutrix, longior ipso est. inserantur haec.***

TALIS, ad vndas cum, Scaldi, tuas  
Propè fatali concidit ictu,  
Horrida multo sanguine, Nutrix,  
Sustulit ora.  
Quid tamen haec nunc iterum, Divi,  
Cura recursat?  
Ite sinistrae nubila mentis.  
Felix modicos quisquis sentit  
Pectore motus! felix placidi  
Rector aratri, felix teneri  
Dux armenti. Viridi tutus  
Ille sub umbrâ tepidos halat  
Pectore somnos: lassior illic.  
Videt aequa suae somnia vitae.  
Et modò dulces amittit oves,  
Modò surreptam pallet avenam.  
Haec domus illi,  
Totaque res est.  
'Felix quisquis tenuis tranat  
Tempora vitae!  
Felix quisquis modico sortem  
Fallit agello!  
Felix quisquis mediae fallit  
Agmine turbae!  
Numeroque latet tutus in ipso.'

**In colymbas Lvgdvni vltro citroqve missas in obsidione, quarum  
in Tragoediâ nostrâ fit mentio.**

PERFIDVS *ingentem vesano milite Leydam  
Cinxerat, & vasto robore miles Iber.*  
Terra, *salumque, inquit, mea sunt: via nulla salutis:  
Nulla patet puppi semita, nulla viro.*  
DOVSA *meus, medio, spe libertatis, in hoste  
Liber, & inuicto pectore tutus erat.*  
Ille, *Polus (dixit) domini est immunis Iberi,  
Et tua sola mihi, Iupiter, aula vacat.*  
Hinc quoque *fas nobis patriae sperare salutem:  
Ille mihi Minos hâc fugiendus erit.*  
Quò patriae *non tendit amor? mandata referre  
Postquam hominem nequijt mittere, misit auem.*

Ipsas autem literas pennis columbarum inclusas, ad Nobilissimum & Amplissimum IANVM DOVSAM, patronum nostrum vnicè colendum datas, domi ipsius vidimus, cùm apud eum aliquandò diverteremus.

**Διονυσῶ τω ἀριστῶ καὶ μαρῶνι τῶ φιλοποτῶ τοῖν τῆς ἐναγωνίου  
τραγωδίας ἐπιστάταιν.**

Λῦτο δ' ἀγῶν Διόνυσε· Μάρων φίλε σοι δὲ μελήσει  
 Σῶμα περ ἀργαλέω γήραϊ τειρομένω  
 Στήσασθαι κρητήρα βεβυσμένον ἠδέος ὄνου  
 Βακχιάδος γλυκερῆς ἔγκυον ἐυφροσύνησ·  
 Νονιακῆς οἶον πάλαι ἐν σελίδεσσι πέτρωκας  
 Ἀμφὶ τάφον φίλου σευόμενος Σταφύλου.  
 Οὐ τράγου ἐυπῶγωνος ἐμοὶ μέλει, οὐ μὰ δι' οὐδὲν,  
 Λάτρις ἐγὼ Μουσῶν· τί τράγε σοι καὶ ἐμοι;  
 Μοι τραγικοῦ περ ἀγῶνος ἀέθλια πινέμεν εἶη,  
 Ἐκ δὲ πιόντ' ἱεραῖς μαρνάμεναι λατάγαις.  
 Γυμνασίω Βρομίῳ τάδε πρέπε· σὺν γὰρ ἀέθλω  
 Αὔσαμένω πᾶσαν φροντίδα λυσάμεθα.  
 Τ' ἄλλα σοι οὖν ἀφήμι πάτερ· διψῶν γὰρ ἐγὼ τοι  
 Οὐ τράγον, ἀλλὰ μόνους φίλ' ἄγαμαι βατράχους.

Δανιηλ Ἔινσιος.



## Nobilissimo, Amplissimo, Clarissimoqve Viro Iano Dousae

### Domino in Noortwyck.

NVPERRIME cum apud nostru coenarem Nobilissime Domine, ille vt semper de communibus Musis agit, schedam mihi quandam tradit de Batauiæ vestrae Mirandis, in quâ obiter eadem commemorata erant, eodemque ordine quo hic vides. Petijt autem vt ipse Latino carmine ea complecterer; se quoque argumentum idem tractaturum. Ego, cum cogitatem quanto cum fructu meo semper ab eo victus fuerim, parui imperatori meo, vt gregarium militum aequum est. Ille quoque idem praestitit, seu potius praeiuit, & vt hunc veternum meum excuteret, vtraque linguâ a se conscripta mihi tradidit. Volui autem, quòd de Batauiâ vestra in Tragoediâ meâ multa occurrant, hic potissimum legi, tibi que illa mittere quoniam & ipse magnus ille vir sermonem ad te direxit Dousa Nobilissime. Ego autem cum omnia in diuino illo *literarum* Monarcha mirari soleam, tum maxime tam promptam hac senectâ aetate venam, praecipueque in poësi Graecâ, in quâ, fateor nullum ne inter veteres quidem esse, qui palmam prae illo ferre possit. Ille quotiescunque me videt (quod fit quotidie) lacessam te inquit mi Heinsi, accum dicto Martialem arripit ac epigramma aliquod in Graecum sermonem conuertendum proponit mihi, idemque agit ipse: ita fit vt & sua tradat mihi, & pro eis recipiat mea, reuera χρύσεια χαλκείων. Noui atuem, ego quanto cum fructu meo illi cedam: vt magis è re victi id sit, quam vincentis. Interim te ac quicumque haec lecturus est obtestor, Dousa Nobilissime, te per domesticam, ubique propriam Deam Humanitatem, quae cum eruditione coniuncta, virum magnum ac generosum perficit. per Musas omnes & sacra nostra: ne ostentandi. aut gloriolae captandae gratiâ, mea cum ipsius me iunxisse existimes, sed excercitij tantum. Scio enim ne ipsis quidem gigantibus τὸ θεομαχεῖν bene successisse. Vale nobilissime Domine, & Hesiodum nostrum, cum quinque Graecis interpretibus sub nomine tuo breui (vt spero) edendum, expecta.

**De mirandis Batauiæ.**

*Ignorata tuæ referam miracula terræ  
 Dousa, peregrinis non habitura fidem.  
 Omnia lanitium hic lassat textrina Mineruæ.  
 Lanigeros tamen hinc scimus abesse greges.  
 Non capiunt operas fabriles oppida vestra.  
 Nulla fabris tamen hæc ligna ministrat humus.  
 Horrea triticeæ rumpunt hic frugis acerui.  
 Pascuus hic tamen est, non Cerealis ager.  
 Hic numerosa meri stipantur dolia cellis.  
 Quæ vineta colat nulla putator habit.  
 Hic nulla, aut certè seges est rarissima lini.  
 Linifici tamen est copia maior vbi?  
 Hic me dijs habitamus aquis. quis credere possit?  
 Et tamen hic nullæ Dousa bibuntur aquæ.*

**Idem Graece.**

ὙΜετέρης ἐρέω νηπευ θέα θαύματα γαίης,  
 Δουσιάδη, δύσπιστ' ἄλλοδαποῖς αἶειν  
 Ενταῦθ' οὐκ ἄρκουσ' ἐρίοις ἰστώνες Αθήνης.  
 Πῶυ δὲ φροῦδον ἅπαν ἐιροπόκων οἴων.  
 Ἄστυα χειροβίους οὐ χωρεῖ τέκτονας ἄνδρας.  
 Ἐργασίμης δ' ὕλης ἐστ' ἀχόρηγον ἔδος.  
 Σιτοδόκους πυροῦ σωροὶ ῥηγνῆσι καλιάς.  
 Βούβοτος ἢ γαίη δ' οὐ φιλοπυρος ἔφυ.  
 Ἄπλετοι ὦδ' οἰνοιο νενασμένα ἐῖσο πιθάχλαι.  
 Οὐδενὸς οἰνοπέδου δ' ἐστὶ φυτηκομίη.  
 Ουδαμὸς ἢ σπάνιος τῆδε σπόρος ἐστὶ λίνιο.  
 Ποῦ ποτὲ δ' ἐῖσι λίνου πλείονες ἐργασίαι;  
 Οἰκίαι ἐῖσι μέσοισιν ἐν ὕδασι τὶς κε πίθοιτο;  
 Ὑδροποτεῖ δ' οὐδεὶς ἐνθάδε Δουσιάδη.

IOSEPHVS SCALIGER  
 IVLII CAESARIS F.

**De ijsdem.**

*Dousa faue: in vestris quaedam mihi visa Batauis  
 Pauca quidem mens est dicere, vera tamen.  
 Omnia Palladiae compleverunt oppida lanae  
 Laniferas hic quis pectere discit oues?  
 Plurima cum fabris fabrilis copia ligni est;  
 Ligna tamen vobis omnia, terra negat.  
 Plus cereris nusquam est: nusquam paene educat illam  
 Terra parens bubus officiosa suis.  
 Dolia sunt hic Bacche tui plena omnia, suntque  
 Plurima, cum desit vinea, vina tamen.  
 Nullaque gignendis lassantur pascua linis,  
 Linificas lassant hic tamen illa manus.  
 Tantalidae nos Dousa sumus: circumdamur vnda,  
 Et tamen hanc tantas quis bibit inter aquas?*

**Idem Graece.**

Ἰλαθι Δουσιάδη, τὰ τεῶν μεμάθηκα Βαταύων  
 Παῦρα, λίην δὲ γέρω θαύμασιν εἰδόμενα.  
 Εἶρεα μὲν πασὺς σφίσιν ἐπλήρωσε πόληας  
 Εἶρο πόκουσ δ' ὑμῶν τίς κομέει οἴας;  
 Ξυλόπονοι πέλον ἄνδρες ἀπειρέσιοι, ξύλατ' ὤδε.  
 Ἀξυλον αὐτὰρ ὄλον σφιν γέγονεν πεδίον.  
 Οὐδαμόθι πλείον Δημήτερος.  
 Ἐτρεφε γῆ, βουσὶν πλείστα, χαριζομένη.  
 Πας δὲ πίθος Δίονυσε σέθεν γέμε· πολλοὶ ἕασιν  
 Ἀμπελινοὶ καρποὶ, ἄμπελος οὐδεμίη.  
 Οὐδὲ λίνους ἀπαλοῖσι καταβρίθουσιν ἄρουραι·  
 Τὰς δὲ λῖνα πλήθει χειροβίων παλάμας.  
 Ἰανταλικὸν γένος ἔσμεν, ἐπεὶ ποταμοῖς στεφόμεσθα.  
 Τίς δὲ τόσων γεύει Δουσιάδη ποταμῶν;

DANIEL HEINSIVS.

**Danielis Heinsii lambi partim morales, partim  
ad amicos, partim amicorum Causa scripti.**

## In Divinos Danielis Heinsii Iambos.

### *Petri Scriverii Scazontes.*

AMICE magne, ô insolens CABALLINI  
 Potor fluenti, Musicique concessûs  
 Dictator HEINSI; quò rapis tui plenos  
 Lepore? quas nos ducis in specus FRATER?  
 Iamdiu COTHVRNVM vidimus SOPHOCLEVM,  
 O non inane cymbalon TRAGOEDORVM!  
 Nunc nos quid istis (nam fatebimur verum:)  
 Inusitatis cogis emori IAMBIS?  
 En qui solebat impigro celer passu  
 Ad te venire IAMBVS, iste nunc jurat  
 (Misellus heu!) se CLAVDICARE vix posse.  
 Placet, Poëta, hoc ergò? pro Tribunali  
 Sedere te plorantibus MAGISTELLIS!  
 Hîcque è Curuli carmen ad luuentutem  
 Referre sanum, vividumque! Nos verò  
 Blennos, ineptos, perperos, Poëtaistros  
 Iacère mancos cruribusque prae fractis!  
 Feramus, ô, feramus: osque ROMANI  
 Sermonis istud Atticique discamus  
 Optare cunctos, impetrare felices.

**Prosopopoeia amplissimi Clarissimiqve viri Claudij Puteani,  
senatoris regii.**

*O Qui coruscum diuidis vultu diem  
 Ingens serènae lucis arbiter Vale,  
 Vxorque curis vna solamen meis  
 Consors thorique patriaeque, quae meum  
 Faecunda blando germine auxisti genus,  
 Cingens pudico tecta patris agmine.  
 Et vos meorum turba parua liberûm  
 Imago viua, parsque dulcior mei,  
 Ah ora blanda, vultibus vultus meis,  
 Patrique dulces iungite extremùm manus:  
 Haec sola restant. Testor immiteis Deas,  
 Mortemque nostris terminum extremum malis,  
 Solemque vitae fulgidum testem meae,  
 Caelique iunctas semper ardentis faceis,  
 Neruisque pondus Galliae incumbens meis,  
 Lareisque dulceis, queis puer gaudens ego  
 Productus hausì principem vitae diem,  
 Curaeque lusi nescius; vixi satis  
 Laudi, mihique; patriae tamen parum,  
 Vobisque nati: patria infelix trahit,  
 Et ora vestra, vestra, quae mortem iubent  
 Gratam vereri. Dum tamen puertiae*

*Aetas serenos dulcis admittit dies,  
 Nihilque scire dulcior scientia est;  
 Spei, metusque viuite immunes, procul  
 Extra superbas casuum tuti vices  
 Ignara turba, matris inter oscula:  
 Lusuque mentem, mollibusque gaudijs  
 Maestae parentis spes relicta pascite:  
 Donec per annos cura succedens suos  
 Foriue tristis ardor, aut feri labor  
 Mauortis acres poscit in bellum manus:  
 Heic patris este: caeterum matri lubens  
 Tempus relinquo: donec impotens sui  
 Inter suaues vita voluitur iocos,  
 Interque ludos errat, & crepundia  
 Innoxia aetas, gaudijs fauens suis,  
 Paruoque laeta mobili exultat pede.  
 Viros reposco: Seria aetatem decent  
 Me digna quae sit: vindicat sibi hanc pater.  
 Hanc illa nostra vita in exemplum trahat,  
 Vehatque in alta rerum, & ingentes sinus,  
 Motusque vastos patriae curas meae.  
 Virûmque in ora tendat, & ciuilibus  
 Fraenare pergat patriam ardentem malis,  
 Caecasque legum peruagarier vias  
 Erectus alti pectoris discat vigor.  
 'Ah quot per alta Syrtium discrimina  
 Emetiendum, saxaque alta, restat hoc  
 Quodcunque vitae est! Gallia infelix docet'*

*Vel omnium instar: ipse fortunae iocus  
 Gens illa nostra est, casuumque lusibus  
 Submittit acres patria infelix manus.  
 Hic pontus ergò, turbidum hoc vobis mare  
 Gens blanda restat, horridi per aequoris  
 Has fluctuantes flamine aduerso vias  
 Enauigandum est, quaque publicum mare  
 Rerumque feruet vnda: me portus tenet:  
 Legitque nostrae saeua, vela, mors ratis,  
 Extraque curas, ciuicasque in arduum  
 Sistit procellas. Patria aeternum vale  
 Dulcesque nati: blanda me quies vocat,  
 Aisque sanctam patribusque molliter  
 'Mentem refundo. Scilicet, quantum est Deus  
 Interque vitae munia, & fluctus vagos  
 Duxisse castos, noxijs procul, dies,  
 Doloque puras tollere ad caelum manus  
 Mauortis altos niter impetus; neque  
 Contagiosâ temporum premi lue!  
 O Vita vita, noxios cautes tegis!  
 Symphlegadesque mille labentem trahunt  
 Et hinc & inde, lucraque incautum ferunt  
 Aetatis orbem, peruicaxque auri furor,  
 Vanumque Honoris nomen, & Potentiae.'  
 Ignosce fasso patria, ah beatius  
 Priuata paruos inter exigit lares  
 Annos süaueis vita, & exilem domum,  
 Interque vultus coniugisque, & aurea*



*Senescit ora liberorum; spesque ouans  
 Gaudensque semper terminat tecto suas.  
 Non ille vastas regis exhorret minas,  
 Aulaeque fluxam pallidus gemit fidem,  
 Lutetiaeque semper vndantes vias  
 Turba clientum cernit, & vanas opes,  
 Interque natos tutior regnat suos,  
 Securus, insons, innocensque, supputat  
 Annos aristis ille, solibus dies.  
 Idemque seruit, & beatus imperat,  
 Magnumque nescit: terminus voti & viae  
 Agellus illi est, paruulumque rusculum,  
 Focoque diues suscitatur, paruam larem,  
 Motusque scaeuos ridet, & rerum vices,  
 Sortisque lentum fulminantis impetum,  
 Thoro, casaque tutus arcet, & procul  
 Lasciuienti cedit abditus deae:  
 Aetasque curas inter effluit suas;  
 Vicina nescit: nocte pacatus iacet,  
 Soporque fessas mitior fouet genas.  
 At nos parentum celsa per vestigia  
 Fastidiosus purpurae affluit decor,  
 Regnique habenis destinavit inclutam  
 Virtute mentem, patriaeque fluctibus.  
 Vidi cruentas caede regia vias,  
 Versasque & in se Galliae ardentis manus,  
 Ingensque rerum pars labantium fui,  
 Nec cura fallax pestilensue munerum*

*Virtutis alta nube suppreßit diem,  
 Immobilemque motui infixi pedem,  
 Mentisque nixus robore excelsae steti  
 Inter procellas, vorticesque. Nil tibi  
 Fortuna mecum est: inter immanem fori  
 Horrentis aestum, & ciuium molimina,  
 Et execrandum factionis impetum,  
 Vocesque, & atram carceris caeci luem;  
 Integra semper pectoris magni fides,  
 Legumque sanctus cedere inscius rigor  
 Immotus haesit: cum ferâ plebes manu  
 Discordiarum vindicem oppreßit Togam.  
 Idemque, fausta gentis inter omina,  
 Velo secunda sorte subduxi pedem,  
 'Licentiaeque terminos. illustrior  
 Peccare laus est nolle, cum poßis tamen.'  
 Et nunc suprema, tritaque omnibus via  
 Eunda: & ingens semita è terris vocat  
 Iterque magnum: jam soluta denique  
 Humanitatis vinculo, in sese labat  
 Pars quassa nostri, tollimurque: & heu prius  
 Mors ipsa nobis quam senectus appetit,  
 Cursumque rumpit. Viximus tamen: neque  
 Frustra, (Paterna testor arua, & te deus  
 Ducemque vitae principemque) luminis  
 Hausi süaue munus, aut vitae diem.  
 'O mors, quot ah quot casibusque, & asperis  
 Discenda curis grata vix tamen venis!'*

*Naturaque vltro gaudet, inuisam licet  
 Seruare lucem, corporisque onus sui  
 Sublimis altae mentis affectat nitor,  
 Premique gaudet. Ibimus tamen, tamen,  
 Et vos lacerti coniugis dulces meae,  
 Lenisque vitae deserenda semita est:  
 Castique amoris arbitrum linquo thorum  
 In his superstes liberis, vnusque eo  
 Plures relinquo: Faenus hoc rerum parens  
 Indulsit vxor: haec tibi solatia,  
 Viuaeque restant, patris amißi notae.  
 Quotiesque dulces osculo premis genas  
 Patris memento, postque basium tuum  
 Adiunge nostrum, lachrymamque molliter  
 Distilla amoris pristinum testem mei.  
 Et nunc, domusque tota, curaque omnium  
 Reclinat in te: Liberorum grex tener  
 Ah patre dulci destitutus, vnicam  
 Te spectat, eheu, vultibusque haeret tuis,  
 Opemque poscit: mater ah olim modo;  
 At nunc vtrumque es: omne discedens pater  
 Transcribit in te: spem sine hanc tui feram  
 O dulcis vxor, lenius mortisque onus  
 Subibo, & aequas omnibus Fati manus,  
 Nostrique amoris mutuam memor fidem  
 Mecum sub vmbras duco. lam vale, vale,  
 Me longa tandem noctis inuoluit quies,  
 Somnusque blandam ferreus negat diem*

*Auremque vellit: Teque mors lubens sequor  
 O summa rerum, seraque optanti venis,  
 Didicique quondam millibus mori malis:  
 At nunc docebo: spiritumque, & igneae  
 Caelum reposcit mentis ardorem meae.  
 Debemur illi scilicet pridem, neque  
 Ignotus hasce creditor premit fores,  
 Deposta reddo, mutuumque: nec mihi  
 Mutanda vita restat; at vitae locus.  
 'Quisquis prementeis mortis exhorret manus  
 Gemensque terram deserit, caelum timet.'*

### **ΕΙΣ ΤΟΝ ΑΥΤΟΝ.**

Κεκρύφθαι ὅστις τῆδε Κλαύδιον δοκεῖ  
 Τὸν φημί δεινὴν μωρίαν ὀφλισκάνειν.  
 Οὐ Κλαύδιος μάν, τοῖο δὲ νεκρὸς μόνον,  
 Ὅσοντε χεῖρε χωρέειν ὀσῶν μέρος  
 Χθονὸς βαθείης κεύθεται ἐν ἀγκαλῆς·  
 Ὡς καὶ πάρος περ ἐν μέλεσσι· παντὶ γὰρ  
 Ἔζώντι σῶμα σῆμα, καὶ τάφος πέλει.  
 Βέβηκε τ' ἄλλα ξεῖν'. ἰὼν δὲ τ' οὐμπαλιν'  
 Μέμνησο θείου ὦν ἄποικος οὐρανοῦ,  
 Θεοῦ τ' ἀπορρώξ φέγγεος πάλαι γεγώς.  
 Ὅρω γὰρ ἡμᾶς ἐνθάδ' οὐδὲν ἄλλο, πλήν  
 Πηλοῦ τε μοῖραν καὶ θεοῦ πεφυκότας.'

**In evndem****Vnà cum parentibus sepultum.**

*Hic tumulus tres vnus habet. ter vina Viator,  
 Vnique ter flores sere:  
 Treis quos vnus amor tenuit, tenet vna sepultos  
 Tellus, breuique vinculo,  
 Amplexuque leui pariles amplexitur artus.  
 Ah cum parentibus suis  
 Claudius hic ingens ingenti clauditur vnâ,  
 Togaeque purpuraeque honos.  
 Qui Regis cor dulce fuit, qui dexteram regni.  
 Tuique pars o Gallia.  
 Mitis amor blandis placidè sic iunxit amicis.  
 O dulce faedus! en iacet  
 In tumulo matris, iacuit qui matris in aluo:  
 In matre viuus, cumque matre mortuus.*

**In annales nobilissimi et Amplissimi Herois****Iani Dousae.**

*LEges sepulchri, caecaque annorum via,  
 Voraxque rerum tempus, & vanae vices,  
 Tuque impotentis vis superba saeculi,  
 Nouerca magnae saeua virtutis; tuas  
 Vltrò laceßit pectore aduersio minas  
 Sublimis ille Dousicae lucis vigor,  
 Cognataque alto mens polo, nec improba  
 Aeui fugacis impedita compede.*

*At vos edaces temporis magni patres  
 Anni, Diesque, quaeque paßibus citis  
 Horae beatas panditis Diuûm fores.  
 Tuque ignei rex & viator aetheris  
 Sacraeque lucis prome conde Sol pater;  
 Almae diei magne dictator, cûi  
 Gens tota vultus noctis auertit suos;  
 Poloque cedit siderum fugax cohors,  
 Curru superbus qui vagaris aureo,  
 Victâ triumphum dum geris caligine;  
 Ite ite divi; nunciate caelitem  
 Magno Senatu: dius emergit labor,  
 Pedemque caelo tollit, atque ingens iter  
 Viamque tendit: Dousa prorumpit meus,  
 Secumque in auras nobile Heroum genus,  
 Et vos Batauos praestiteis Nerei duces  
 Equis magistra gens domare ligneis  
 Ferocientes caeruli regis vias,  
 Sali potentesque inclytus rapit patres,  
 Famae superbus eminens tugalibus  
 Togaeque compos, Laureaeque. Tuque Io  
 Consors laboris huius atque adorea  
 Illustre magnis additum stellis caput  
 O nate Dousa, lane lane; seu procul  
 Liber patentem peruagaris aëra,  
 Mundumque pictis aureum latè notis,  
 Phaebesque blandis gemmeum sororibus,  
 Magnumque inane cernis, & terras simul,*

Chaosque rerum; sive in extremo sinu  
 Auro pluentes propter insulas Deûm  
 Canamque Thetym, Herculisque extra viam,  
 Phaebique latam circulatoris domum,  
 Fastos paternos ore sublimi tonas,  
 Nomenque magnis aemulum Quiritibus  
 Crudum Batavi pectus, & fidei tenax,  
 Et Factioni cedere indoctum genus,  
 Gentisque magna Dousicae fundamina,  
 Auosque diuos, patriaeque semina,  
 Motusque & ausus, altaque incunabula,  
 Cattosque & Hessos inclytæ praenuncios  
 Olim Batavae gentis: & Rhenus pater  
 Preßis vt aegre subiugatus cornibus,  
 Nutansque laccho molle flexerit caput.  
 Qua Didericus nominis princeps sui  
 Notum Gradivo pectus, & comata vis  
 Florentiorum caerulas poli fores  
 Circumuagatur, & gradu lunonio  
 Virtute passas caelitum lustrat fores,  
 Et aure voces, & pio silentio  
 Tuas, bibitque, ruminatque; Pars deûm  
 O lane lane cernis ah? proles tua  
 Pupilla, patri posthuma erumpit suo,  
 O lane lane, matris auulse è sinu  
 Patrique furto penè sublata ah tuo?  
 Tot ah querelis lane, tot suspirijs  
 Orbisque conclamate voce totius

*Haec cernis? ante caelitem leges procul  
 Supraque rerum vertices, & arduas  
 Imperiisque corpori vano domos  
 Humanitatis inscium nostrae tenent?  
 Haec ridet ille: ceu puer crepundijs,  
 Talisque patris ante subsilit pedes,  
 Ictuque crebro vique turbinem ferit,  
 Multumque versat, exigitque, & hinc & hinc  
 Crebris fatigat verberum vibicibus,  
 Et innocenti delibutus gaudio  
 Curisque totis viribusque rem gerit,  
 Lusuque sese pascit infelix suo,  
 Patremque multus intuetur, & stuper.  
 At ille toruus ore sublato pater  
 Despectat illa, munij memor sui,  
 Aeuique prima negligit ludibria.  
 lactamur omnes, & leuis puertiae  
 Polus polique turba nos reos agit,  
 Magnique ciues accolaeque syderum.  
 At nos miselli Suavi ludij sumus,  
 Longoque ademptos, mox secuturi tamen  
 Luctu ciemus, lachrymisque; ceu nouum  
 Et antè nulli cognitum hoc iter foret.  
 Ast illa furtim Larua proserpit tamen  
 Mors, & vagatur, & premit vestigium,  
 'Infantiumque adinstar inijcit manus,  
 Atroque cunctos pallidoque lumine  
 Empusa nostra terret, & circumuenit,'*



*Omnesque tollit, singulos fallit tamen,  
Et histrionum more palanteis agit.*

*Verum ille culmen ingenî, sanguis tuus  
Tuusque natus, ille siderum decor  
Beate Dousa, vindici rursum suo,  
Et mutüanti sic redonatus Deo,  
Mentique mistus aeuiternae; celsior  
Humoque seque, vesteque exutus sua  
Amictibusque, squalidisque vinculis  
Arctisque; mundi regna maioris videt,  
Et amplioris orbis immensi vias  
Effusus in se totus, exundans ibi.  
Vmbratilesque Opinionum despicit  
Nodos iocosque, naufragamque inanium  
Prospectat altus semitam mortalium,  
Magnumque rerum terminum lustrat deum,  
Circumspicitque tutus, & compos sui,  
Exuberatque, diffluitque; tota cui*

*Ingens sepulchrum patria est, caelum domus:  
Namque ille rerum machinator spiritus  
Auriga tardi dux herusque corporis,  
Vanaeque molis imperator strennuus,  
Suique semper, eminus licet, poli  
Cuiusque verus municepsque, patriâ  
Proscriptus olim sede, quam cernit tamen  
Telluris huius inquilinus, erroque,  
Extorris, exul, carcere impactus suo  
Ineptientis dexterâ Promethei*

*Illa illa nostri pars superba, ventus est  
 Flamenque siccis excreandum faucibus  
 Fatalis horae cùm ciet neceßitas,  
 Ingensque rerum vellit aurem terminus  
 Diesque summa. Nec minus, tamen tamen  
 In alta pergere ardet, igneaque vi  
 Sursum reluctans tendit, & caelum suum  
 Procul fatigat prouocatque, & inquires  
 Aeternitati mente praeludit suâ,  
 Dignumque caelo spirat in terris opus,  
 Mortalitäts ferre leges insolens,  
 Seseque versat, erigitque; dùm leuis  
 Ruptisque mentis igneae repagulis,  
 Et his profanis corporis faedi notis  
 Pars aetheris sit vndecumque, & portio  
 Magno vniuerso huic imputatus, & sibi  
 Illic coactus ille, tot pressus graui  
 Annos ruinâ; vasa colligit sua,  
 Coloniamque mutat, exilitque ouans  
 Rudemque sentit, pileumque, mancupum  
 Exlex laboris compedumque; denuò  
 Praetore nempe redditus liber Deo.  
 At nos caducae saeculi propagines  
 Puluis misellus, halitusque, quem dies  
 Caelique lumen visque nobilis mouet;  
 Queis fomes imo pectore infusus sedet,  
 Ingensque in altum promouet vires calor,  
 Extraque vulgi semitas ordo vocat*

*Munusque rerum, flammeumque pectus, &  
 Occulta magnae aeternitatis semina,  
 Originisque conscius suae vigor;  
 Factis ab alto destinata gens sumus  
 Dictisque: Factaque vt priora, sic prius  
 (Nisi Suäde mobilis Fauonius  
 Et dictionum vernus aspiret lepos)  
 Infusa tabent, litterario sale  
 Facundijsque destituta; onus sibi,  
 Serisque pondus improbum nepotibus.*

*At tu superbe pignore hoc tanto pater,  
 Natoque quondam, laude nunc nati tui  
 Tuaque Dijs secunde; Dousa per tuas  
 Musasque nostras, per domesticas tibi  
 Et inuidendas mobili vulgo deas,  
 Manesque nati, perque Lugdunum tuam,  
 Seruata quae te praestitem colit suum,  
 Nomenque vastum, quod vagas Atlantidas  
 Arctonque salsis exulantem fluctibus,  
 Phoebique metas luce praeuertit sua.  
 Si quid suäue, si quid optatum tibi,  
 Lauroque dignum, pectore eductum suo  
 Tuus Beate consecrauit Heynsius  
 Plebis profanae despicator, & fugax  
 Insanientis gloriae pruriginis;  
 Emerge porrò, latiusque verticem  
 Ostende caelo, pectorisque ignem tui,  
 Totumque Dousam patriae expendas suae,*

*Fastisque magnis, ingenique onus tui  
Totosque neruos gens profana sentiat,  
Gematque, mentis luce praestrici tuae,  
Ah litterarum vana mendicabula,  
Lixaeque inanes, proletarij patres,  
Et Malchionum si quid vsquam est; tuus  
Quicquid Tragoedus ille, quicquid Histrio  
Vani Batauis illinunt Annalibus,  
Prosceniumque disijce Orchaestrae pater  
Praesulque nostrae, patriamque vindica  
Contaminato conditam styli situ.  
Natique si quid inclytum latet tui  
Exsolue tandem, mortuusque denuò  
Nascatur ille, bisque eandem Virbius  
Vni parenti debeat lucem; simul  
Patrique raptus, patriaeque redditus.*

## Iano Grvtero Viro Clarissimo

EGO vero dñu vocandus non sum Grutere Clarissime, iam adsum, & licet absens, ad te venio. Literas enim suas, qua de me erant, Clarissimus Vulcanius noster, & amicissimus Scriuerius mihi perlegerunt, quibus tu id curae dederas, vt fauorem mihi tuum denunciarent; ipsissimis enim verbis vti non audeo: ne quis me aut magnificè nimis de me sentire, aut humiliter de celeberrimâ nominis tui existimatione, quam ego iamdudum exosculatus sum; arbitretur. Pudet tamen, Pudet,

Οὐ γὰρ ἐγὼ θεός εἰμι τὶ μ' ἀθανάτοισιν ἔῖσκεις;

Parui sumus; imò nulli. Vnum modo possumus, viros magnos admirari: quod multi propter τὸ ἀμαθὲς non possunt: plures propter τὸ ἀγεννὲς non volunt: Ignaua corda, imo sordida, terrae suae nata tantum, in quam quotidie magnis passibus contentdunt. At nos cum literis suauissimam Amicitiam colamus, atque huic Deae auspicio Gratiarum faciamus. Ita tamen, vt putus ad te candidusque veniam, sordesque eas quas nuper contraxi eluam. A te enim, quod sponte milli praevertendum fuit, ad suave hoc foedus inuitatus sum. Ignosce vir doctissime, simulque Heinsium & ab eo aliquid, quod quidem ego καθαροῦ loco esse volo, accipe. Munusculum literarium, καὶ ὡς ἐμὸς οἶκος ὑπάρχει. Iambos igitur, partim morales quos pueri penè scripsimus (quod & ipsum vt scias mea interest) partim quos vel ad amicos, vel amicorum causa scripsit, tibi mittere visum est: quod quidem eò confidentius feci, quod incomparabili Scaligero suos me non facile extorquere posse videbam. Novi enim quis ille; & omnes mecum

Μοισάων ὄρνιχες, ὅσοι ποτὶ τῆνον ἀοιδὸν  
 Ἀντία κοκκύζοντες, ἐτώσια μοχθίζοντι.

Quod quidem quam optaverim ex Elegia meâ, quam hic subiunxi, facile animaduertes. Felices tamen sumus divini illius Herois praesentia, ac praecipuè ego, qui propemodum domesticus eius, raro praesertim hac heyeme, seorsim ab eo vivere soleo. Atque hic quidem ille. Hagam vero quotiescumque me confero, Iupiter meus ξένιος ἅμα καὶ φίλιος Doûsa est. apud eum non possum quin diem saepe vnum aut alterum ponam. Certò scio mi Grutere, quamuis te βάσκανον minime esse sciam, prandia illa & caenas imuideres mihi, quae tantâ sermonum eruditione, ac fe-

stivitate condiuntur. Comatam illum beatum vocat poeta meus ille Sículus

ὄτι μελισσᾶν

Κηρία φερβόμενος ἔτος ὦριον ἐξετέλεσσε.

Ego vero mihi videor vel δὶς τοσαύτα ἔτη ἀποκατερήσων μόνον τῷ Δούσῃ παρῶν. Eo autem lubentius haec edidi, quod nonnullos lambos in manibus studiosorum corruptissime editos esse sciam, ita quidem vt interdum σκάζοντες in omnibus fere pedibus sint, qui hac editione adhibitâ facilius emendari poterunt. Ad alteram vero petitionis tuae partem quomodo respondebo? petis nimirum vt aliquam quoque ipse ad Illustrissimum tuum Inscriptionum opus symbolam conferam. Egone vt tot inter sublimia aeternaque nomina meum quoque committere audeam? sed agedum, fiet id quoque; imo iam factum est. scripsi ergo, & quidem graecum. Lubentius enim (quod quidem tibi in aurem dictum velim ne id Latinae meae Musae audiant) Ἑλληνίζομεν. Noster στρωματεύς quotidie pergit, in quo Graecos ac praesertim poëtas emendamus. Reliqua etiam vrgemus. quidni? ποιεῖν τι δεῖ αἰς γόνου χλωρόν. Tu igitur mi Grutere me posthac amabis; & haec mea, ac valebis, ne rursus Graecissemus, quod vt nosti togata illa Romanorum seueritas vix admittit.

## Ex Elegiarum libris ad Illustrem & Incomparabilem

### Iosephvm Scaligervm

*PRò dolor infelix, Elegi miserabile carmen,  
Et sequitur lachrymas languida Musa meas:  
Juliades dulces negat ah negat edere faetus,  
Pignoribus lucem subtrahit ille suis.  
Ergone tot molli ridentes agmine versus  
Cunctaque solius carmina noctis erunt?  
Obruet ah dulces genitor sua pignora natos,  
Et geniti tantum, quò moriantur, erunt.  
Scilicet ah mites & adhuc a patre rubentes  
Vulnera, quae nondum commeruere, ferent.  
Immitis genitor poteris, mea gaudia, doctam*

*Sub tenebris prolem diſſimulare tuam?*  
*Ingenijque ardentis opus: fuge maxime rerum,*  
*Ne tumulus natis fit domus ipſa tuis.*  
*Heu tumulus domus ipſa tua eſt: his condita tectis*  
*Nobilior mentis pars latet illa tuae,*  
*Quique domum cernit, buſtum ſimul ille tuorum*  
*Cernit, & exequijs funera caſſa ſuis.*  
*Ah quoties dixi: quantos tegit illa reſſus!*  
*Scaligeri quantum poſidet illa mei!*  
*Iuliade ſtirps alta Deûm, miſerere tuorum,*  
*Et genitor natis parcere diſce tuis.*  
*Quid, pia progenies, placidi meruere libelli?*  
*Quid bene vix nati, cur tumultentur, habent?*  
*ſcilicet vt Muſas caries ſibi vindicet illas?*  
*Hospitium blattis nobile carmen erit?*  
*Ingeniumque tuum tineis tradetur? & atra*  
*Sub tenebris voces diruet vmbra tuas?*  
*O ſuperi prohibete nefas: prohibete Camenae;*  
*O mea gens, animi cura ſerena mei.*  
*Blanda venus lepidi ſermonis lactea mater*  
*Quâ tenerum nobis praefide ſurgit opus*  
*Iulianes doctos damnauit nocte libellos:*  
*Et tenebris nobis quae negat, illa dabit,*  
*Eripit ah nobis, tenebris vt tradat & vmbriſ:*  
*Maluit hoc tenebris, quam tribuiſſe ſuis.*  
*Ah genus infelix, placidi ſiue crimine fratres,*  
*Vos procul ignoto limine carcer habet.*  
*Forsitan & ſummo dum pendet aranea tigno*  
*In tenero faedum carmine nectet opus.*  
*Heu nimium magni ſoboles infauſta parentis*  
*Scaligeri fruſtrâ gens miſeranda mei.*

Non ego te cernam titulo fulgere superbo,  
 Et domini nomen dulce referre tui.  
 Naenia natalem miseris praecedet: & ipsa  
 Mors prior ah vitâ vestra futura suâ est.  
 Non genitus, moriere tamen, labor ille: nec vnquam  
 Heinsius aspiciet, verbaque pura leget:  
 Imprimet aut eheu tenerae pia basia chartae,  
 Discet & ad numeros flectere verba tuos.  
 Heysius vt careat caries habet, atraque noctis  
 Nomina: quaeque mihi non licet, vmbra tenet.  
 Vmbra tenet dulces, animi monumenta, libellos:  
 Ah radios mentis possidet illa tuae!  
 Ah dolor, ah molles lachrymas effundite Musae,  
 Et lachrymas noster fundere discat amor.  
 Me miserum, tumulumque solo statuamus inanem,  
 Solaque quae restant nomina seruet humus:  
 Scilicet vt nostri mecum gemuisse nepotes,  
 Et lachrymas discant fundere posse suas.  
 Posthuma gens dulces sciet interijisse libellos,  
 Discet & à lachrymis id meminisse meis.  
 Atque aliquis maesto stillabit flumina vultu,  
 Et leuiter dicet: quae tulit vna dies!  
 Tempora quodque alijs, magnus sibi Scaliger ipse est.  
 Quodque dies multis sustulit, ille sibi.  
 Lux hominum, pars magna deûm, miserere nepotum:  
 Hos vocat haeredes mens generosa suos:  
 Hanc sibi progeniem mens ardua possidet: illi  
 Ingenij sacras ignea seruat opes.  
 Ergône qui genuit genitum ferus obruet? ergò  
 Ne tibi non noceant tempora tempus eris?  
 Heu dolor, heu lachrymae, heu Elegûm vis tota meorum



*Inque meo si quod pectore numen agit.  
 Per superas ataurorum animas, aquilasque tuorum,  
 Et consanguineos, numina vestra, deos.  
 Perque tuas, Musasque meas: per Caesaris vmbram,  
 (Sic bene tecta leuem corpore gestet humum)  
 Caesaris ingentemque animum, versasque phalanges,  
 Et toties faciles in tua vota Deas.  
 Sic tibi sublimem vaga mens perrumpat Olympum,  
 Arduaue inuectus sydera tardus eas,  
 Aetheraque illustres, patriamque interritus aulam,  
 Et videas proavis debita regna tuis.  
 Magne pater miserere tui, miserere tuorum:  
 Et tribuas natis viuere posse tuis.*

### **In livorem**

*Liuis atri noxiâ abreptus gemis,  
 Spirans profanam pectoris faedi luem,  
 Tuique vindex, ne sit impunis caues  
 Furor tuarum pestilens Erynnidum,  
 Noxasque fundis, vindicas idem tamen,  
 ludex, reusque; punienda qui geris,  
 Punisque solus: sceleris infandi pater,  
 Idemque vindex: dum scelesta mens suae  
 Correpta labis lurida afflatu gemit:  
 Ridesque nunquam; ni bono elatus tuo,  
 Máloque nostro: gaudijque fons tui  
 Dolor tuorum est: nec beata lux tibi,  
 Nisi immerentes obrui cernas viros.  
 Lues nefanda, criminum infelix pater*

*Beata cernas cuncta, te praeter tamen;  
 Bonoque nostro perfruaris, vt tuo  
 Carere possis vsque & vsque: qui nisi  
 Aduersa cernas, haud secunda noueris.*

### **De fragilitate rerum.**

*Quacunqve vastus liminis magni parens  
 Censorque rerum flammeum per aëra  
 Sol candicantes igne deducit rotas,  
 Caelumque habenis peruagatur aureis;  
 Rotamur omnes: orbe voluimur vago,  
 Lususque rerum temporumque nascimur:  
 Nihilque firmum magnus annorum pater  
 Dies tuetur: turbinum potentia  
 Seseque rerum mobiles premunt vices.  
 Cunctisque ab annis mensibusque ad vltimum  
 Provoluimurque ducimurque; Se tamen  
 Perire nemo, sed perisse conspicit.*

### **In naturae prodigia (si sunt tamen) qui θεοι dicuntur.**

*Quicunque vastas aetheris magni domos,  
 Sublimibusque regna syderum globis  
 Gemmalalate, flammeoque cardine  
 Suspensa mundi maenia immensi vides,  
 Polumque pictis nocte flammantem ignibus  
 Phoebumque purâ semper ardentem comâ,*

*Oculum serенаe lucis, & vitae diem:  
 Phaebenque ciues inter audentem suas  
 Surrepta fratri mutuare lumina:  
 Stellasque gentem caeruli vagam poli:  
 Caelo coruscis subsilire vultibus,  
 Fluctusque vastos, impetusque caerulos,  
 Reciprocique turgidas sali vices:  
 Rursusque viam vere tellurem novo  
 Miti serenos imbre pandentem sinus;  
 Sublimius vagare: celsius sub his  
 Imperiumque luminum obtutu latet,  
 Mens illa rerum, terminusque, vitaque,  
 Mundique origo, spiritusque; surrigens  
 Fouensque cuncta: mentis vtendum hic ope est:  
 Mens alta perge. remige alarum procul  
 Trans claustra mundi, atque Herculis magni domos,  
 Finesque summos, transque flagrantem aëra  
 Euecta tende: quicquid hic latet tuum est.  
 Surge, illa nostri purior pars, aspicias  
 Sublimiores aetheris sacri fores.  
 Fons inde nostri: condita aspectu patent;  
 Aeterna menti: mens poli polo latet;  
 Humo oßibusque nostra; vinculis suis  
 Obstructa semper impotensque: deuia,  
 Erransque, palpitansque, cassa lumine  
 Dei, suoque, pondus exantflans graue.  
 Suppressa semper, baiulansque; nec sibi  
 Spectanda: tantum mole compacta latens*

*Infusa terrae. Mentis aeternae tamen  
 Scintilla nostra est, fomitem hinc vitae trahit  
 Viresque ducit, elicitque: debiles  
 Et haec & illa luminum obtutus fugit.  
 Miraris ergo vana gens, quod haud queas  
 Animam vniuersi cernere? haud cernis tuam.*

### **In miseros, mortem tamen optantes.**

*Pressus superbae viribus licentiae  
 Demolientis cuncta fortunae; paves  
 Leges nouercae, quae procacibus rotis  
 Victrix potentes digerit rerum vices:  
 Et insolentis turbo mobilis deae  
 Sortis flagello quassus aduersae tremis,  
 Saeuis labascens verberum vibicibus:  
 Mortemque poscis, suētus optatae prius  
 Gremio fauentis agere fortunae dies,  
 Morique votum est. ah miser, miser, queas  
 Mortemne ferre, ferre qui vitam nequis?*

### **Ad impium.**

*Quacunq̄ue vultus, feruidique duplices  
 Vagantur orbis luminis, caelum tenet  
 Haec cuncta circum, penduloque ab aëre  
 Ambimur omnes & tenemur vndique.  
 Suspendit illa vultibus magnus pater  
 Aduersa nostris, aureisque luminum  
 Signata templa, siderumque motibus,  
 Quocunq̄ue celsa dirigas acumina,*

*Radiosque verses luminis, polum vides  
 Urbemque nostram, patriamque: inertia  
 Inuitat ora gentis humanae Deus,  
 Vultusque in alta ducit, & tuerier  
 lubet micantem lumine aeterno domum.  
 Nolis velisue gens profana, conspicis  
 Regis superba fulgurantis atria,  
 Ardensque semper aetheris lati decus,  
 Inclusaque imminentibus coeli plagis  
 Et hinc, & inde es: pallidoque vertici  
 Arx alta machinantis incumbit Dei,  
 Ceruicibusque caerulea impendet via,  
 Reumque cingit. quo vagare? fulgido  
 Teneris orbe, nec fugae patet locus.  
 Ergo O profane, mortuus Deum queas  
 Fugisse, viuus fugere qui coelum nequis?*

### **De conscientia.**

*Veneris nefando caecus instinctu ruis,  
 Scelerisque terra pondere, atque aer tui  
 Gemit, pavetque: nec sat vna nox tegat  
 Virus scelestae depluens contagia,  
 Latere cunctos ista dum speras; tui  
 Oblitus ipse: teste nam carere vis  
 Te nesciente quod tamen fieri nequit,  
 Testisque eorum quae latere vis, tibi  
 Inuitus ipse es, nec sine arbitro, licet  
 Solus, vagare: iam tibi tergum premit*

*Celeratque, quo vagaris? ipse ades tibi,  
Alium velis latere, te ipse non potes.*

### **In Scortationem.**

*Lascivientis improbâ tentigine  
Scorti vagaris impeditus vnquibus  
Manceps proteruae destinatus accubae,  
Lubensque faedo colla summissus iugo  
Omnem tremiscis abnuentis impetum.  
locosque mille, mille ineptias iacis  
Süauiori deditus tyrannidi.  
Miles pusille, tune viribus potis  
Martis tot alta dißipare maeniâ  
Victis superbis insolenter hostibus?  
Domasque ferro: sed domaris osculo.*

### **In pauperem.**

*Magistra rerum, disciplinarum parens,  
Sublimioris dura naturae comes,  
Regina egestas, sola quae semper minus  
Habendo, nunquam maior esse desinis.*

### **De miseris mortem metuentibus.**

*Fastidientis sorte Fortunae miser  
Gemitus ab imo pectore infelix trahis,  
Mortesque mille, mille dum viuis neces  
Geris, perisque. nec minus necis tamen  
Gelidae flagellum mente percussus tremis.  
Ergon' quater miselle, dulce sit tibi*

*Toties perire, triste sit semel mori?*

### **Quae videntur perire omnia.**

*Obtusa quicquid luminum vagantibus  
Acies pererrat motibus; minax sibi  
Mors poscit: immortalia aspectum latent  
Sublimiora vultibus nostris, neque  
Dum viuis ipse cerneris tibi: leuis  
Quod cernis vmbra est, puluis & compes tui,  
Animique vestis haud decora, pallidae  
Imago mortis, & focus caliginum,  
Tumulusque viuis, mortuae vitae domus.  
Te cernere ipsum non sinens tibi, neque  
Lustrare mentis igneae templum tuae.  
Vago hoc solutus ergo carcere; id vide  
Videre potes, quod videre non potes.*

### **In tyrannum.**

*Ciues superbae viribus potentiae  
Nixus, cruentique moderamine imperi  
Saeuisque habenis oris improbi minas,  
Et intonantis alta linguae verbera,  
Et quicquid amens pectoris saeui tumor,  
Vel atrabilis, vel superbus ingerit  
Insanientis vana naturae rigor  
Horrere cogis: cunctaque exhorres prius  
Terrens tremensque: namque iustus arbiter  
Aliena terrens crimina, tremis tua,  
Metuque subdis, subderisque: nec prius  
Timere cessas, quam timeri desinis.*

**In obitvm Christophori Raphelengii Qui hydrope interijt.**

*Fatis viator ferreisque numinum  
 Semper minorem legibus mentem gere.  
 'Rerum procellis, & voraginum ferox  
 Semper redundans horret humanum mare:  
 Sortisque vento turba mobilis sumus.  
 Collo minacis pendet aeternum Dei  
 Districtus ensis: impotensque casuum  
 Despumat in nos, turbinumque audax fragor.'*  
*Eheu virentis feruor ille, & igneae  
 Robur inuentae dulce, corque nescium  
 Insanientis cedere ictibus Deae,  
 Fortunaque ipse qui fuit sibi; iacet  
 Eheu viator, ah miser, miser, iacet  
 Raphelengiana culmen alterum domus.  
 Caeloque dignum possidet tellus virum  
 Ah aeuiternis ille chartarum notis  
 Et imminentis omnibus fati manus  
 Aggressus arte, quae perennibus modis  
 Aeternitatis ala, vitaeque omnium est,  
 Quoscunque rectus pectoris vigor rapit,  
 Deumque ad altas impetus vehit fores;  
 Heu interemptus fluctibus iacet suis,  
 Suumque secum gerit infelix mare,*



*Vndis ab ipsis quas creavit obrutus,  
Vivoque pontus, venter, & fluctus fuit,  
Suique vixit hospes & comes mali,  
Longeque ab vndis inter vndas occidit.*

### **Alivd quod quia eiusdem argumenti cum superiore est subjungam.**

*Quid procul hybernis agitatae fluctibus vndas,  
Et metuis dubias aequoris ire vias?  
Oceanumque altos sorbentem fluctibus aestus  
Caeruleique hospes tristia regna dei?  
Qui iacet hic, secum proprias tulit ah miser vndas,  
Et mare quo perijt obrutus, ipse fuit.  
Ipse sibi, miser, vnda fuit, pelagusque viator,  
Inque vtero fluctus, & sua fata tulit.  
Sic, licet in terris, vndas tulit ille, soloque  
In medio, medias occidit inter aquas.*

### **Ad Hugonem Grotium iuuenem sine exemplo, elegantissima ab eo donatus Tragaedia Adamo Exvle**

*Ingens cothurni splendor, O dium caput,  
Qui syrma voce regia sacrum trahis,  
Soccoque magnum tundis exultans solum,  
Tandem renatae maxime Orchestrae pater,  
Ignosce fasso: cogitur retrò tuus  
Pedem referre cultor, & süauibus*

*Sacri prioris exulare lusibus:  
 Exulque, quamdiu exulem spectat tuum,  
 Magnae videtur vrbis, & Quiritium.  
 At tu profane faecis antiquae parens  
 Imbellis Euan, matre prognate è Deo,  
 Vnquamne leges Bâcche transilui tuas  
 Nonnumue laesi? dum tuli praesens opem,  
 Phoebiamque vulneri admoui manum?  
 Baccharis Heinsi: Bacchus haud vsquam tuus  
 Sublime thyrso parcius pectus ferit.  
 At illa rerum magna culpanda est tibi  
 Natura nutrix, obstetrixque, quae prius  
 Nouerca cunctis, Grotio mater fuit.  
 Senex ephaebus ille, quem Batauia  
 Miratur omnis, optat Hetruscus sibi,  
 Omnisque Gallus, ille dum puer fuit  
 Vir esse cepit: Namque relliqui, viri  
 Tandem fuere: Grotius vîr natus est.*

**Danieli Heinsio suo Hugo Grotius, cum Adamum Exulem suam offerret.**

**Choliambi.**

*Heinsi vetustae restitutor Orchestrae,  
 Ornas cothurno qui pedes Sophoclaeo,  
 Primusque syrma vincis Euripidaeum,  
 Et Aeschylaeos, & Lycophronis faeces,  
 Et quicquid vsquam perditum Tragoedorum  
 Desideratumque hactenus, repensasti,*

*Sume hoc amici (nomen hoc in aequales  
 Si non recusat) sin minus, tui saltem  
 Poëma, in arrham quam sacrae clientelae  
 Postremus offert principi poetarum:  
 Lecturus illud vt beatus exultes,  
 Cum nos videbis velle, posse te solum.*

**Nobilissimo, doctissimoque iuueni Samueli de Lecherpiere Riurio,  
 cum de fide iustificante summa cum laude disputasset.**

*'Excelsa virtus, vi licet retrò sua  
 Perrumpat omnes noctis ignauae moras,  
 Iterque caelo tendat, & terram suam  
 Post se citato deserat velox gradu;  
 Tamen secundis irrigata laudibus  
 Deuota Musis ritè quas signat manus  
 Et è profundo pectoris sulco trahit  
 Diuturniores corde radices agit,  
 Ignobilesque tuta liuoris minas,  
 Virusque inane calcat, & sedem legit  
 Quà tot remotis inclytam vestigijs'  
 Aeterna raram fama fortitur viam.  
 Sic teste caelo, totque doctorum manu  
 Cor illud ardens, Riveri, parat tuum  
 Fultum cathedra, spiritus, & igneae  
 Fortis iuuentae prouocare robora.  
 Hic sidus illud Iulio dignum polo,*

*Ille vniversi splendor, agnatus deûm  
 Denso sedebit Scaliger cinctus choro.  
 Hic alter ille Galliae fulcrum tuae  
 Scientiarum terminus, morum pater  
 Catone dignum Iunius tollet caput.  
 Illic senatus, totque Phoebei patres  
 Hinc inde longum syrma visuri trahent,  
 Et omnis ausus condet assensus tuos.  
 O quam potentes cordibus motus ciet  
 Vis prima laudum! quam potens rerum sitis  
 Ardore pulchro pectus erectum quatit!  
 At tu beate, seu Pyrenes horridos  
 Ultra recessus tendis, aut nostro procul  
 Divisus orbe barbarum calcas gelu;  
 Nostri memento, postque defensam fidem,  
 Fidem quoque isthanc Heinsij serua tui.*

**In obitum Nobilissimi & Clarissimi Philippi Marnixii Sancti Aldegonzii, optime de se meriti.**

*Medulla rerum, vita disciplinarum,  
 Facetiarum corculum, pietas tota,  
 Excelsioris arx domusque naturae,  
 Penus sacrorum, lampas alta Belgarum  
 Aeternitati natus, arbiter morum.  
 Si plura quaeris hospes, hic iacent plura.*

**Iosepho Scaligero eruditionis principi, Temporis Restitutori, felix  
anni exorientis Initium Optat Daniel Heinsius.**

**Ad Annvm & Tempvs.**

*O Rigorerum, mensium bis sex pater,  
Ingentis aevi, saeculique pertinax  
Rotator: o qui mille per gyros soles  
Redire eòdem, quique crescendo peris  
Pereundo crescis, teque prodigus tui  
Perdis, sed in te. tuque quoque o bifrons Deus  
Censorque, tergi magne lustrator tui.  
Tuque ille rerum trux vorator omnium  
Tempus renascens; vindicem tibi tuum  
Nobisque serua, seriorque sit meis  
Lux illa fatis, quâ solo & mortalibus  
Ereptus oris Iulij sacrum genus  
Heroas inter Caesari iunctus suo  
Caeli patentes arduus tundet fores.  
Tempus memento, votaue exaudi mea  
Nobis tibiue consecrata: nec potes  
Seruare nobis nolle, quem seruas tibi.*

**In doctissimi Iuvenis Richardi Band. Angli disputationem pro gradu magisterij.**

*P*ostquam potentis artifex manus Dei  
Ardente pictas igne distinxit vias  
Flammantis aethrae, fornicemque caerulum  
Hinc inde, fixum pondus ingentis soli  
Ambire iussit, & prius formae Chaos  
Vilius expers, omnium capax tamen,  
Tot his figuris sculpsit, & notis suis;  
Ibi ille rerum censor aequus omnium  
Divinitatis fomes, ille alter Deus  
Caelum resedit inter & terras Homo,  
Dignus theatro iudicatus aureo,  
Dignus parente. deêrat hoc vnum tamen  
Aeternitatis semen. ergò ingens pater  
E luce caeli, syderumque vultibus  
Sacram perenni lumine accendit facem.  
Hanc ille motu semper vrgentem novo,  
Sursumque pectus erigentem flammeum  
Sub corde nostro versat, atque intus quatit,

*Donec profanus torpor oblitus sui,  
 Ignaviaeque vanus obrepit cinis,  
 Ignemque sacrum condit, atque iners situs  
 Pura calentem mentis extinguit focum.  
 'Namque illa fervens ignei lux ingeni  
 Exorta caelo, parsque vicini Dei  
 Leni veneno blandientis otij,  
 Et annuentis impetu libidinis  
 Sponte in soporem versa declinat suum.'*

*At tu Britanno sidus exortum solo  
 Blandi, tot inter cassa delectamina  
 Dulcis juventae, totque ventorum minas,  
 Quas illa menti pestilens sidus bonae  
 Prima Voluptas semper aetati comes  
 Contagioso mollis afflat halitu;  
 Voto potitus inclyto, portum tenes.*

*Beate Ephaebe, victor aetatis tuae,  
 Victor laboris, victor ingentis iugi,  
 Quod illa vitae magna regina & parens  
 Virtus tot altis destinavit ausibus.  
 Namque ille sortis arbiter nostrae Deus  
 Inter trecena montium cacumina,  
 Rupésque vastas, inter horrentes specus  
 Vmbrasque inanes, inviam plebi vagae  
 Suspendit vrbem, tristibus quam maenibus  
 Septemplicique cinxit hinc illinc vià,  
 Ambagibúsque mille, mille semitis:  
 Hanc vanus ambit error, hanc durus labor.*

*Intus Decusque, duxque rerum Gloria,  
 Virtusque casta culmen excelsum tenet.  
 Illhuc virentis primus aetatis calor  
 Plenis juventam passibus nostrum rapit:  
 Sitisque laudis, indolisque pulchra vis,  
 Honosque, diae pectus exercet face.  
 At illa mollis, insolensque inertia  
 Ignava mentem febris occultè subit,  
 Blandáque vivos fraude sistit impetus.  
 Multos proterva Cypris, & fallax genus  
 Sexúsque mollis penè transversos agit.  
 Plerisque nostris ille Musis accola  
 Mentem liquore mystico Liber rapit.  
 'At ipsa nobis tempus asscripsit breve  
 Natura vitae, dulcis hinc puertia  
 Aetásque prima, molle vectigal sibi  
 Lususque poscit. interim tamen tamen  
 Horae citatis passibus leves eunt,  
 Diésque retrò fertur, & quicquid fuit  
 Nil poenitere praeter, & suspiria  
 Dé se relinquit, ac sibi corpus grave.'*

*Blandi Beate, quanta surgentem premit  
 Moles juventam! quanta vis retrò trahit!  
 Illhinc Calysto mollis, hinc Circe levis,  
 Et in ruinam prona gens nostram sumus.  
 Felix Vlysse patriae redux tuae,  
 Felix, tot inter temporum contagia  
 Itachen, Samenque cernis, O felix nimis*



*Scientiarum tanta permensus vada  
 Vitae protervos mente mactasti procos,  
 Natámque felix Icarí totis tenes  
 Amplexus vlnis, redditus terrae tuae  
 Felix maritus huius in sinu iaces.*

*Ergo illa vastis hinc & inde fluctibus  
 Pulsata tellus, illa quam Mavortia  
 Armis Amazon vestra propugnat suis,  
 Lustrare vultus, oráque exoptat tua.  
 Beate Ephaebe, spectat haec laudes tuas,  
 Et cuncta tecum dividit praeconia,  
 Haec illa Blandi prima vitales tibi  
 Indulsit auras, munere illius polum  
 Polóque iuncta cernis illa sydera.  
 Illhic pusillo primus errasti pede,  
 Dulcíque primos voce formasti sonos,  
 Haec vna mater: dulcis haec parens tibi est.*

*Tellure namque patrijsque finibus  
 Matrem minorem nescit excelsus vigor,  
 Deóque dignum pectus, & scientiae  
 Firmata castis mens beata legibus.*

### **Hvgonis Grotii albo Heinsij inscripti lambi.**

*Nouem Dearum cultor Heinsi virginum,  
 Rossaeque decimae, quae Camoenarum choro  
 Riualitate certat implacabili,  
 Suumque te illa iactat, & Musae suum,*

*Haec quod dedere carmen, illa quod accipit.  
 Qui nos in orbis hoc satos delirio,  
 Seroque natos, ipse dum mundus perit,  
 Tot damna veterum luce dum pensas nouâ  
 Prohibes vetustis inuidere faeculis,  
 Quid est quod a me, quem minorum gentium  
 Nosti poetam, poscis hanc chartam tuam  
 Devirginari? fallor, an quamuis velim  
 Recusat aetas. fas fit imperio tamen  
 Parère tanto. quicquid in me est ingeni  
 Id omne magno litterarum consuli  
 Seruire discat, quodque Apollineae mihi  
 Negavit artis parca Naturae manus  
 Det imperator ille, quem cum gigneret  
 Natura vinci cepit, & se vincere.  
 Te veneror Heinsi, tu mihi pectis quatis,  
 Docesque iussu, iamque nec quod postulas  
 Non posse possum. Silium excercet tuum  
 Furore Mauors entheo, quòque Annibal  
 Exarsit olim, visque cunctatrix Fabi  
 Hoc ipse vates trahitur: atque alter tuus  
 Tuus ille Nonnus, amnis in tumidi modum  
 Labentis alto ex monte fertur, Bacchico  
 Percussus oestro. quisque quem cantat Deum  
 Afflatus illo est. Heinsius numen mihi.*

Sed iam erubui: malo tamen erubescere ego, quam vt illius quem vnicè miror, quicquam pereat. Quoniam autem incepti iampos producere, iuuat & reliqua hoc loco exhibere carmina, quae cum iampos iuncta sunt.

**In obitum Clarissimi Modestissimique viri Francisci Raphelengii.**

*Aspicias exilem tumuli se tollere molem,  
 Lenique terram vertice,  
 Exiguo puram gremiò quae possidet vmbram,  
 Manesque nobiles. procul  
 Hinc fuge, cui scelerum cura est, cui gloria rerum  
 Ventosa pectus concutit:  
 Virtuti patet ille locus, solique beatus  
 Sacer modestiae vacat:  
 Virtutum domus est: iacet hic Raphelengius ille,  
 Ingentis Europae decus.  
 Huic orens Aurora suos ediscere soli  
 Permiserat lubens sonos,  
 Turcarumque domire sidens transduxit honores,  
 Nullique cognitus licet  
 Cum patrijs Batavis Arabas confudit & Indos.  
 Ah hospes ah, en, qui fuit  
 Sol oriens nobis, linguasque orientis ab ortu  
 Transuexit; occidit tamen.*

**Memoriae nobilissimi doctissimique juvenis Georgij Dousae magni  
Iani Dovsae F.**

*Quid cineres isto frustrà, quid & ossa sepulchro  
Quaeris Viator, corporisque relliquum?  
Aspicias hic nudum modò nomen. caetera Pontus  
Nereî furentis aula sortitò tenet.  
Dousiades manibus Turcarum elapsus & oris  
Phocis in alto victima infelix iacet.  
Qui variasque hominum sedes aductus & vrbes  
Vtramque Phaebi vidit ardentis domum  
Hunc pater Oceanus tandem, viridisque Palaemon  
Thetisque toto conditum ponto tegit.  
Sic, potuit totam qui viuus cernere terram;  
Olli sepulchrum contigit, Totum Mare.*

**Incomparabili iuveni Hvgoni Grotio cùm Silium suum offerret ei.**

*Nominis ô patrij sublimis gloria, faxque,  
Cui nil Batavae spumeus terrae pater  
Quâ validis circùm Cybelen complectitur vlnis,  
Pontique lambit aestuantis ostia,  
Cattigenisque suis domitum defendit Iberum;  
Aequale quicquam, par nihil quicquam videt.*

*Accipe praeclaro victurum sanguine Paulum,  
 Totasque Cannas morte pensantem sua  
 Annibalis fugientem animam, Hannonisque tumorem,  
 Tarpeiumque penè concussum louem,  
 Et formidantes summißis collibus Alpes,  
 Vltorque Elisae quicquid effudit LIBVS  
 In dominum terrae ingentem, quassumque Quiritem,  
 Et iam labantis alta Romae maenia.  
 Ecce, meus praeco Libyes, Poenique furoris  
 At te superbam Consul affectat viam:  
 Ille orbis Latialis apex, gentisque togatae  
 GROTI beatos iussus affectat lares.  
 Hactenus iunctas potuit gestare secures:  
 Nunc hasce soli sponte summittit tibi.*

### **In obitum divini iuvenis Iani Dovesae Filii.**

*Nauita qui magni percurris sydera caeli,  
 Vndamque findis aureo polo duce,  
 Inter & umbrosae taciturna silentia lunae  
 Flammantis altam consulis mundi viam.  
 Seu Batavis, seu Mattiacis è finibus ortus  
 Percurris altam Nerci patris viam;  
 Desine mirari niueo quod proxima cygno  
 Non vna sicut ante fulgeat lyra.  
 Dousiades nocte hac patrio donatus olympo est,  
 Suamque magno consecrat lyram polo.*

**Scriverio meo de filiolo nuper nato.**

*Tui lepores Scriveri, paruus tuus,  
In ore cuius, cuius in blandis genis  
Pudica mater viuit, & dulcis pater  
Mox insolenti leniter serpet gradu,  
Mox & süavi blaesus alludet sono,  
Foenoque paruum condet & plumâ larem:  
Ridere noli: totius praeludium  
Instantis aeui primus est vitae lepor.  
'Viris quoque ipsis grata sunt crepundia  
Opum cupido mollis, aut honor levis.  
Ridere noli: ludibunda res homo est.  
Semelque pueri nascimur, semper sumus.'*

## In Avriacvm, Danielis Heinsii Poëtae incomparabilis Tragoediam,

### Iani Dovsae Nordovicis Elegia,

HEINSIADES MVSÆ (*neque enim iam nomine Pimplæ  
 Dicendæ posthac, aut Heliconiadum:*)  
 HEINSIADES *inquam, mea cura potiſſima, Musæ:  
 Dicite, sed veſtrâ (Numina ſancta) Fide;  
 Fors quaenam, aut Ratio noſtris vos appulit oris,  
 Huc Aganippæo tam procul à nemore?  
 Numina quiſue deus Batauæ dare nomina Leidæ  
 Compulit, extremi littus ad Oceani?*  
*Sic ego, ſic nobis DVLCES ANTE OMNIA MVSAS.  
 Haud imprudenti hæc Quaestio mota tibi.  
 Scilicet exſilij tibi ſors incognita noſtri eſt,  
 Aut ſola cur toties verſa Cytheriaſin?  
 Barbaries, doctas quæ deſolavit Athenas,  
 Deſerere Argolicam prima coëgit humum.  
 Protenus in Latium hinc faelix noſ expulit error  
 Hetrusco acceptas comiter hoſpitiſ.  
 Nec tamen Hesperiaſ intrâ fuga conſtitit Alpes,  
 Sed Rhenum & Boioſ ivimus Vltérioſ.  
 Noſ Theuto, & Galluſ, noſ excepere Britanni,  
 Aſtur, & Illyricuſ, Sarmata, Pannoniuſ,  
 Certatim inſinuans ſe quiſque; nec hoſpita nobiſ  
 Vel rigiduſ inter tecta negata Getæſ.  
 Et Scotuſ hoſ nobiſ habuit, hoſ Danuſ honoreſ:  
 Omnia Naſſoviuſ ſed ſuperavit amor.  
 Cattorum qui noſ voluit conſiderare regniſ,  
 Et ſtabilem Hollando figere in orbe pedem.*

*Fiximus, atque loci dulcedine delinitis*  
*Suave fuit placitâ conditione frui:*  
*Justa quòd hic nostris decreta stipendia Mystis,*  
*Nutrit honos artes, ingeniumque facit,*  
*Percontere licet; non inficiabitur istud*  
*Lipsius, & magni stemmata Scaligeri.*  
*In medios Romam qui traduxere Batauos,*  
*Et Graios nobis restituerê choros.*  
*Et bene, nîtantos Patriae inuidisset honores*  
*Dux pecoris suîlli, pro sale queis anima est,*  
*Hinc Verres, Tragus inde, nimis bene compositum par;*  
*Corrupto Veri palmite vterque nocens.*  
*Digni ambo, Thuscus Bromio quos mactet Aruspex:*  
*Jlle vt Maialis fiat, at ille Caper.*  
*Parte aliâ nobis extrema minantur Jberi.*  
*Abstineas crudas gens (precor) atra manus,*  
*Abstineas gens atra precor; spes nulla rapinae*  
*Hic tibi; vbi vindex praesidet AVRIACVS.*  
*Sit satis indigna Sicarî fraude peremptum*  
*Nasso vium terris praeripuisse Patrem.*  
*Ah nullâ (ah) mage caede nocens Hispania; saltem*  
*Debit hoc sceleri non licuisset tuo.*  
*Sin fuit in Fatis, tali vt nece victor obiret,*  
*Nunc saltem Furijs contrahe fraena tuis.*  
*Viderit ista Deus; at si quid possumus ipsae,*  
*Tollet nulla dies hanc tibi, Maure, notam.*  
*Heinsiadi sed enim laus haec & gratia nostro*  
*Scaligeri ipsius debita iudicio.*  
*Heinsiadi, cuius inter tot lumina Vatum*  
*Enthea mens nostrae non eget artis ope.*  
*Ipsius potius Genij est opus alite nobis,*



*Alternis soliti verba praeire choris.*  
*Per caussam Delphis Leidam dum mutat Apollo,*  
*HEINSIADI que suas mandat obire vices.*  
*Quò, nisi vt interea GROTIANAE ORACLA SIBILLAE*  
*Consulat; haud spernens discere, quae docuit.*  
*At laudando aliàs dabitur locus Hugeiano;*  
*Nunc satis, HEINSIADI reddere posse vicem.*  
*HEINSIADI, tantum cui nos debere fatemur,*  
*Quantum alicui nostrum soluere difficile est.*  
*Debet & Auriacus, quòd non velut ante vagatur,*  
*Vmbraque trans Stygios errat inulta lacus.*  
*Fallimur, hoc siquidem de Principere credere, vanum est,*  
*In Coelum Pietas cûi sua struxit iter.*  
*Divini hinc meritis Vatis praeconia Diuus.*  
*Otia qui nobis vindiciasque dedit.*  
*Et bene, quod tanto Heroi par contigit haeres,*  
*Maranos natus vincere MAVRITIVS.*  
*Imperij dignus Dominas qui tractet habenas.*  
*Sospite quo Belgis nil metuendus Jber.*  
*Plaude tuo vati Princeps; redit alter Homerus,*  
*Heroô exaequet qui tua facta sono.*  
*Materiae ingenium cui par industria felix,*  
*Materiam ingenio Fata dedere parem,*  
*Sicari facinus Tragico dum plangit hiatu,*  
*Dumque novum Caelo consecrat Indigetem,*  
*Syrmate conspicuus picturatoque Cothurno:*  
*Jpse quibus Magnus plaudit, & ore favet.*  
*J nunc, grandiloqui Iephtem obijce Buchanani,*  
*Caesara Mureti, Lucifèrum Aemcrij.*  
*Francia si Flandris, Gandae Levinia praestat;*  
*Huius & illorum fac monumenta legas:*

*Jlla quidem magnis iurabis scripta Poëtis,  
Haec Nisae & Cyrrhae composuisse Deos.*

### **In evndem.**

*SOL, oculo caeli, temporis cani pater,  
Orbem citato flammeum cursu vehens  
Inane vastum per micantis aetheris:  
Necdumne abhorrens tot videre tristia  
Stas irretortus, os & aduersum tenes?  
Non aureum te, at ferreum mortalibus  
Putare fas: miserrimis mortalibus.  
Natura mollia dedit auro pectora,  
Non vim proteruiamve sustinetia  
Vllius vnquam. vim pati, aut proteruiam,  
Et non moueri, conuenit ferro truci,  
Quod Mulciber, quod triste Cyclopum genus  
In officinis mulcet vsque Lemnijs.  
Ergo ille mundi rector & specimen sui,  
Proles Tonantis atque imago maximi,  
Cui cuncta prono seruiunt fastigio,  
Et vsque & vsque pressus aerummâ gravi,  
Acerba semper experitur munia  
Insontis aeui? Phoebe fers haec, & vides?  
Ah dure Phoebe, Phoebe dure, quamdiu?  
Auerte vultus, nubibus densis caput  
Atratus infer, & dolori lachrymas  
Testes doloris funde perpetes tuo.  
Et tu triformis Luna, fraternos age  
Imitare luctus, rega noctis abijce*

*Peritura semper quid resumis cornua,  
 Et damna toties te fatigas in noua?  
 Quin pone curas, & quiesce: taedeat  
 Aliquandò tandem viuere mori vt debeas.  
 Ducem requirat orba stellarum cohors  
 Errans tenebris inuiis, & semitâ  
 Caecâ viarum non suum tenens iter.  
 Obductus aether igneas condens faces,  
 Quarum benigno suevit orbem lumine  
 Lustrare laetus, seculorum millia  
 Fleat, pluatque; tristis ipse gurgite  
 Dominator alti ab infimo Nereus feret  
 Opem, suoque humore flentem nutriet,  
 Ne sit dolore luctus improbo minor.  
 Confundat & se quicquid vsquam latet,  
 Hominisque doleat fata, fata tristia,  
 Indigna fata sorte tanti Principis,  
 Quem Parca magnae destinârat arbitrum  
 Telluris huius, quem profundi, & mox poli.  
 Deiectus ergo sede regiâ jacet  
 Ille ille princeps, iura rebus antea  
 Dictare natus omnibus; miser jacet.  
 Tenent habenas, quae tenere nesciae,  
 Curae, labores, lachrymae, aerumnae, doli,  
 Ambitio, visque, iniuriae, periuria,  
 Vindicta trux, inuidia, & irae plumbeae,  
 Scelus, nefasque, & quicquid atram trans Stigae  
 Peperere Furiae, prolis infestae, malae.*

*Moderamine isto, talibusque legibus  
 Regnatur orbis, hisce dominis subditus  
 Suspirat altè, & optat antiquum chaos:  
 Gestit perire, fataque incusat suis  
 Ignava votis; seculum momenta sunt.*

*Ad prima tantae machinae incunabula  
 Imperia reges gentibus dabant suis  
 Honestas, mitia: nulla vis, iniuria,  
 Non ambientum fastus, aut superbia.  
 Populos premebat, & sacrum cunctis erat  
 Nomen tyranni nescijs tyrannidis.  
 Non legibus quisquam teneri, principum  
 Arbitria leges promptius párentibus:  
 Rex pro parente, subditi pro liberis,  
 Regnum familia, regium in regno nihil.  
 Augusta aligno sceptras fiebant rudi,  
 Armenta queis nunc terreat pastor sua.  
 Corona non auro grauis, non iaspide,  
 Sed lana mollis nubiebat verticem.  
 Integritas ô sancta, & ô simplex fides!  
 O terror iste qui timendus nemini,  
 Et fastus in quo cerneret fastûs nihil.  
 Suum cuique erat satis: non patrios  
 Proferre cura, non cupido terminos.  
 Quod quis tenebat hoc putare ampliûsimum:  
 Non quaerere vltra quidpiam, nec sanguine  
 Contaminare iusta patrimonia.  
 Speciem vniversi cuncta complexu suo*

*Habere, & omnem parua mundum patria.  
 Beata secla ter, quater! secla aurea!  
 Sed haec fuêre? ah, ah, fuêre? nunc miser  
 Rotatur orbis, sistiturque in verticem,  
 Pendetque praeceps, atque in ima Tartara  
 Metuit ruinam, molis haud vltrà potens.  
 Et ille preßis caelifer vestigiis  
 Excussus Atlas, dente terrarum sola  
 lam provolutus mordet, ac casum gemit:  
 Caelumque quamuis fornice astrictum suo,  
 Vix sustinens se, mox premet tibicinem.  
 Hoc ergo rerum, Heynsi, atque temporum statu:  
 Aptè cothurnum pedibus imponis tuis,  
 Belgique turbas ore sublimi canis.  
 Quin latiore Musa ducat tramite  
 Posthac euntem, sume quidquid obuium.  
 Habebis isto vbique dignum Carmine.  
 Tragoedia aetas omnis, omnis orbis est.*

IOANNES MEVRSIVS.

### **Apostrophe Ad Belgium**

*Illa dies magnum quae funere mersit acerbo  
 AVRIACVM, quot tunc trista damna dedit!  
 BELGIA quae fueras hoc tanto Principe foelix,  
 Illo interfecto nil nisi funus cras.  
 Et tibi prae luctu ingenti vox faucibus haesit,  
 Cum domini cuperes plangere fata tui.  
 MAVRITIO regnante iterum nun ora resoluís,*

*(Aurea qui nobis saecula restituit,)*  
 AVRIACI indignam mortem dum carmine plangis  
 HEYNSIADAE, quo quis doctior, aut melior?  
 Cui puero dixit, (cum quondam quaereret) Echo,  
 MAEONIDEM AVRIACO me fore reris? eris.  
 O foelix Princeps, cui vates obtigit ille,  
 Qui poterit factis scribere digna tuis.  
 O foelix HEYNSI, cui tantus dicitur Heros,  
 Qualem vix vnquam postera saecula ferent.  
 Manibus AVRIACI reddis nunc BELGIA grates,  
 HEYNSIVS vt pot̄is reddere digna, facit.  
 Ergo suo debet nunc quantum BELGIA vati?  
 AVRIACO, HEYNSIADES: HEYNSIADAE, AVRIACVS?

Balthazar Lydius M.L.F. Palatinus

### **Ad eundem.**

*Principis AVRIACI superatam vulnere vitam*  
 HEYNSIVS in numeros cogit abire suos.  
 Dumque parat memori solemnia soluere versu,  
 AVRIACVM vitae reddidit & patriae.  
 Parce, parentali quisquis feralia busto,  
 Et tumulis reddis ultima dona suis:  
 Vivit adhuc Famae AVRIACVS, consorsque futurj:  
 Inter mortales non moriturus agit.  
 HEYNSIVS hunc morti subduxit: & exiit atro  
 Sacratum tenebris nomen inane rogo.  
 Est aliquid morti memoratâ morte mederi,

*Et tumulo tantos eripuisse viros.  
Scilicet huic frustra mortem meditatus IBERVS,  
HEYNSIADE medicâ si medeare manu.*

### **Amico non è multis posuj D. Heremitivs. Antuerp.**

Quia primâ oblatâ occasione Elegias nostras, Heroidum Epistolas, & reliqua quae eò spectant, volente Deo, edituri sumus, simul ne morum magistri semper, aut Catones videamur; adiungemus Elegiarum nostrarum aliquam, quae in manus nostras veniet, ita tamen vt in eâ quoque Batavorum, ac praesertim moris illius quem hac hyeme toties vidimus, fiat mentio. ne planè ἀπροσδιόνυτος sit hic, quem praebemus, gustus.

### **Exelegiarvm Lib. V Ad cognominem meum Heinsivm Ivrisconsvltvm, è peregrinatione reducem.**

*Ergone tam dulces potuisti linquere terras,  
In Batavosque Heinsi, nostrarque regna vehi?  
Hactenus in nostris potuisti haerere pruinis,  
Nec tua mitis adhuc pectora flexit amor?  
Livia iam maestis lachrymam distillat ocellis,  
Et queritur fluxam, sola relicta, fidem.  
Dinumerat cunctas miseranda ex ordine noctes,  
Dinumerat cunctos, vt solet, illa dies.  
Forsitan & Pontum lachrymans prospectat & vndas,  
Quotque videt puppes, tot putat esse tuas.  
Et modo crudeles causatur nescia ventos,  
Et modo turbatas nescia culpat aquas,*

*Multaque de Batauis toties rogat illa puellis:  
 Scilicet an placidas gens ferat illa Deas.  
 Et timet infelix, alio ne saucius igne  
 In Batauis certos fixerit ille lares.  
 Blanda Venus quantis iactatur pallida curis!  
 Blanda Venus quantus pectora versat amor!  
 Et modò rumorem populi scrutatur, & horret,  
 Perfidiaequae omnes arguit illa viros.  
 Ah quoties ventos vaga captat, & aëra cernens  
 Num faueat votis, consulit aura suis.  
 Tu procul horrentem percurris frigore Rhenum,  
 Et nimio vinctas flamine tundis aquas.  
 Hic vbi turba leuis tenerùm glomeratur amantum,  
 Et sequitur faciles iuncta puella viros.  
 Hej mihi, si nescis, mediâ Venus errat in vnda,  
 Materies culpa quot dabit illa tuae!  
 Aspicias dulces celeri pede currere Nymphas,  
 Et cupies, placidas iungere posse manus.  
 Ah miser, ah, hic dum pedibus talaria nectes,  
 Officij precium basia bina feres:  
 Interea lentas queritur tua Livia noctes,  
 Et nimium tardos pergere solis equos.  
 Scilicet ignorat Batavas tua Liuia lymphas,  
 Vt Venus in mediis aurea regnet aquis.  
 Ah tibi cor circum glacies tenet! ah tibi pectus  
 Quae Batauum vinxit flumina, vinxit hyems.  
 Hej mihi, si nec te lachrymae tenuâre, nec illa  
 Brachia, quae collo succubuêre tuo.*



*Ferree, si nec te gemitusque, leuesque susurri,  
 Quaeque feros poterant tangere verba Deos.  
 Cum malè turbato nimijs singultibus ore  
 Defuit in voces vltima lingua suas.  
 Cum tibi pro verbis, tepido modò basia vultu  
 Soluit, in amplexus tota soluta tuos.  
 Languida cum maestos genitrix vix sisteret imbres,  
 Adderet &: reducem iam feret ille pedem.  
 Ille pedem referet, mediâ qui fixus in aulâ  
 Nassouiosque enses, & vaga signa gerit.  
 Iupiter, vt cuncti potius pereatis amantes  
 Quam lachrymas fundat vna puella suas!  
 Scilicet, hîc ardes patrios reparare triumphos,  
 Vtque tibi victus cedere discet Iber.  
 Interea blandus Veneris languescat vt ardor,  
 Eque tuo dulcis pectore cedat amor.  
 Falleris ardentem sequitur Venus aurea Martem,  
 Ah nimium Martem diligit illa suum.  
 Illa solet tristes vlcisci militis ausus,  
 Quique parat victor laedere, victus abit.  
 Dij faciant densum quoties prorumpis in agmen  
 Hic subeant oculi Liuia pulchra tui.  
 Hic subeant lachrymaeque, & inania basia, voxque,  
 Hic subeant agiles in tua colla manus.  
 Hic subeat, qualis lepidos cum flexit ocellos  
 Corda tibi dulcis mollia flexit amor.  
 Ah miser, ah cedes placido summissus amori,  
 Et fluet è digitis ensis & hasta tuis.*

*Nec poteris flexas pavidus versare cateruas,  
 Nec poterunt faciles, vt prius, ire manus.  
 Protenus occurret tua Gallia, spesque, fidesque:  
 Nec tibi quid vocis, nec tibi mentis erit.  
 Ilicet, ardentem galeâ circumdare vultum,  
 Terribilisque alto vertice surgat apex.  
 Cristaque summa levi circum tremat horrida vento,  
 Et subeat nutus tota Medusa tuos,  
 Nos Veneris pia gens faciles sectemur amores,  
 Et gremium dominae, sint mea castra, meae.  
 Hic ego versatos contemnam fortiter enses,  
 Missaque quae fuerint omnia tela, feram.  
 Diva Venus, Venerisque leues faueatis Amores,  
 Haec series vitae tota futura meae est,  
 Osculaque, & mites obliquo lumine risus.  
 Inuideant somnis clauica torua tuis.  
 Me volucrum lenes suadebit inire sopores  
 Murmur, & in viridem serpere coget humum.  
 Rura colam, Rossaeque genas: sic alter & alter  
 Heynsius arma feret, Heynsius arua seret.*

FINIS.